

Kho Kate-kate Asá yerewí

Unindo Ñunde Tangurí

Mande Kembé

Komo suki uni kato sokome ña **Grik** mandewore nakayáñaró, quko enejo owí kama nakayáñaró. Itaka iño-iño uni qambu ñande yeyotengo, Luk, ñu uni Miti Mande sokome ka nakayáñaró, ñundo sowo mande ñu sowe tero sokome ña nakayáñaró.

Itaka iño-iño uni kumimbo ñande yeyotengo, ko kumima naru 62AD nakayáñaró, peka. (Asa “62AD” murí muko ñandiro, ko Yesu nimí pisiyaró, yate kumima naru 62 ñunde rotaró. Nore kumima naru 2,000 ñunde rotoro yate itaka yoteto.) Ñunde yeyotengo, dokoro nore ñande ye inoyoteto, ko Polko 64AD ñuno **Rom** yendémo ñuno uri khumaró. Quko sokomeko mande weñako ñuno Polko **Rom** yendé parámi ñuno kusi-kusi yano watí yora. (*Asá yerewí Uni 28:30-31* weyo qembe.) Ñuya kumima naru 64AD ñunoko **Rom** ñuno ya qambu qayi kini taró. Quko Lukiko o parámi tunoqaró ñuro kama yaró. Ñundiro nañge Luk koro sowo mandí ñuko 62AD kama rotaró, peka.

Miti Mande sokome nakayáñaró ñundiro nañge, sokome ñako uni parámi ka, owí Teopilus, koro nakayáñaró. (*Asá yerewí Uni 1:1* weyo qembe.) Uni ñundo onoho uni kato Luk samakañoní sokome irisa ñu nakayáñaró, peka. Sokome korete quno ñuno Lukiko Yesuko o soso taró ñuro yaró. Sokome ñanoko enendo Yesu khumoro otoqoroqo **Yuqa Surumí** riní umburo **asá yerewí uni** ñuwore noko soso ñuno kho taró ñuro nakayáñaró. Asa Yerusalem ñuno hurí tero, yate-yate **Rom** ñuno uyaro eñgé parámi tunoqaró. Ñundiro nañge Lukiko wítu nereró, ko **miti mande** ñuko parámi tero noko soso weheñaró.

Yesuko Yuqa Surumí umbuweya yaró

1 ¹ Teopilus, komo nondo sokomeko sowo mande ka nakayáñanowó. Sowó mande ñuko ñandiro: Yesuko hurí tero o qambu tero mande rondaqe unipare yunoro, ² yate-yate Yuqa Surumíwore asá yerewí uni rokó yereró ñu khoye ñuro yimironí kini tiní Anutuko riní samboko oró. ³ Koretero ene kowe surumí tero khumaró. Tukú pitu ko yoraró ñu wítú

yerewero quoro o qambu tero asá yerewí uni ñuno tunoqe yunaró. Kosa naru 40 quowore ñuno Anutuko unipareyó wiri yereyote naruyó^a ñuro yimiraró. ⁴Asa naru kano ene ñuya o kopo nañgurí quono ñuno ñande yimiraró, “Nondo komo Awando o meté yunowero mande kusiyaró ñuro yimiranowó. Asa Yerusalem ma rotowero, o meté ñu sopoyi qembe. ⁵Mande kusiyowí ñuko ñandiro, komo Jonko unipare yorero sono re yunaró. Quko naru tukuni nañge Anutuko Yuqa Surumí ye re yunoweya,” yaró.

⁶Ñunde ñuroko naru kano huruworo ñande oseseyañgurí, “Uni Parámi, itaka naru ñanope keto Israel yori eneño wiri yerete uniyembo nañge pitu ko Israel unipare wiri yereweyape, ma kini?”

⁷Ñunde yi ñande yimiraró, “Awa eneñombo nañge do naru o enesó-enesó qu tunoqeweya ñu rokóñaró. Ye naru ñuro okeyá ta ñowero mepémo kini. ⁸Quko imemoñgo Yuqa Surumímbo mahero ye sañayemo yotoro wimbu yunoweya. Ñunde yunoní neneño muríne yesowowañgo. Yerusalem ñuno, ko Judia, Samaria mira soso ñuno, ko noko soso ñuno yesowowañgo.”

Yesu samboko oró
(Mak 16:19-20; Luk 24:50-53)

⁹Asa Yesuko mande ñu yiní kini tiní tojetero qeni riní koreko oní koporéko wisumuñaró.

¹⁰Oní wisumuñoní samboko watí tojeteyuriqo, waka ta nañge uni irisa kutaqe ñuno kañariyó. Uni irisa ñu tuwiyari sara qu. ¹¹Asa ñuno kañero ñande osese yiririyó, “Ye Galili uni, do karo kina kañero koreko tojeteyotengó? Yesu Anutuko riní yorotoro samboko ote ñundo imemoñgo ñundiro nañge pitu ko maheweya.”

¹²Ñunde yiníqo, mira purí Oliv ñu rotoro pitu ko Yerusalem ñuno uñgurí. Mira purí ñu Yerusalem tañgímo ñuno, asa kheyómboro piruyó ñuko Sapat naruko khete uyarewero quoro piruyó ñundiro.^b ¹³Asa ya quoro oro wasa koreko quono ñuno oro kundite sopoyañgo. Owéye muko ñandiro: Pita, Jon, Jems ko Andru; Filip ko Tomas; Bartolomeyu ko Matyu; Jems, ñuko Alipeus koro nañuní; ko Saimon, ñuko Selot koro wini qu ka;^c ko Jutas, ñuko Jems koro nañuní. ¹⁴Ñu uni ñuya pare kumi ñuya soso kondé kañero newonde kanata na tero hariri teyañgo. Ko Yesu

^a 1:3 “Anutuko unipareyó wiri yereyote naruyómo ” ñuno ñonodutu unipareko hamó Anutu kusuyoyómo yowañgo. ^b 1:12 Piruyó ñuko kilomita kanata ñundiro. *Hutuño mande ñuro iño-iño unindo* ñande yañgurí, ko *Sapat naruko* ñuno Juda unipareto eneño miraye rotowero mepémo kini (Tojeygurí 16:29 weyo). Asa ko kilomita kanata takaro khe ka howewero mepémo kini. ^c 1:13 “Selot koro wini” ñuko sañgirí uni. Enendo *Rom* unindoya kuma teyañgurí, dokoro Rom koro wiri yerete uni parámimbo ene sopo yerewero quoro piyimiñangurí.

koro nimí Maria, ko Yesu koro kone-topé, ñu ñuya mahero eneya hariri teyaŋgo.

Matiasako Jutas mepé raró

¹⁵Ñu naruko ñuno Pitako iñondutu unipare keweroyemo kañero mande ka yaró. Qambuye ñuko unipare 120 ñundi. ¹⁶⁻¹⁷Asa ñande yaró, “Uni topo, Jutas ñuko noreya topo tero khonani ñuya taró. Quko enendo khe witú yiriní unindo Yesu towañgurí. Ñundi nange mande ka sokomeko yote ñu Yuqa Surumímbo komo Dewit mañgó moñgo yaró ñu hamó tunoqaró,” yaró.

¹⁸(Komo Jutasko o piyimi taró ñuro kimoyó ñu rero mira ka kimoro ñuno rokaráñoro nokono umbuní kowí kosañiní qahí soso huñero nokono umburó. ¹⁹Uni soso Yerusalem yañgurí qundo ñuro iñañgurí. Ko mira ñu eneño mandeko ñande ye nekañgurí, “Akelitama,” yañgurí. Owé ñuro murí muko ñandiro, “Sitú Mira.”)

²⁰Asa, Pitako ñande yaró, “Hamó, komo suki mande ñu Hariri Yambo koro sokomeko ñande nakayáñañgurí,

“Yayó ñu kina yoní,
uni kato ñuno ma kunditewero.’

Ko mande kañuya ñandiro,

“Uni meyowo kato khoyó ñu riní.’

²¹“Ñunde ñuro uni keweronanimo ka rokóñatoka yoní. Rokóñowato uni ñuko Uni Parámi Yesu noreya uya mahe teyara naruko ñuno yora, ²²asa Jonko sono re inaró qu noñgo yate-yate Anutuko riní koreko oró, ñu naru soso ñuno norendo uni rokóñowato ñuko noreya yora. Eneya noreya Yesu uni tapu koñgo pitu ko otoqaró ñuro mande yesowoyowato.”

²³Asa uni irisa rokó yereñgurí. Kako Josep, ñuko Barisapas ma Jastus nekoñañgurí. Ko uni kako Matias. ²⁴Ñande hariri tañgurí, “Uni Parámi, keto uni soso newondeye qene iñoyote. Keto uni irisa ña dani ka rokóñaró ñu nore witú nereka ²⁵Jutas koro mepé tero asáñowí unindoro kho ña teweya. Jutasko kho ñu huwóñoro eneño yendémo toñeró.” ²⁶Ñunde yero mipu kumi rañiqo, Matias koro mipu ñu tunoqaró.^d Ñunde ñuro enendo asá yerewí uni^e 11 ñuya kañaró.

^d 1:26 “mipu kumi rañiqo” ñuro murí muko ñandiro peka: uni irisa quro owéyari mipu kanata-kanatako ñuno nakayáñoro kusfko yorotoro kusí ñu towo yukuwoní mipu ka roto umburó. Ñande ye iñañgurí, ko Anutuko mipu ñu riní umbuweya. (Iño-iño Mande 16:33 weyo qembe.) ^e 1:26 “asá yerewí uni” ñuko Yesuko rokó yerero asá yiriní eneño khoyó tañgurí.

Yuqa Surumí sañayemo umburó

2 ¹Asa Pentikos o ne-ne^f naruko ñuno unipare soso ñundo ya kano huruwanğurí. ²Waka ta niri ka matú parámi ñunde qembe tero sambo koñgo mahero ya kunditeyanğo ñu mañğoraró. ³Mañğoriní te suru qembe ka usoworo mipi ñunde tero enemo-enemo sañayemo kunditanğurí. ⁴Ñunde ti Yuqa Surumí ñundo unipare soso quroyemo uro wimbu yunoní kimani tero mipiyembo mande enesó-enesó yanğurí.

⁵Ñu naruko ñuno Juda unipare mira enesó-enesó ñu noñgo mahero Yerusalem ñuno yanğo. Juda unipare ñu Anutu hamó potoruku te inoyanğo. ⁶Asa niri ñu tunoqiní iñoro mahe koporo mande enesó-enesówore yeyanğurí qu ñu iñanğurí. Yi iñoro yukuwanğurí, dokoro eneño mandeye enesó-enesówore nanđe iñanğurí. ⁷Iñoro parámi newondeye uroní ñande yanğurí, “Unipare ñuko Galili noñgo qu nanđe, hamómbe? ⁸Date koro nore mandenani enesó-enesówore ñande ye iñoteto? ⁹Nore mira enesó-enesó rotoro ñano mahetowó. Nore kumi Partia mira koñgo qu, Mitia mira koñgo qu, ko Elam mira koñgo qu, ko kumi Mesopotemia mirako yotenğo qu; kumi Judia mira koñgo qu ko Kapatosia mira koñgo qu; kumi Pontus mira koñgo qu ko Esia mira koñgo qu; ¹⁰kumi Pirikia mira koñgo qu ko Pambilia mira koñgo qu; kumi Isip mira koñgo qu ko Lipia mirako Sairin yendé kutaqemo ñu noñgo qu; kumi Rom yendé ñu noñgo ¹¹ñuko Juda uniparetoya unipare meyowombo Juda koro muríye howeyotenğo qu; kumi Kiriti noko mosowí moñgo qu ko Arepia mira koñgo qu. Asa nore soso uni ñu Anutuko kho wimbí ñuro mandenaniwore yi iñoteto.” ¹²Ñunde yero soso yukuwanğurí, ko newondeye uroní epe mito-mito tanğurí, “O itaka tunoqete ñuko, do murí ka?”

¹³Quko kumimbo huwó mande ñande yanğurí, “Uni ñu wain parámi nero kape-kape tetenğo.”

Pitako mande yesowaró

¹⁴Asa Pita otoqoro asá yerewí uni^g 11 ñuya kañero kondé nekoro unipare ñande yimiraró, “Ye Juda uni, ko ye soso Yerusalem yotenğo qu, o tunoqiní qenetenğo ñuro murí rondaqe yunowe teteno. Kusumbo re mandene iñi. ¹⁵Yembe uni ñambe wain koro kape-kape tetenğo yero, hamómbe? Ñu kini. Itaka ita sarañoní 9 kilok nanđe. ¹⁶Kini, o itaka tunoqete ñaro, komo ye-ye uni^h ñu Joel ñundo ñuro ñande yaró,

^f 2:1 “Pentikos o ne-ne ” naru ñuko Juda uniparetoro naruye parámi ka. *Taka yereró quro o ne-ne* ñu kini tiníqo, yate kosa naru 50 ñunde rotoro *Pentikos* tunoqaró. ^g 2:14 “asá yerewí uni ” ñuko Yesuko rokó yerero asá yiriní eneño khayó tanğurí. ^h 2:16 “ye-ye uni ” ñuko Anutuko mandí yunoní unipare yunanğurí.

- 17 “Anutuko ñande yete, ‘Naru weña qunoko
neneño Yuqane windoroñowe
unipare soso sañayemo uweya.
Ñunde tewe yeño nambo-simóyembo Anutu koro mandí
yesowowaño,
yeño simó keta-keta ñundoko o enesó-enesó qenewaño,
yeño uni pará-pará ñundoko o quko qenewaño.
- 18 Ñu naruko ñunoko no Yuqane windoroñowe
sunará simónemo, sunará parenemo ñuro sañayemo uweya.
Ñunde tewe Anutu koro mandí yesowowaño.
- 19 Nondo o amana-mana siyowe koporéko tunoqewaño.
Nokono amu noñgo rokó kate-kate siyowe tunoqewaño.
Sitú koya te qayote quya pukatutu parámi horé ñuya
tunoqewaño.
- 20 Uni Parámimboro naru parámi horé mu tukuni tiníqo
kosako huriri qembe tunoqeweya,
ko komboko mandumi sitú qembe tunoqeweya.
- 21 Ko Uni Parámimbo unipare soso owí nekoteño ñu rambaruru koño
yoreweya.”ⁱ
- 22 “Ye Israel uni, mande ña inoyi. No Yesu, Nasaret noñgo uni ñuro
yimiroteno. Ye ñande inoteño, ko Anutuko uni ñuwore o wimbí moré
enesó-enesó ye keweroyemo tero uni ñuro owí hokaró. ²³ Komo suki
Anutuko inoro mande kusiyaró, ko itaka uni ñu re yeño kandeyemo
rotoní uni hutuño mandenani kama howeyoteño quro kandeyembo
tipiririko^l uri khumaró. ²⁴ Ñunde quko Anutuko khumo koro wimbí ñu re
rotoro okokowoní pitu ko otoqaró. Dokoro uni tapu ñundo ñu towowero
mepémo kini. ²⁵ Hamó, Dewitko^k ñuya ñuro ñande yaró,

“Nondo Uni Parámi qenewe tanjenemo suki yote.

Asa ko kandene kondésina yoníqo
oka kato yuku nerewero mepémo kini.

- 26 Ñu murí ñuro newondenembo meté yoweya,
mañgonembo niñgu-niñgu mande yeweya.
Hamó, neneñombo o meté horé ñuro sopowano.
- 27 Dokoro keto noroti uni khumowí ñuro yendéyemo ñuno kama
yowano,
keño uni meté horé ñu roti uni tapuko ñuno kama puqeweya.

ⁱ 2:21 Joel 2:28-32 ^j 2:23 “tipiriri” ñunde quko wiri yerete uni kumimbo eneño uni sañgiríye yorero ñuno uroyi khumoyañguri. ^k 2:25 “Dewit” - komo suki Dewitko Israel uniparetoro wiri yerete uni taró. Anutuko Dewit kondé ino inaró, ko yate-yate Israel unipare ñuyako Dewit kondé ino inañguri.

28 Yoto-yoto koro khe qu witú nereró,
nori tonjengemo ninggu-ninggu parámi tewano.'

29 “Uni topo, no hamó iñoro meté yimirowe teteno, ko usinani Dewit ñundo mande ñu nakayáñjaró, quko komo khumoní re tapuñangurí. Ko eneño tapuyó nore keweronanimo itaka yote. 30 Dewit ñuko ye-ye uni ka tunoqaró. Ñunde ñuroko komo Anutuko mande hamó ka ñande miraró, ko imemoñgo Dewit koro sowe qu kato eneño yakutímo kunditero unipare wiri yereweya. Asa mande ñu iñoro 31 Kristo ñundo¹ pitu ko otoqoweya ñuro ñande yaró, ko Anutuko rotoní uni khumowí ñuro yendéyemo^m ñuno kama yoweya, kowí ñu kama puqeweya. 32 Yesu ñuko, Anutuko okokowoní otoqaró ñu. Nore ñano qundo soso qenero ñuro yesowoyoteto. 33 Komo Anutuko Yuqa Surumí nore nunoweya ñuro mande kusiyaró. Asa pitu ko otoqoníqo, Anutuko riní koreko horé oro Anutu koro kandí kondésinaⁿ kunditero Awa kandí moñgo Yuqa ñu rero wíndoroñoní ye o enesó ña qenero iñoyotenggo. 34 Qeni, Dewit eneñombo samboko kama oró. Quko ñande yaró,

“Uni Parámimbo uni parámine ñande miraró,
“Kandene kondésina ñano kunditekata,

35 yate-yate sangiríñge yorewe
kheñge kusunoyómo yowañgo.”

36 “Ñunde ñuro ye Israel koro sowe qu,^o ye meté iñoyi. Yendo Yesu rero tipiririko urañgurí ñuko, Anutuko riní Uni Parámi yote; ko Kristo^p ñunde yote.”

Uni qambu qundo newondeye rohoréñangurí

37 Pitako ñunde yiní mande ñundo uniparetoro newondeye hamó sangawoní unipareto Pita koya uni asá yerewí unindoya ñande osese yerengurí, “Uni topo, nore do ka tewato?”

38 Pitako ñande yimiraró, “Ye kanata-kanata quhuríyemboro newonde surumí teya quhurí ñu se rotoya Yesu Kristo^q owímo sono ri. Ñunde tiqota Anutuko quhuríye se rotoro Yuqa Surumí rero yunoweya. 39 Mande

¹ 2:31 “Kristo ” ñuko Anutuko rokóñoní mahero wiri yerete uni parámi horé tunoqaró ñu. ^m 2:31 “uni khumowí ñuro yendéye ” ñuko Juda unipareto ñande ye iñangurí, ko uni soso khumoro yendé amuno ñuno uyañgurí. ⁿ 2:33 Uni owé parámi moré ñu nange wiri yerete uni kandí kondésina ñunde kunditañgurí. ^o 2:36 “Israel koro sowe qu” ñuro murí muko ñandiro: unipare soso ñundo Yakop koro sowe qu, ko Yakop koro owí kako “Israel”. ^p 2:36 “Kristo ” ñuko Anutuko rokóñoní mahero wiri yerete uni parámi horé tunoqaró ñu. ^q 2:38 “Yesu Kristo ” - komo suki ye-ye unindo Anutuko uni ka rokóñoní mahero wiri yerete uni parámi horé tunoqeweya qu karo yañgurí. Juda unipareto uni maheweya ñu, “Kristo,” ma, “Mesaiya,” ye nekañgurí. Asa Yesu mahiní eneño unipareyó, “Kristo Yesu,” ma, “Yesu Kristo,” nange ye nekañgurí.

kusiyaró ñu, Anutuko yeya, simóyemboya, unipare soso sewemo yotoro Uni Parámi ñu, Anutunani nekoyotenjo ñuya mande ñu kusiyaró.”

⁴⁰Ñunde yero Pitako oresaka mande kate-kate yero newondeye rukisoyoro ñande yaró, “Anutuko unipare itaka nokono ñano yotoro o pi-piyimi teyotenjo qu, ñu rambaruru yereweya. Ye rambaruru ñu takayi!” ⁴¹Asa ko danimbo enejo mandí ñu hamó tañgurí qu, sono re yunañgurí. Ko ñu naruko ñuno Anutuko injondutu uni sowe tiní unipare 3,000 kañuya injondutuwoyañgurí. ⁴²Naru rokóñoro uni soso ñundo asá yerewí uni^r mandeye injoyango, ko epe samaka-samaka teyango, bret romboñero o kopo neyango^s ko hariri teyango.

Injondutu unipareto newonde kanata tañgurí

⁴³Asa Anutuko asá yerewí uni kandeyemo o wimbí moré^t qambu tiní unipare soso ñundo qenero ará parámi te inañgurí. ⁴⁴Injondutu unipare soso ñundo newonde kanata tero oye soso se kopoyañgurí. ⁴⁵Onoñoye soso soweyoro wondo ñu uni o karo tukuni tañgurí ñu yunañgurí. ⁴⁶Naru rokóñoro newonde kanata tero Ya Surumímo^u ñuno huruwoyango, ko ya kano-kano bret romboñero newondeye meté tero ñingu-ñingu tero o kopo neyango. ⁴⁷Naru rokóñoro Anutu owí hokoyi unipare soso meyowo ñundo enejo metéjoyañgurí. Kowe naru rokóñoro Anutuko unipare kumi yoriní injondutu tero ñuno kopoyañgurí.

Pitako uni ka khí piyimi qu riní meté taró

3 ¹Asa naru kano Pita koya Jon koya hariri tewero naruko ñuno, suwoya 3 kilok Ya Surumímo^r oriyó. ²Ori kumimbo uni ka khí piyimi qu re koroworo ñuno uyareñgurí. Uni ñuko, nimímbo khí piyimi ñunde pisiyaró. Naru rokóñoro topé-topémbo Ya Surumí makoyómo owí muko Kekere Qu ñuno rotoyi kunditiní unipare Ya Surumímo oyiyo, wondo koro nekeyara. ³Asa uni ñundo Pita koya Jon koya yiyoní Anutu koro Ya Surumímo ñuno owero tiri, o koro kira taró. ⁴Pita koya Jon koya kondé qenero Pitako ñande miraró, “Ke toñete nore niyo.” ⁵Yini o siyowero quro yero injoro ene toñetaró. ⁶Asa Pitako ñande yaró, “No wondo silwape ma gol moré kini. Quko oka moré, ñu re kunowe teteno. Yesu Kristo,” Nasaret yendé moñgo uni ñuro

^r 2:42 “asá yerewí uni ” ñuko Yesuko rokó yerero asá yiriní enejo khayó tañgurí.

^s 2:42 “bret romboñero o kopo neyango” ñuko Uni Parámimboru o ne-ne qu peka.

^t 2:43 “o wimbí moré ” ñuko o enesó-enesó tunoqiní Anutu koro wimbí ñunde tunomo yoweya. ^u 2:46 “Ya Surumí ” ñuko Anutu koro ya qu, ñunoko Juda unipareto Anutu koya huruwowero quro hu-hariri teyañgurí. ^v 3:1 “Ya Surumí ” ñuko Anutu koro ya qu, ñunoko Juda unipareto Anutu koya huruwowero quro hu-hariri teyañgurí. ^w 3:6 “Yesu Kristo ” - komo suki ye-ye unindo Anutuko uni ka rokóñoní mahero wiri yerete uni parámi horé tunoqeweya qu karo yañgurí. Juda unipareto uni maheweya ñu, “Kristo,” ma, “Mesaiya ,” ye nekañgurí. Asa Yesu mahiní enejo unipareyó, “Kristo Yesu,” ma, “Yesu Kristo,” nange ye nekañgurí.

owímo ke kimiroteno, otoqo kaŋe uyare.”⁷ Yero kandí kondésina towo hoko wosaró. Wosoní waka ta potó soso kondérini otoqaró. ⁸ Otoqoro sore-sore tero irisa ŋuya Ya Surumímo khete-khete oro sore-sore tero Anutu owí hokoyaró. ⁹ Unipare soso qeni otoqo kaŋero khete-khetero Anutu owí hokoyoní qenero ¹⁰ ŋande iŋaŋguri, uni ŋundo Ya Surumí makoyómo owí muko Kekere Qu ŋuno kunditero wondo koro nekeyara ŋuno qu. Iŋunde qene iŋoro o tunoqaró ŋuro iŋo-iŋoye enesó-enesó taró.

Pitako Ya Surumímo ŋuno mande yesowaró

¹¹ Asa uni ŋundo Pita koya Jon koya yondoworo pisi yiriní unipare soso newondeye yukuwoní khengeŋoro mahero Ya Surumímboro^x yokone ŋu owí muko Solomon koro Yokoneyómo ŋuno mahe kopanguri. ¹² Kopoyi Pitako yiyoro ŋande osese yereró, “Ye Israel uni, ye do karo iŋondata parámi teyotengó? Do karo toŋetero nore niyotengó? Yembeka ŋande iŋoyotengó, nore irisa wimbunarimbope ma otetenari meté ŋundo uni ŋa riní meté tete, peka? Kini horé! ¹³ Abraham, Aisak, Yakop koro Anutuye, usisambananimboro Anutuye, ŋundo kho uniyó Yesu owí hokaró. Yendo kho uni ŋu rero uni saŋgiri kandeyemo rotanguri. Pailatko rotowero ŋuro ye iŋaró, quko yendo sunará simó ŋu huwónanguri. ¹⁴ Yendo uni roneneŋowí ŋu, uni meté horé ŋu huwónoro yuroní khumowero uni ka rewero quro Pailat kirayanguri. ¹⁵ Yendo uni ka nore soso yoto-yoto yunaró ŋu uri khumaró, quko Anutuko uni tapu koŋgo okokowoní otoqaró. Nore irisako ene otoqaró ŋuro iŋoro mande yesowoyotero. ¹⁶ Uni ŋa ye qene iŋoyotengó, ŋundo Yesu owímo iŋondutu tiní owé ŋundo wimbu inaró. Ko Yesuko iŋondutu inaró ŋundo uni ŋa riní yeŋo toŋeyemo meté tete.

¹⁷ “Asa, uni topo, no iŋoteno, yeya uni kembé-kembéye ŋuya kape-kape tero otete piyimi ŋu tanguri. ¹⁸ Komo Anutuko ye-ye uni^y soso maŋgoyemo ŋande yesowaró, ko eneŋo Kristoyó^z quhurí korowoweya. Asa ko yendo otete tanguri, ŋuko mande ŋu riní hamó tunoqaró. ¹⁹ Iŋunde ŋuro ye quhuriyembo newonde surumí teya quhurí ŋu se rotika Anutuko quhuriye sowoní. ²⁰ Iŋunde tiqo, Uni Parámimbo wimbu keta yunoro Kristo komo rokónaró ŋu, Yesu naŋge, asáŋoní yeno mahiní. ²¹ Itakako samboko yotoro Anutuko o soso keta towoweya naruyó ŋu sopoyote. Anutuko komo suki ye-ye uni meté horé ŋuro maŋgoyemo ŋunde yaró. ²² Mosesko ŋuro ŋande yaró, ‘Uni Parámi ŋu, Anutuyembo ye-ye uni ka neneŋo qembe ye keweroye moŋgo riní otoqoweya. Mande

^x 3:11 “Ya Surumí ” ŋuko Anutu koro ya qu, ŋunoko Juda unipareto Anutu koya huruwowero quro hu-hariri teyanguri. ^y 3:18 “ye-ye uni ” ŋuko Anutuko mandí yunoní unipare yunanguri. ^z 3:18 “Kristo ” ŋuko Anutuko rokónoní mahero wiri yerete uni parámi horé tunoqaró ŋu.

soso yeyoweya ŋu iŋo howeyuri qembe. ²³Ko dani kato eneŋo mandí kama iŋo howeyoweya qu, Anutuko eneŋo unipareyó keweroye moŋgo howiní piyo teweya.’^a

²⁴“Ko ye-ye uni soso, asa Samuel koŋgo yate-yate, ŋundo naru ŋaro mande yesowaŋgurí. ²⁵Anutuko usisambayemboya mande kondé rero Abraham ŋande miraró, ‘Keŋo soweke moŋgo unipare soso nokono ŋano qu puriŋo rewaŋgo.’^b Asa yeko ye-ye unindoya uni mande kondé raŋgurí ŋuya ŋuro sowe qu. ²⁶Anutuko sunará simóŋo rokóŋoro yeno koretero asáŋoní ye puriŋo yunowero maheró. Ŋunde yunoro yoriní newondeye rohoréŋoní oteteye piyimi horé ŋu rotowango.”

Pita, Jon yorero kusi-kusi yano yorotaŋgurí

4 ¹Asa Pita, Jon irisa ŋundo mande yeyori o qa-qa unindoya^f Ya Surumímboro^d sopo-sopo uni ŋuya Sadyusi unindoya^e ŋuno uyareŋgurí. ²Uni ŋundo irisa ŋuro piyimiŋaŋgurí, dokoro enendo unipare mande rondaŋe yunoro, Yesu uni tapu koŋgo pitu ko otoqaró ŋuro yariyó. ³Asa suwo tiní ŋuno uyaro irisa ŋu yondoworo kusi-kusi yano yorotaŋgurí. Ŋuno yorika ita saraŋoníqota, ye iŋaŋgurí. ⁴Quko unipare qambu mandeyari iŋoro iŋondutu taŋgurí. Ŋundiro iŋondutu unipare qambuye ŋu sowe tero 5,000 kaŋjuya taŋgurí.

Uni pará-parámbo Pita, Jon mande kho yunaŋgurí

⁵Ita saraŋoníqo, o qa-qa unindoro tapá unindoya^f uni kembé-kembémboya hutuŋo mande ŋuro iŋo-iŋo unindoya^g Yerusalem ŋuno kopanaŋgurí. ⁶O qa-qa unindoro tapá uni Anas koya Kaiapas, Jon, Aleksanda ko tapá unindoro suwisawiyó kumi ŋuya ŋuno kopanaŋgurí. ⁷Asa Pita, Jon yorero keweroyemo yoroti kaŋjiri ŋande osese yerenaŋgurí, “Yari wimbu da noŋgo rero ko danimboro owé ŋu rero o ŋu tari?”

⁸Ŋunde yiyo, Yuqa Surumímbo Pita quroko maŋgoriní ŋande yimiraró, “Ye uniparetero uni kembé-kembéye qu, ko ye uni pará-pará, ⁹yembeka nore irisako uni khí piyimi ka o meté te inaro meté tete ŋuro osese nerewero nore ŋano noroti kaŋetero, hamómbe? ¹⁰Asa yeya Israel unipare soso ŋuya ŋande iŋoyi, Yesu Kristo,^h Nasaret yendé moŋgo uni ŋuro owímo uni ŋa meté tero itaka ye

^a 3:23 Hutuŋo Mande 18:15, 18-19 ^b 3:25 Murí Tero 22:18 ^c 4:1 “o qa-qa uni ” ŋundo Ya Surumímo Anutu koro kho tero uniparetero quhuriye rotowero quro wondo yakutímo ŋuno o qa-qa te inaŋgurí. ^d 4:1 “Ya Surumí ” ŋuko Anutu koro ya qu, ŋunoko Juda unipareto Anutu koya huruwowero quro hu-hariri teyaŋgurí. ^e 4:1 “Sadyusi uni ” ŋuko unindoro huru-huru ka Israel mirako ŋuno yaŋgurí. Eneko wondo uni kumi owéye parámi tero unipare soso sopo yerenaŋgurí. ^f 4:5 “o qa-qa unindoro tapá uni ” ŋundo Ya Surumímo hu-hariri sopo ronda-ronda huru-huru owí muko, “Sanedrin ,” ye nekoyaŋgurí ŋu sopoyaró. ^g 4:5 “hutuŋo mande ŋuro iŋo-iŋo uni ” ŋundo Anutu koro mande ŋu unipare rondaŋe yunoyaŋgurí. ^h 4:10 “Yesu Kristo ” - komo suki ye-ye unindo Anutuko uni ka rokóŋoní mahero wiri yerete uni parámi horé tunoqeweya qu karo yaŋgurí. Juda unipareto uni maheweya ŋu, “Kristo,” ma, “Mesáya ,” ye nekaŋgurí. Asa Yesu mahiní eneŋo unipareyó, “Kristo Yesu,” ma, “Yesu Kristo,” nange ye nekaŋgurí.

tonjeyemo kanjete. Yendo Yesu rero tipiririkoⁱ urangurí, quko Anutuko uni tapu konggo okokowoní otoqaró. ¹¹Eneko

“wondo njuko ya re-re unindo njuro yangurí, “Ŋu piyimi.”

Quko njundo ya koro wondo korete-korete qu tunoqete.’

¹²Uni meyworo kawore nore rambaruru kama takawato. Dokoro uni soso nokono yotengo quoro owí kato nore rambaruru konggo kama noreweya. Yesu koro owímo nanje.”

¹³Ŋunde yini uni pará-parámbo njande injangurí, ko Yesu koya yariyó nanje, sokome yano oro injo-injo njundiro kama rariyó. Quko irisa njundo mande kondé yero sasaro kama tariyó. Ŋunde njuroko injondata parámi tangurí. ¹⁴Ko uni khí piyimi nj meté tero irisa njuya kanjangurí. Ŋunde njuro uni pará-parámbo mandeyari topé tewero mepémo kini. ¹⁵Asa irisa nj yori huru-huru roto mirako uriqo, epe mito-mito tero njande yangurí, ¹⁶“Norendo uni nj do yerewato? Kho wimbí moré ka tari, ko unipare soso Yerusalem yotengo qu injanggo. Re tapunowero mepémo kini. ¹⁷Quko mande njando unipareko wimbo uweya koro. Ŋunde njuro mande kondé eneya yatoqo, uni meyworo ka owé njuro ka kama yimirowari,” yangurí.

¹⁸Asa neko yerero mande kondé njande yimirangurí, “Yesu owímo mande kanata ka watí-watí ma yeyowero, ko owímo unipare kumi mande rondaqe ma yunowero.”

¹⁹Yi Pita koya Jon koya mandeye topé njande yariyó, “Nore irisa Anutu koro mande qu roto yeno mande qu howewaro tiníqo, njumbeka Anutu tonjimo ronenejowímbe ma kini? Yenjombo qene rondañi qembe. ²⁰Dokoro norendo o qenerowó ko injarowó njuro mondó ta yowero mepémo kini.”

²¹Ŋunde yiriqo, oresaka mande nanje yunoro yoroti yendémo uriyó. Uni pará-parámbo irisa nj quhurí yunowero kheyó seqangurí, quko mepémo kini, dokoro uniparetoro sorangurí. Hamó, unipare soso o tariyó njuro injoro Anutu owí hokoyangurí. ²²Dokoro uni nj o wimbí moré^j ka towori meté taró njuko kumima naru 40 njunde rotaró.

Ijondutu unipareto hariri ka tangurí

²³Asa yendémo uro topo-topoyarimboya koporo mande o qa-qa unindoro tapá unindoya uni kembé-kembémboya yimirangurí nj soso yariyó. ²⁴Topo-topoyarimbo manjgoye koporo Anutu koya njande hariri tangurí, “Uni Parámi, keto sambo, noko, windi, o soso njuro quoro

ⁱ 4:10 “tipiriri ” njunde quko wiri yerete uni kumimbo enejo uni sanjiríye yorero njuno uroyi khumoyangurí. ^j 4:22 “o wimbí moré ” njuko o enesó-enesó tunoqini Anutu koro wimbí njunde tunomo yoweya.

yote qu, ñu yondowaró. ²⁵Komo Yuqa Surumímbo usinani Dewit,^k keño sunará simónge maᅅᅅo maᅅᅅo mande ka riní tunoqiní ᅅande yaró,

“Do karo uni wini meywombo newonde saᅅgiri parámi teyaᅅguri?
Do karo unipareto iᅅondutu piyimi kina towoyaᅅguri?”

²⁶ Noko soso koro wiri yerete unindo kaᅅero,

ko uni kembé-kembéye koporo,
Uni Parámimboya eneᅅo Kristoyómboya owéyari
rato umbuweya, ye iᅅoyaᅅguri.’

²⁷“Hamó horé, Herot,^l Pontius Pailat, uni wini meyo,^m Israel unipare, soso ᅅundo Yesu, keño sunará simónge rokóᅅaró, ᅅuro owí re umbuvero quro yendé ᅅano kopāᅅguri. ²⁸Koporo o soso taᅅguri ᅅuko komo keto wimbukepoya iᅅo-iᅅokepoya o ᅅu tunoqeweya, yero rokóᅅaró. ²⁹Asa itaka, Uni Parámi, mandeye piyimi ᅅu iᅅoya nore sunará simónge samaka nereka sasaro kama tero mandeke yesowoyowato. ³⁰Kandeki rero keño sunará simónge meté horé ᅅu, Yesu, ᅅuro owímo se khumo uni yori pitu ko meté tewaᅅᅅo, ko o wimbí moréⁿ enesó-enesó tunoqewaᅅᅅo.”

³¹Hariri ᅅu ti kini tiníᅅo, ya ᅅuno kopāᅅguri quno ᅅuno kunduru raᅅoní yukuwaró. Ko Yuqa Surumímbo eneno maᅅgoriní sasaro kama tero Anutu koro mande qu yesowaᅅguri.

Iᅅondutu unipareto onoᅅoye koporo epe ino-ino taᅅguri

³²Iᅅondutu unipare soso newonde kanata na, iᅅo-iᅅo kanata na taᅅguri. Uni kato ene oka qu qenero ᅅande kama yaró, “O ᅅuko neneᅅo qu naᅅᅅe.” Kini, oye soso ᅅuko uni soso koro qu ᅅuya. ³³Ko asá yerewí uni^o ᅅundo Uni Parámi Yesu uni tapu koᅅᅅo pitu ko otoqaró ᅅuro mande yesowoyaᅅᅅo, ko mandeye muko wimbí parámi horé. Ko samaka-samaka tuwó ᅅu^p parámi saᅅayemo ᅅuno yora. ³⁴Uni ka keweroyemo ᅅuno otero kama tukuni teyara. Dokoro uni soso yaye, miraye soweyoro wondo ᅅu re mahero ³⁵asá yerewí uni kandeyemo ᅅuno roto yunaᅅguri. Yunoyi rondaᅅero uni otero tukuni teyaᅅguri qu yunoyaᅅᅅo.

³⁶Uni kako, owí Josep, ᅅuno yora. Asá yerewí unindo, “Barnabas,” ᅅunde ye nekaᅅguri. Owé ᅅuro murí muko ᅅandiro, “Uni newondeye

^k 4:25 “Dewit” - komo suki Dewitko Israel uniparetoro wiri yerete uni taró. Anutuko Dewit kondé iᅅo inaró, ko yate-yate Israel unipare ᅅuyako Dewit kondé iᅅo inaᅅguri.

^l 4:27 “Herot,” owí kako “Antipas,” ᅅundo Galili mira sopo yereró, quko enendo Rom koro wiri yerete uni parámi kasirayómo yora. Wiri yerete uni parámi ᅅundo owé parámi ka Herot inaró. Komo Herot koro iwímbo Juda unipare soso wiri yiriníᅅo, Mariako Yesu pisiyaró. ^m 4:27 “uni wini meyo” ᅅunde quko Juda unipare kini qu naᅅᅅe. ⁿ 4:30 “o wimbí moré” ᅅuko o enesó-enesó tunoqiní Anutu koro wimbí ᅅunde tunomo yoweya.

^o 4:33 “asá yerewí uni” ᅅuko Yesuko rokó yerero asá yiriní eneᅅo khayó taᅅguri.

^p 4:33 “samaka-samaka tuwó” ᅅuko Anutu eneᅅombo nore samaka yereyote. Kimoyó moré kini.

rukisoyote.” Ijuko Liwai koro sowe qu ka,⁹ ko nimímbo Saipras noko mosowímó ñuno pisiyaró. ³⁷Asa enendo mirayó kawore soweyoro wondo ñu rero mahero asá yerewí uni kandeyemo roto yunaró.

Ananaias, Sapaira o kaná-kaná tariyó

5 ¹Asa uni kako, owí Ananaias, koya parí muko, owí Sapaira, ñuno yariyó. Ananaiasko mirayó kawore soweyoro ²parímboya newonde kanata tero wondo kumi enenjombo tapuñoro kumi nanje re mahero asá yerewí uni^r kandeyemo roto yunaró.

³Iñunde roto yunoní Pitako ñande yaró, “Ananaias, ke date koro Monimbuko newondekemo mañgoriní Yuqa Surumí kanáñoro mira koro wondo qu kumi tapuñote? ⁴Komo, kama soweyaró quno, mira ñuko keño qu nanje, ko imemoñgo soweyoro keñombo nanje wondo ñu sopa, hamómbe? Date koro otete ñu newondekemo ijote? Keko uni ka kama kanáñote. Kini, Anutu kanáñote.”

⁵Yiníqo, Ananaias mande ñu iñoro rokaráñoro umburo kindo khumaró. Uni soso ene khumaró ñuro piña mande iñañgurí qundo sasaro parámi tañgurí. ⁶Ko uni keta qundo mahero ukúño rero tuwipo pokamoro re tapuñañgurí.

⁷Imemoñgo naru tukuni nanje enejo parímbo kamí khumaró ñu kama iñoro maheró. ⁸Mahiní Pitako ñande oseseyaró, “Ke yeka iñowe. Wondo ñu re mahiri, ñuko mirayari soweyariyó ñuro kimoyó sosope, ma kini?”

Yiní ñande yaró, “Iyo, ñuro kimoyó soso.”

⁹Yiní Pitako ñande miraró, “Date koro yarindo Uni Parámimboro Yuqa qu towoñowero mande kusiyariyó ñu? Iño, uni kameñge re tapuñotenggo ñuno qu mahero makono kañeyotenggo. Ke ñuya kore uyarewañgo ñu.”

¹⁰Yiní waka ta rokaráñoro Pita khímo umburo kindo khumaró. Khumoní simó keta qundo ya quroko oro pare ñu qeniño, ñu ñuya khumaró. Rero koroworo oro kamí roroworo tapuñañgurí. ¹¹Ko Anutu koro huru-huru soso^s ñuya unipare soso o tunoqaró ñuro iñañgurí ñuya sasaro parámi tañgurí.

Asá yerewí uni ñundo se khumo uni qambu yori meté tañgurí

¹²Asa asá yerewí uni^t ñundo o wimbí moré^u enesó-enesó unipare keweroyemo tañgurí. Ko iñondutu unipare soso ñundo newonde kanata

⁹ 4:36 “Liwai koro sowe qu ka” - Liwai ñuko Yakop koro nañuní, asa ñundiro Israel uniparetoro puko ka. Anutuko Liwai koya enejo sowe qu horé kho ka yunaró. Enendo Ya Surumímó ñuno o soso roñgaruwoyañgurí. ^r 5:2 “asá yerewí uni” ñuko Yesuko rokó yerero asá yiriní enejo khayó tañgurí. ^s 5:11 “Anutu koro huru-huru” ñuko unipare soso Yesu iñondutuworo nokone-nokone ñuno huruwoyotenggo qu. ^t 5:12 “asá yerewí uni” ñuko Yesuko rokó yerero asá yiriní enejo khayó tañgurí. ^u 5:12 “o wimbí moré” ñuko o enesó-enesó tunoqiní Anutu koro wimbí ñunde tunomo yoweya.

tero Ya Surumí' ηuno Solomon koro Ya Yokoneyómo ηuno kopoyangurí. 13 Uni kumi eneya kopowero ηuro sasaro tanğurí, quko unipareto uni ηuno kopoyanğo ηuro metéyoğangurí. 14 İjunde ηuroko uni qambu, pare qambu ηuya Uni Parámi ijondutuwoğangurí. 15 İjunde tiqo, kumimbo se khumo uni yorero kheko yakutíyemo yorotoyi Pitako mahinškata eneğo yoğoyómbó poka yereweya. 16 Topoyembo se khumo unindoya uni yuqa pusú^w soso qundo rambaruru yereyanğo ηu yorero yendé Yerusalem kutağemo ηu noğo mahiqo, yori meté tanğurí.

Sambo simómbó asá yerewí uni kusi-kusi yano samaka yereró

17 Asa o qa-qa unindoro tapá unindoya^x eneğo topé-topé ηuya, asa Sadyusi koro huru-huru kumi,^y ηundo soso otoqoro newonde tutu tero 18 asá yerewí uni^z ηu yondoworo yorero kusi-kusi yano yorotanğurí. 19 Quko suwonoko Uni Parámimboro sambo simó^a kato kusi-kusi ya ηuro makoyó kosoro yorini mirako umbunğurí. Umburo ηande yimiraró, 20 "Ye uya Ya Surumí^b ηuro yendémo ηuno kağeya unipare yoto-yoto keta ηaro yimiri," yaró.

21 Ita sarajóni Ya Surumí ηuro yendémo ηuno oro mande rondaqe unipare yunangurí.

İju naruko ηuno nağe o qa-qa unindoro tapá unindoya topé-topémboya mahero huru-huru parámi ηu owí Sanedrin, Israel koro sopo-sopo uni soso ηu, neko yereğurí. Neko yiri huruworo kumba tukuni kumi asá yerewí uni ηu kusi-kusi ya noğo yore mahi, yero yanğurí. 22 Quko uni ηu kusi-kusi ya quroko ηuno kama yiyangurí. Asa ko rohoréğo mahero ηande yimirangurí, 23 "Nore kusi-kusi ya ηuro makoyó qeneteto ηu, mako ηu towi kondériní unindo mako ηu ene-ene sopo wuririyoyotengo. Quko mako kosoro uni ηu quroko ηuno kama yiyato." 24 İjunde yiqo, Ya Surumímboro sopo-sopo unindoya o qa-qa unindoro tapá uni ηuya ijondataqero, "Do ka tunoqeweya?" ye ijangurí.

25 Asa uni kato mahero ηande yimiraró, "İğoyi, uni yore kusi-kusi yano yorotanğo ηuko itakako Ya Surumí ηuro yendémo ηuno kağero

^v 5:12 "Ya Surumí" ηuko Anutu koro ya qu, ηunoko Juda unipareto Anutu koya huruwowero quro hu-hariri teyanğurí. ^w 5:16 "yuqa pusú" ηuko sambo simó ηunde qembe, quko Anutu koro sanğiri tero unipare rowore yereyotengo. ^x 5:17 "o qa-qa unindoro tapá uni" ηundo Ya Surumímo hu-hariri sopo ronda-ronda huru-huru owí muko, "Sanedrin," ye nekoyangurí ηu sopoyaró. ^y 5:17 "Sadyusi uni" ηuko unindoro huru-huru ka Israel mirako ηuno yanğurí. Eneko wondo uni kumi owéye parámi tero unipare soso sopo yereyanğurí. ^z 5:18 "asá yerewí uni" ηuko Yesuko rokó yerero asá yirini eneğo khoyó tanğurí. ^a 5:19 "sambo simó" ηuko komo suki-suki Anutuko unipare kama yorini tunoqi sambo simó yondowaró. Ko itaka eneğo sunará teyotengo. ^b 5:20 "Ya Surumí" ηuko Anutu koro ya qu, ηunoko Juda unipareto Anutu koya huruwowero quro hu-hariri teyanğurí.

mande rondaqe unipare yunoyotenggo.”²⁶ Njunde njuro Ya Surumímboro sopo-sopo uni njuya kumba tukuni njuya uyaro asá yerewí uni njuro yore mahengurí. Quko mondó ta yondowaŋgurí, dokoro unipareto wondo raŋo nurowaŋgo, ye sorangurí.

Asá yerewí unindo uni pará-pará toŋeyemo mande yesowaŋgurí

²⁷Asa yore mahero Sanedrin^c huru-huru uni toŋeyemo yorotaŋgurí. Ko o qa-qa unindoro tapá uni njundo njande yimiraró,²⁸ “Norendo komo njande yero kusi yeretowó, ye uni njaro owímo mande rondaqe unipare ma yunowero. Quko watí-watí yeyuri mandeye njundo Yerusalem maŋgorete. Ko uni njuro khumaró njuro potó njuro nore nunowero njuro kondé ye inoyotenggo.”

²⁹Ko Pita koya asá yerewí uni kumimboya mande topé njande yaŋgurí, “Norendo Anutu koro mandí howeyoteto, unindoro mandeye kini. ³⁰Yendo Yesu rero te kano poroworo uri khumaró njuro. Ko usisambananimboru Anutu njundo okokowoní pitu ko otoqaró. ³¹Anutuko re oro kandí kondéwore rotoro owé parámi inoní noreŋgo kembénani tunoqaró. Njunde tunoqero nore rambaruru koŋgo noreweya. Njunde tunoqiní Israel unindo newonde rohoré tiqo, quhuriye se rotoweya. ³²Ko nore o soso njuro qenetowó njuro mande yesowoyoteto. Ko Yuqa Surumí njuya njuro yesowoyote. Anutuko Yuqa njuro re unipare mandí howeyotenggo njuro yunoyote.”

Gamalielko uni pará-pará iŋo-iŋo mande yunaró

³³Njunde yi Sanedrin^d huru-huru uni njundo saŋgirí tero yurato khumowaŋgo yaŋgurí. ³⁴Quko Sanedrin koro uni ka, Farisi uni ka,^e owí Gamaliel, njundo otoqo kaŋaró. Njuko hutuŋgo mande njuro rondaqe-rondaqe uni, ko unipareto ará te inaŋgurí. Asa yimironí asá yerewí uni soŋga wosoro mirako uŋgurí. ³⁵Uyiqo, enendo huru-huru njuro njande yimiraró, “Ye Israel uni, ye oka unino teweroqo meté inoroqota. ³⁶Qeni, soŋga komo quno njuno uni njuro owí Teutasko otoqoro yaró, ‘No owéne moré,’ yini uni 400 njunde uyare howeyaŋgo. Quko wiri yerete uni njundo uroní khumoní topé-topé sore wisikaraŋoro o taŋgurí njuro roti kina umburó. ³⁷Tukú wiri yerete unindo unipare owéye nakayáŋowero mande kondé yaró quno, njuno uni ka owí Jutas, Galili noŋgo uni njundo otoqoro unipare kumi iŋo-iŋoye wosoní otoqoro kuma taŋgurí. Wiri yerete uni

^c 5:27 “Sanedrin ” njuko uni kembé-kembémboro huru-huru ka. Enendo Anutu koro *hutuŋgo mande* sopo Juda unipare sopo yereyaŋgo. ^d 5:33 “Sanedrin ” njuko uni kembé-kembémboro huru-huru ka. Enendo Anutu koro *hutuŋgo mande* sopo Juda unipare sopo yereyaŋgo. ^e 5:34 “Farisi uni ” njuko unindoro huru-huru ka Israel mirako njuno yaŋgurí. Enendo Anutu koro *hutuŋgo mande* njuro okeyá ta howero uniparetoro toŋeyemo owéye parámi taŋgurí.

ɲundo uni ɲuya uroní khumaró, ko eneɲo uniyó soso wisikaraɲaɲɲurí. ³⁸Asa itaka nondo ye yimiroteno, uni yondowoteɲgo ɲu yorotika kina yowaɲgo. Dokoro o teyoteɲgo ɲuko unindoro iɲo-iɲo ɲu naɲge howeyote tiníqo, kina umbuweya. ³⁹Quko o teyoteɲgo ɲuko Anutu koro iɲo-iɲo howeyote tiníqo, yendo kusi yerewero mepémo kini. Ye yate Anutu koya kuma tewɲgo koro.” ɲunde yiníqo, eneɲo mandí howewero mande kusiyaɲɲurí.

⁴⁰Asa asá yerewí uni ɲu neko yerero yore haususu yerero Yesu owímo mande ma yeyowero yero yoroti toɲeɲɲurí. ⁴¹ɲunde ɲuro Sanedrin huru-huru ɲu yorotoro mirako uro niɲgu-niɲgu taɲɲurí. Dokoro Anutuko iɲo yunoro rokó yiriní Yesu owí riqo, unindo eneɲo owéyari ri umburó. ⁴²Kowe naru rokóɲoro yayemo ɲuno ko Anutu koro Ya Surumímo^f ɲuno ene unipare mande rondaqe yunoro miti mande ɲande yesowoyaɲgo, ko Kristo ɲuko^g Yesu naɲge.

Samaka-samaka uni kande saɲiyoro irisa qu rokó yereɲɲurí

6 ¹ɲu naruko ɲuno iɲo-iɲo rewero unipare qambu^h tunoqaɲɲurí. ɲunde ti kumi Grik mande yeyango qundo kumi Hibru mande yeyango quya kisikasa mande ka yaɲɲurí. ɲande yaɲɲurí, “Ko yendo o qoyembo unipare yunoyoteɲgo quno ɲuno noreɲo wapu ɲundo o kama siyoyoteɲgo,” yaɲɲurí. ²Asa ko asá yerewí uniⁱ 12 ɲundo iɲo-iɲo rewero unipare soso neko yiri mahi ɲande yimirɲurí, “Asa nore Anutu koro mande yesowowero kho qu rotoro o qoyembo rondaqe yunowero kho tewato tiníqo, ɲu meté kini. ³ɲunde ɲuro, uni topo, uni kande saɲiyoro irisa keweroyemo ɲano qu seqa yiri, ɲu owéye unipare toɲeyemo meté yote qu, ko iɲo-iɲoye meté qu, ko Yuqako ɲu quroko yote qu. Norendo kho ɲu yunato sopowaɲgo. ⁴Noreɲombo kho tero hariri tero Anutu koro mande qu yesowoyowato.”

⁵ɲunde yiɲo, ɲuro metéɲaɲɲurí. Asa Stiven rokóɲaɲɲurí, ɲuko iɲondutuyó kondé, ko Yuqa Surumímbo ɲuno maɲgoreyara. Uni meyowo rokó yereɲɲurí ɲuko ɲandiro: Filip, Prokorus, Nikanor, Timon, Paremenas ko Nikolas. Nikolas ɲuko uni wini meyowo^j Antiok yendé moɲgo qu, enendo Juda koro muriye howeyara. ⁶Asa enendo uni ɲu rokó yerero yoroti kaɲi asá yerewí uni ɲundo hariri tero kandeye saɲayemo raɲɲurí.

^f 5:42 “Ya Surumí” ɲuko Anutu koro ya qu, ɲunoko Juda unipareto Anutu koya huruwowero quro hu-hariri teyaɲɲurí. ^g 5:42 “Kristo” ɲuko Anutuko rokóɲoní mahero wiri yerete uni parámi horé tunoqaró ɲu. ^h 6:1 “iɲo-iɲo rewero unipare” ɲunde qundo rondaqe-rondaqe unindoya uyaro iɲo-iɲo yunoyaró. ⁱ 6:2 “asá yerewí uni” ɲuko Yesuko rokó yerero asá yiriní eneɲo khoyó taɲɲurí. ^j 6:5 “uni wini meyowo” ɲunde quko Juda unipare kini qu naɲge.

⁷Ko Anutu koro mande qu usaye toŋeró. Toŋiní unipare qambu Yerusalem ŋuno iŋo-iŋo rewero unipare tunoqanŋurí. Ko o qa-qa uni^k kumi ŋuya iŋondutuwoyanŋurí.

Unindo Stiven mande kho inanŋurí

⁸Asa Anutuko samaka-samaka tuwó koya wimbu koya Stiven inoní o wimbí moré^l enesó-enesó unipare keweroyemo teyaró. ⁹Ŋunde tiní uni kumimbo otoqoro Stiven koya mande sanŋirí teyanŋo. Ŋu uni ŋuko Juda koro huru-huru ya^m kanata noŋgo qu, huru-huru ya ŋu ŋande ye nekoyanŋurí, “Uni Oroso yerenŋurí qu,”ⁿ yanŋurí. Uni ŋuko Sairin yendé, Aleksandria yendé, Silisia mira ko Esia mira koŋgo qu. ¹⁰Mande sanŋirí eneya yanŋurí, quko mandeyembo eneŋo iŋo-iŋoyó ŋuya Yuqapo mandí yaró ŋuya takawero mepémo kini.

¹¹Asa sanŋirí ŋundo kota-kota uni siyoro iŋo-iŋo ka yunoyi Stiven ŋuro ŋande yanŋurí, “Enendo Moses^o koya Anutu koya yesará yiriní nore iŋatowó.”

¹²Ŋundiro nanŋe enendo uniparetoya uni kembé-kembéyemboya hutuŋo mande ŋuro iŋo-iŋo unindoya newondeye ri otoqoní Stiven kondé toworo Sanedrin^p huru-huruko ŋuno re mahenŋurí. ¹³Re mahero kota-kota uni ŋu ŋuya yore yoroti kaŋero ŋande yanŋurí, “Uni ŋando Ya Surumímboya^q hutuŋo mande^r ŋuya huwó mande suki-suki yeyote. ¹⁴Yiní ŋande iŋatowó, ‘Yesu, Nasaret noŋgo uni ŋundo ya ŋu rambaruruworo Mosesko otete nunaró ŋu rohoréŋoweya.’”

¹⁵Uni soso huru-huruko ŋuno kunditanŋurí ŋundo Stiven kondé toŋete qenenŋurí, ko umu-kembé qenenŋurí muko sambo simó^s umu-kembé qembe taró.

^k 6:7 “o qa-qa uni ” ŋundo *Ya Surumímo* Anutu koro kho tero uniparetoro quhuriye rotowero quro *wondo yakutímo* ŋuno o qa-qa te inanŋurí. ^l 6:8 “o wimbí moré ” ŋuko o enesó-enesó tunoqiní Anutu koro wimbí ŋunde tunomo yoweya. ^m 6:9 “huru-huru ya ” ŋuko Juda uniparetoro ya parámi mu. *Sapat naruko* ŋuno hu-hariri tero Anutu koro mandí weyoyi iŋoro hariri teyanŋurí. ⁿ 6:9 “Uni Oroso yerenŋurí qu” - ŋuko Juda uni kumi komo meyowomboro kho simó teyate uni parámiyembo oroso yerenŋurí qu nanŋe. ^o 6:11 Komo suki “Mosesko ” uni parámi tero Israel unipare sopo yereró. Anutuko *Sainai purímo hutuŋo mande* inoní mande ŋu rondaŋe unipare yunaró. ^p 6:12 “*Sanedrin* ” ŋuko uni kembé-kembémboro huru-huru ka. Enendo Anutu koro *hutuŋo mande* sopro Juda unipare sopo yerayanŋo. ^q 6:13 “*Ya Surumí* ” ŋuko Anutu koro ya qu, ŋunoko Juda unipareto Anutu koya huruwowero quro hu-hariri teyanŋurí. ^r 6:13 “*hutuŋo mande* ” ŋuko komo suki Anutuko *Sainai purímo Moses* inoní Israel unipare yunaró. Mande ŋuko Juda uniparetoro yoto-yotoye soso sopoyaró. ^s 6:15 “*sambo simó* ” ŋuko komo suki-suki Anutuko unipare kama yoriní tunoqi sambo simó yondowaró. Ko itaka eneŋo sunaró teyotenggo.

Stivenko uni pará-pará tojeyemo mande yesowaró

7 ¹Asa o qa-qa unindoro tapá uni^t nundo njande yaró, “Mande yetenjo gumbe hamómbe ma kini?”

²Yini Stivenko njande yaró, “Uni topo, awa okite, injoyi. Komo Anutu meté horé nundo Abrahamko tunoqaró. Iju naruko nuno Abraham Mesopotemia mirako nuno watí yora, Haran yendémo kama oró. ³Asa tunoqero njande miraró, ‘Ke mirake, topoke yorotoro mira ka witú kerewano quno nuno toje qembe,’ yaró.

⁴“Asa ko Abraham Kalitia mira ju rotororo Haran oró. Imemojgo iwí khumoní Anutuko riní na mira ye itaka njan yotenjo njan maheró. ⁵Rini mahero mira tomó karo simburí kama taró, ko simó moré kini taró. Quko Anutuko mande kusiyoro njande miraró, ‘Keya sowekepoya mira parámi njan simburí tunoqewango.’ ⁶Yero njande yaró, ‘Kejo soweke uni meyowomboro mirako yotoro kasirayemo yurigo, kumima naru 400 quroko o piyimi te yunowango. ⁷Imemojgo nondo unipareto o piyimi te yunowango njuro yore ronda yerewe sowekepo mira ju roto tojoro mahero na mirako njan potoruku te nunowango.’ ⁸Ko Anutuko Abraham koya mande kondé ka kusiyoro koweye tojowero murí ju inaró. Ijundiro nanje Abrahamko Aisak pisiyoro naru kande sanjyoro kapusa njunde kini tini kowí tojaró. Ko Aisakiko Yakop pisiyoro njunde nanje te inaró, ko Yakopko usi-sinani 12 ju pisi yerero njunde nanje te yunaró.

⁹“Asa usi-sí nundo koneye Josep koro newonde tutu tero towo roti uni kato kimoro Isip nuno ungurí. Quko Anutuko nuno eneya yotoro ¹⁰quhurí soso korowaró ju nonjo rero samakanaró. Samakanjoro injo-injo meté horé inoní Isip koro wiri yerete uni, “Pero,” ye nekanjurí, nundo Josep njuro metéjoro riní Isip mira koya wiri yerete unindoro suwisawiyó soso koro uni kembéye yora.

¹¹“Imemojgo korare Isip koya Kenan mirako nuno tunoqini unipareto quhurí parámi korowanjurí, ko usi-sinani o newero qu seqaro qenewero mepémo kini. ¹²Asa Yakopko o newero qu Isip nuno yote ju injoro naru koretero norejo usi-sinani asá yirini ungurí. ¹³Ko naru irisayómo nuno ungurí quno nuno Josepko tunomo topé-topé yimiraró, ‘No Josep.’ Ijunde njuro Peroko Josep koro wini quro injaró. ¹⁴Asa Josepko iwí Yakop koya suwisawiyómboya soso ju mahewango, yero neko yereró. Ijuko unipare 75 njundiro. ¹⁵Nekoní Yakop Isip nuno uró. Yate-yate eneya usi-sinani soso njuya khumiyo, ¹⁶ukúye yorero pitu Sekem yendémo onjurí. Komo Abrahamko wondo silwa kumi Hamor soweyó yunoro uni tapu ka Sekem nuno kimaró. Asa uni tapu nuno soso tapu yerengurí.

^t 7:1 “o qa-qa unindoro tapá uni ” nundo *Ya Surumímo* hu-hariri soporo ronda-ronda huru-huru owí muko, “*Sanedrin* ,” ye nekoyangurí ju sopoyaró.

17“Komo Anutuko Isip rotowero naru karo mande kusiyoro Abraham miraró. Asa naru ŋu kutaqe mahiní usi-sinani qambu tero Isip mira ŋu maŋgoraŋguri. 18Ko yate-yate wiri yerete uni ka Isip ŋuno tunoqaró, ŋuko Josep ŋuro kama iŋaró. 19Uni ŋundo usi-sinani kaná yerero o piyimi te yunoro kondé yimiraró, oŋa pisiyoteŋgo ŋu se sikuno yorotika khumoyi, yaró.

20“Ŋu naruko ŋuno Moses nimímbo pisiyaró, ko ŋuko simó meté horé. Iwí-nimímbo yano sopoyori kombo kapusa kini tiní 21rero sikuno rotariyó. Ŋunde rotori Pero koro nambunímbo simó ŋu rero ene naŋuni qembe sopoyaró. 22Sopoyoní Mosesko Isip koro iŋo-iŋo ŋu soso reyara. Ko ŋuko mande yewero wimbí rero kho kondé teyara.

23“Asa Mosesko kumima naruyó 40 ŋunde kini tiní eneŋo topé-topé Israel yiyowero iŋaró. 24Uyariní Isip uni kato Israel uni ka roworemoyaró. Mosesko ŋu qenero Israel uni ŋu samakaŋoro Isip uni o piyimi te inoyaró ŋu uroní khumaró. 25Ŋunde tero ŋande iŋaró, uni topémbo ŋande iŋoyi tondaŋeweya, ‘Anutuko Moses kandímbo nore rambaruru koŋgo yoreweya.’ Ŋunde iŋaró, quko topé-topémbo kama iŋoyi tondaŋaró. 26Asa ita saraŋoníqo, uni topé irisa kuma tariyó ŋu yiyoro mepa mande ŋande yaró, ‘Yarikaŋge ŋunde ma tewero. Do karo yariŋombo naŋge roworemoyotiri?’

27“Uni ŋu topé roworemoyaró ŋundo Moses pitoro ŋande yaró, ‘Ke dando koriní nore wiri nerero ronda nerewero tete? 28Keto suwo Isip uni ŋu uri khuma ŋunde naŋge nombe nurowero tete?’ 29Ŋunde yiní Moses sore toŋero mira meyowo, Mitian mirako, ŋuno kunditero, yate naŋo-simó irisa pisi yereró.

30“Asa imemoŋgo kumima naru 40 ŋunde kini tiní, sambo simó^u kato mira wimbímo Sainai purí kutaqemo ŋuno te kunzi qayara quno ŋuno eneno tunoqaró. 31Tunoqiní Mosesko iŋondata parámi tero qenewero woso uyaro Uni Parámimboro maŋgó iŋoní ŋande yaró, 32‘No keŋo usiŋgeporo Anutuye, asa Abraham, Aisak, Yakop koro Anutuye,’ yaró. Ŋunde yiní Moses iŋoro yukuworo qenewero sasaro taró.

33“Asa Uni Parámimbo ŋande miraró, ‘Khe punu-punu khengemo ŋu se roto. Ke mira ŋano kaŋeyote ŋako surumí. 34No uniparene Isip yoteŋgo ŋu quhurí korowoyoteŋgo ŋu hamó yiyoyoteno. No tendoye iŋoyoteno, ko itaka oroso yerewero koro umbuteno. Asa otoqoka koreweka Isip u.’

35“Ŋu Moses ŋuko, komo unindo huwóŋoro ŋande yaŋguri, ‘Ke dando koriní nore wiri nerero ronda nerewero tete?’ Asa uni ŋu naŋge, sambo simó te kunziko tunoqaró quno ŋuno Anutuko asáŋoní wiri yerete uni tero unipare kimo yerewero uni^v tunoqaró. 36Enendo unipare yore oro o

^u 7:30 “*sambo simó*” ŋuko komo suki-suki Anutuko unipare kama yoriní tunoqi sambo simó yondowaró. Ko itaka eneŋo sunará teyoteŋgo. ^v 7:35 “*kimo yerewero*” ŋuro murí muko ŋandiro: unipareto o piyimi kusuyoyómo kusiyowí yoteŋgo. Ŋundiro naŋge Anutuko kimo tero yoriní kina yowango.

wimbí moré^w enesó-enesó Isip ηuno taró, ko windi mandumimo taró, ko mira wimbímo kumima naru 40 quroko ηunde taró.

37“ηu Moses ηundo Israel unipare ηande yimiraró, ‘Anutuko ye keweroye moηgo ka riní ye-ye uni ka no qembe tunoqeweya.’ 38 Enendo uniparetoro huru-huru keweroko mira wimbímo yora, ko sambo simó Sainai mira purímo miraró koya noreηo usi-sinanimboya kewero uni tunoqaró. Enendo yoto-yoto koro mande qu ηu rero nore nunaró.

39“Quko usi-sinani muko mandí inowero piyimiηangurí. Kini, ηunde pitoro newondeye rohoréηoro Isip koro qene nungu tero 40 Aron ηande mirangurí, ‘Keto noreηo anutunani kumi yondowoka korete uyari yohowewato. Dokoro Moses ηando nore Isip noηgo nore ηano maheró, ηu dana u, nore kama inoteto,’ yangurí. 41 ηu naruko ηuno makao simó kapí-kapí ka toworo anutu kota-kota koro o qa-qa tero oka towangurí ηuro niηgu-ningu tero hoho teyanggo. 42 ηunde tiqo, Anutuko huwó yiriní o kondé kumi samboko yote ηuro potoruku te yunangurí. Kako komo suki ye-ye unindoro sokomeko o ηuro mande ka ηande nakayáηangurí,

“Ye Israel koro wini qu,
komo ye kumima naru 40 ηunde mira wimbímo ηuno yotoro
o qa-qa enesó-enesó no kama te nunangurí, hamómbe?

43 Kini, ye Molok koro tuwi yamaru ηu re hokoro
yeηo anutuye Repan koro tutu ηuya re hokangurí.

ηu kapo-kapo towangurí ηu ye potoruku te inoyangurí.
Asa ko nondo ye yohowewe Bapilon amuno uwango.’

44“Asa usi-sinanimbo Anutuko hutuηo mande yunaró ηuro tuwi yamaru ka rangurí. Anutuko ya ηuro kapo-kapo Moses witúηoro, ‘ηandiro nanje re qembe,’ ye mironí ηunde tangurí. 45 Ko yate-yate Anutuko mira ηaro simburí enesó-enesó ηu yohowiní usisambananimboya Josua koya tuwi yamaru ηu re mahangurí. ηano yuri, yate-yate Dewit^x tunoqaró. 46 Tunoqiní Anutuko ηuro metéηoní Dewitko Yakop^y koro Anutu quro ya hamó ka rewero hariri taró. 47 Quko Solomonko ya ηu raró.

48“ηunde raró, quko Anutu Koreko Horé yote ηundo uni ya reyoteηgo quno ηuno kama yote. Hamó, ye-ye uni^z kato ηande yaró,

49“Uni Parámimbo ηande yete,
‘Sambo ηuko neneηo yakutí kunditewero qu

^w 7:36 “o wimbí moré ” ηuko o enesó-enesó tunoqiní Anutu koro wimbí ηunde tunomo yoweya. ^x 7:45 “Dewit ” - komo suki Dewitko Israel uniparetoro wiri yerete uni taró. Anutuko Dewit kondé ino inaró, ko yate-yate Israel unipare ηuyako Dewit kondé ino inangurí. ^y 7:46 “Yakop ” ηuko Juda uniparetoro pukoye, owí kako “Israel”. ^z 7:48 “ye-ye uni ” ηuko Anutuko mandí yunoní unipare yunangurí.

ko noko ŋuko khene re ŋuno kheteyoteno.

Do ya kiraró ka neneŋo rewango,
ko dano kunditero imaŋewano?

⁵⁰ Neneŋo kandenembo o soso towanowó, hamómbe?”^a

⁵¹ Asa ŋunde yero Stivenko ŋande yaró, “Yeko mande wenda-wenda uni. Yeŋo newondeye, kusumboye muko kape uni ŋunde qembe.^b Ye naru rokóŋoro usisambaye ŋunde qembe tero Yuqa Surumímboya kuma teyoteŋgo. ⁵² Do ye-ye uni ka yora, asa usisambayembo o piyimi kama te yunaŋurí? Ko ye-ye uni kato uni roneneŋowí maheweya ŋuro yesowaŋurí, ŋu ŋuya usisambato yuri khumaŋurí. Ko itaka yendo uni roneneŋowí ŋu turiri re inoyi uri khumaró. ⁵³ Yeko Anutu koro hutuŋo mandeyó^c sambo simó kandeye moŋgo raŋurí, quko ye ŋu kama howeyoteŋgo.”

Wondopo Stiven uraŋurí

⁵⁴ Asa uni pará-parámbo mande soso ŋu iŋoro saŋgírí parámi tero Stiven genero metoye kindotaŋurí. ⁵⁵ Quko Yuqa Surumímbo Stiven quroko maŋgoriní, sambo saŋano kondé toŋetero Anutu koro sine parámi genero, Yesu ŋuya Anutu koro kandí kondésina kaŋeyoní genero ⁵⁶ ŋande yaró, “Qeni! Sambo kosoní Unindoro Naŋuní Anutu koro kandí kondésina kaŋiní qeneteno.”

⁵⁷ ŋunde yiniqo, kondé piyimi nekoro kusumboye wisumuŋoro otoqoro Stivenko kopo kheŋgeŋoro ⁵⁸ toworo yendé hoŋgo andusina roti umbuní wondo raŋo utoyango. Ko uni ene o piyimi taró ŋuro yesowaŋurí ŋundo kowe punu-punu piruye^d se rotoro se simó keta, owí Sol, ŋuro khímo raŋurí.

⁵⁹ Wondopo utoyuriqo, Stiven ŋande hariri taró, “Uni Parámi Yesu, yuqane re!” ⁶⁰ Ko potoruku rero kondé ŋande nekaró, “Uni Parámi, keto quhurí ŋaro topé ma te yunowero.” ŋunde yero ete khumaró.

8 ¹ Ko Stiven uri khumaró quno ŋuno Solko genero ŋuro metéŋoyaró.

Anutu koro huru-huru ŋundo quhurí koroworo wisikaraŋaŋurí

ŋu naruko ŋuno Yerusalem ŋuno unindo saŋgírí tero hurí rero iŋondutu koro huru-huru ŋu o pi-piyimi te yunoyango. Asa ko soso sorero Judia mirako, Samaria mirako ŋuno wisikaraŋaŋurí. Asá yerewí uni ŋundo naŋge Yerusalem ŋuno yaŋurí. ² Uni kumi Anutu koro murí

^a 7:50 Aisaia 66:1-2 ^b 7:51 “kape uni ” ŋuko Israel koro Anutuye ŋu kama iŋo howeyoteŋgo. ^c 7:53 “hutuŋo mande ” ŋuko komo suki Anutuko Sainai purimo Moses inoní Israel unipare yunaró. Mande ŋuko Juda uniparetoro yoto-yotoye soso sopoyaró. ^d 7:58 “kowe punu-punu piru” ŋunde qu unipareto kowe punu-punuye meyowo weheŋoyangoŋurí.

howeyango ñu Stiven re tapuñoro tendo parámi tanğurí. ³Quko Solko iñondutu koro huru-huru ñu rambaruru yereyara. Enendo yayemo oro uni ñuya pare ñuya yowosoro uro kusi-kusi yano yorotaró.

Filipko Samaria mirako ñuno mande yesowaró

⁴Asa unipare ñu sorero wisikaraño uyaro yendé enemo-enemo toñero miti mande^e yesowanğurí. ⁵Filipko Samaria mirako^f ñuno yendé kano uro ñu Kristo ñuro^g yesoworo yimiraró. ⁶Yimitoro o wimbí moré^h tiní unipare qambu qundo kondé toñetero mandí yaró ñuro kusumbo ranğurí. ⁷Dokoro enendo yuqa pusúⁱ qambu uni quroyemo yanğurí ñu yohowiní kondé kiwero yorotoro toñenğurí. Ko uni qambu wimbuye khumaró, ko kheye piyimi mu, ñu yoriní meté tanğurí. ⁸Ñunde ñuro yendémo ñuno niñgu-niñgu parámi tanğurí.

Saimon, ñu o wimbí moré piyimi mu teyara uni ñuro sowo mande qu

⁹Uni ka ñu yendémo ñuno yaró, owí Saimon. Enendo o wimbí moré piyimi kumi teyoní Samaria unipareto qenero newondeye uroní niñgu-niñgu teyanğurí. Ko eneño owí hokoyanğurí. ¹⁰Unipare owéye moré mu ko owéye moré kini qu ñu soso mandí iñoro ñande yanğurí, “Uni ñako Anutu koro wimbí parámi qu reyote.” ¹¹Ñunde yanğurí, dokoro naru piru ñundiro o wimbí moré ñu teyoní newondeye uraró. ¹²Quko Filipko Anutuko unipareyó wiri yereyote naruyó^j ko Yesu Kristo owí ñuro miti mande qu yesowaró quno ñuno uni ñuya pare ñuya iñondutu tero sono ranğurí. ¹³Ko Saimon ñuya iñondutu tero sono raró. Enendo Filip koya uyaro Filipko o wimbí moré parámi teyaró qu qenero newondí uroní niñgu-niñgu taró.

¹⁴Asá yerewí uni^k Yerusalem ñuno yotoro mande piña ñande iñanğurí, asa Samaria uni Anutu koro mande qu ranğurí. Asa ñunde iñoro Pita koya Jon koya asá yiri eneno uriyó. ¹⁵Uro Yuqa Surumí sañayemo umbuweya ñuro hariri tariyó. ¹⁶Dokoro Uni Parámi Yesu owímo sono ranğurí nanğe, Yuqa ñundo keweroyemo ka sañano kama umburó. ¹⁷Asa kandeyari sañayemo riri, Yuqa ranğurí.

^e 8:4 “miti mande ” ñuko Anutuko Kristo asáñoní khumoro quhurínanimboró kimo tiní Anutu koya newonde kanata tewero ñuro mande meté mu nanğe. ^f 8:5 “Samaria mira ” ñuko Judía mira koya Galili mira koya keweroyarimo yora. Komo suki wini kato mira meyowo moñgo mahero ñuno kunditeyanğurí. Narune-narune Samaria koya Juda keweroyemo sañgirí tanğurí. ^g 8:5 “Kristo ” ñuko Yesu nanğe, asa Anutuko rokóñoní mahero wiri yerete uni parámi horé tunoqaró ñu. ^h 8:6 “o wimbí moré ” ñuko o enesó-enesó tunoqiní Anutu koro wimbí ñunde tunomo yoweya. ⁱ 8:7 “yuqa pusú ” ñuko sambo simó ñunde qembe, quko Anutu koro sañgirí tero unipare rowore yereyotengo. ^j 8:12 “Anutuko unipareyó wiri yereyote naruyómo ” ñuno iñondutu unipareko hamó Anutu kusunoyómo yowanğo. ^k 8:14 “asá yerewí uni ” ñuko Yesuko rokó yerero asá yiriní eneño khayó tanğurí.

¹⁸Asa Saimonko asá yerewí uni irisa ñu yiyoní kandeyari unipare sajayemo riri Yuqa rangurí. Ñunde ñuro wondo yunowero tero ñande yaró, ¹⁹“Yarindo wimbu ñu ka re no ñuya nunorika no kandene rero uni ka sañano rewano ñuko Yuqa reweya.”

²⁰Yini Pitako ñande miraró, “Ke Anutu koro puriño kimowero quro iñote! Ñunde ñuro wondoke muko keñomboya piyo tewari! ²¹Keto mande yesowowero kho qu tewero mepémo kini, dokoro Anutu toñímo newondeke muko roneneñowí kini. ²²Ñunde ñuroko oteteke piyimi ñuro surumí tero newonde rohoré teya Uni Parámiwore hariri teka newondekemo o piyimi iñoyote ñuro quhurí ñu re rotoní. ²³Dokoro no ke kiyo iñoteno, ko keño newondeke piyo tiní quhurímbo kondé kusi kereyote.”

²⁴Ñunde yiniño, Saimonko mande topé ñande yaró, “Yari Uni Parámiwore hariri tirika no samaka niriní o piyimi ñuro yitiri ñuko nono kama tunoqini,” yaró.

²⁵Asa Yesu ñuro yero Uni Parámimboro mande qu yesowori kini tiní pitu ko Yerusalem oro yendéne-yendéne Samaria khewore miti mande¹ yesoworo oriyó.

Filipko Itiopia unino miti mande yesowaró

²⁶Asa Uni Parámimboro sambo simómbom^m Filip ñande miraró, “Otoqoya khe Yerusalem rotoro Gasa yendémo ñuno uyote ñuwore u.” Khe ñuko mira wimbíwore uyote. ²⁷Asa yini Filip otoqoro toñeró. Kheko ñuno Itiopia mira koro uni ka qeneró. Ñuko Itiopia koro wiri yerete pare, Kandake,ⁿ ñuro kho uniyó ka. Enendo onoñoyó soso sopoyaró. Komo potoruku te inowero quro Yerusalem oní ²⁸kini tiní rohoréñoro uyaró. Uyaro karis sañano kunditero ye-ye uni^o Aisaia koro sokome qu weyaró. ²⁹Asa Yuqako Filip miraró, “Uyareya karis ñuro tañgímo u.”

³⁰Ñunde yini kheñeñoro uyariniⁿ uni ñundo ye-ye unindoro sokome qu weyoní iñaró. Filipko yaró, “Kepe mande ñuro murí ñumbe iñotepe ma kini?”

³¹Yini ñande yaró, “Uni kato no kama witú nereweya tiniño, ñu date iñowano?” yero ñande miraró, “Are noya kundite.”

³²Mande sokome quroko qu weyaró ñuko ñandiro,

“Sipsip urowero ñunde qembe,

¹ 8:25 “*miti mande*” ñuko Anutuko *Kristo* asáñoní khumoro quhurínanimboro kimo tiní Anutu koya newonde kanata tewero ñuro mande meté mu nanje. ^m 8:26 “*sambo simó*” ñuko komo suki-suki Anutuko unipare kama yoriniⁿ tunoqi sambo simó yondowaró. Ko itaka eneño sunará teyotengo. ⁿ 8:27 “Kandake” ñuko Itiopia mira koro wiri yerete pare soso quro owé ka. ^o 8:28 “*ye-ye uni*” ñuko Anutuko mandí yunoní unipare yunangurí.

sipsip simó huí tojowero qembe,
enendo mondó ta nanje yora.

³³ Unindo ri umbuní murí piyimiwore rondaŋangurí.

Danimbo enejo soweyómboro yeweya?

Dokoro noko nonjo yoto-yotoyó re rotangurí.”

³⁴ Sopo-sopo uni ŋundo Filip ŋande miraró, “Meté, yeka iŋowe. Ye-ye uni ŋundo dani karo mande ŋa yaró? Ŋumbe enejomboro yarómba ma uni meyowomboro yaró?” ³⁵ Yiníqo, Filipko hurí rero ŋu mande ŋuro murí yero Yesu koro miti mande^p ŋu yesowaró.

³⁶ Asa khe ŋuno uyareyate sopo-sopo uni ŋundo sono ka qenero ŋande yaró, “Qeno, sono ŋa. Do kato kusi niriní no sono kama rewanó?” ^{37(-)q} ³⁸ Asa, yini karis kaŋiní Filip koya sopo-sopo uni ŋuya sonono uro Filipko uni ŋu sono re inaró. ³⁹ Sono roto ariní waka ta Uni Parámimboró Yuqa qundo Filip riní toŋeró. Toŋiní sopo-sopo uni ŋu pitu ko kama qeneró. Ko niŋgu-ningu tero khe ŋu howe uró. ⁴⁰ Quko Filip Asotus yendémo ŋuno tunoqaró. Ko yendé enemo-enemo uro miti mande yesowoyara, yate Sisaria yendémo ŋuno uró.

Sol newonde rohoré taró

9 ¹ Asa Solko Uni Parámimboró iŋo-iŋo rewero uni^r yuroweka khumoyi yeyara. Ŋunde tero enendo o qa-qa unindoro tapá unino^s uyaro ² sokome karo kirayaró. Juda unindo Damaskus yendé parámimo ŋuno sokome ŋu qenero wimbu Sol inoyi unindoya paretoya Khe ŋu^t howeyanjo ŋu kondé yondoworo se Yerusalem owanjo. ³ Asa sokome ŋu rero uyariní Damaskus kutaqemo ŋuno hiyó kondé ka sambo koŋgo eneno ŋuno umburó. ⁴ Umbuní Sol kina nokono umbu raŋoro maŋgo ka iŋoní ŋande yaró, “Sol, Sol, do karo ke no rowore nereyote?”

⁵ Ko Solko yaró, “Uni parámi, ke dani?”

Yini ŋande yaró, “No Yesu. Ke no rowore nereyote. ⁶ Quko otoqoya yendé quroko oyo. Imemongoko uni kato ke o teweya ŋuro kimiroweya.”

⁷ Uni Sol koya uyareŋgurí ŋuno qu yukuworo mande yewero rukusuwanŋurí. Mande ŋu iŋangurí, quko uni ka kama qeneŋgurí. ⁸ Asa

^p **8:35** “*miti mande*” ŋuko Anutuko *Kristo* asáŋoní khumoro quhurínanimboró kimo tiní Anutu koya newonde kanata tewero ŋuro mande meté mu nanje. ^q **8:37** Komo suki Lukiko mande soso ŋa nakayáŋaró, ko imemongo uni kato mande kaŋuya nakayáŋoro sowe taró. Kowe sokome kumimboko mande ŋu wini 37 rokóŋoyotenjo. Mande ŋuko ŋandiro: Yini Filipko ŋande yaró, “Kepe newondekepo soso iŋondutu tiníqo, soso meté ŋundiro reweya,” yaró. Yini sopo-sopo uni ŋundo mande topé ŋande yaró, “No ŋande iŋondutu teyoteno, ko Yesu Kristo ŋuko Anutu koro Naŋuní,” yaró. ^r **9:1** “*iŋo-iŋo rewero uni*” ŋunde qundo rondaqe-rondaqe unindoya uyaro iŋo-iŋo yunoyaró. ^s **9:1** “*o qa-qa unindoro tapá uni*” ŋundo *Ya Surumímo* hu-hariri sopo ronda-ronda huru-huru owí muko, “*Sanedrin*,” ye nekoyanŋurí ŋu sopoyaró. ^t **9:2** “Khe” ŋuko murí keta qu iŋondutu unipareto howeyanŋurí.

Sol otoqo toñetaró, quko toñí huriri taró. Ñunde tiní kandímo toworo Damaskus yendémo oñgurí. ⁹Kosa naru kapusa ñunde toñí huriri tiní o, sono kama neyara.

¹⁰Iño-iño rewero uni ka Damaskus ñuno yora, owí muko Ananaias. Asa Uni Parámimbo quko owí nekoro ñande yaró, “Ananaias.”

Yiní ñande yaró, “Uni Parámi, no yoteno,” yaró.

¹¹Uni Parámimbo ñande miraró, “Uni kako owí Jutas, yendémboro khe ñu, “Roneneñowí,” ye nekoyotenge qu, ñuno yote. Asa otoqoya ya ñu seqa uyareya uni ka Tarsus yendé moñgo owí Sol ñuro osese te qeno qembe. Itaka hariri tero yorote. ¹²Toñí muko huriri tete. Quko ñuno uni ka qene, owí muko Ananaias, ñu arero kandí toñímo ra. Ñunde tiní toñí meté tero toñeta.”

¹³Ananaiasko mande topé ñande yaró, “Uni Parámi, no iñoteno, quko uni ñuro mande parámi yetenge, otete piyimi enesó-enesó keño unipareke meté horémboya” Yerusalem ñuno te yunoyara. ¹⁴Ko o qa-qa unindoro tapá uni ñundo wimbu inoyí, unipareke keño mande iñoro hariri teyotenge ñano qu kusi yereweya.”

¹⁵Uni Parámimbo ñande miraró, “Ke u. Neneñombo ene rokóñoro kho ka inano, ko enendo uni wini meywomboya,” wiri yerete unindoya, Israel uniparetoya toñeyemo neneño owéne ñuro yesowo yimiroweya.

¹⁶Hamó, do o quhurí ka neneñomboro korowoweya ñu ene witúñowano.”

¹⁷Asa Ananaias uyaro ya ñu quroko oro kandí re Sol sañano rero ñande miraró, “Topo Sol, ke kheko maheyuri Yesu keno tunoqaró, ñuko Uni Parámi, ko enendo no asá niriní keno areteno ña. No arewe toñenge meté tiní Yuqa Surumí qundo keno uya mañgoriní.” ¹⁸Ñunde yiní, waka ta oka soró qembe ka Sol toñí moñgo tondañe umbuní meté toñetero otoqoní sono re inaró. ¹⁹Ko o qímboro nero wimbu raró.

Solko Damaskus ñuno mande yesowaró

Asa Sol kosa naru kumimo iño-iño rewero unindoya Damaskus yendémo ñuno yorañgo. ²⁰Ñu naruko ñuno Juda uniparetoro huru-huru yayemo^w mande ñande yeyara, Yesu ñuko Anutu koro Nañuní, ye yesowoyara. ²¹Uni soso mandí iñoro yukuworo ñande yañgurí, “Komo uni ñundo unipare owé ñuwore hariri teyotenge ñu Yerusalem ñuno rambaruru yereyaró, ko itakako unipare ñunde qu kusi yerero o qa-qa unindoro tapá unin^xo ñuno se owero ñano maheró, hamómbe?” ²²Quko

^w 9:13 “unipare meté horé ” ñuko oteteye soso muko meté nange kini. Kini, owé ñu “unipare meté horé” ñuro murí muko ñandiro, “Anutu koro unipare” nange. ^x 9:15 “uni wini meyw^o ” ñunde quko Juda unipare kini qu nange. ^w 9:20 “huru-huru ya ” ñuko Juda uniparetoro ya parámi mu. *Sapat naruko* ñuno hu-hariri tero Anutu koro mandí weyoyi iñoro hariri teyañgurí. ^x 9:21 “o qa-qa unindoro tapá uni ” ñundo *Ya Surumímo* hu-hariri soporo ronda-ronda huru-huru owí muko, “Sanedrin ,” ye nekoyañgurí ñu sopoyaró.

Solko wimbu parámi tero Juda uni Damaskus yaŋgurí ŋu yorerero iŋo-iŋoye takaro ŋande witú yereró, ko Yesu ŋuko Kristo^y ŋu. Ŋunde yini mande topé tewero rukusuwaŋgurí.

²³Asa naru piru ta rotoníqo, Juda unindo koporo Sol uri khumowero quro mande kusiyangurí. ²⁴Quko Sol mande ŋuro iŋaró. Ko Juda unindo uri khumowero quro yendé ŋuro mako qu soso kosa suwo sopoyangurí. ²⁵Quko Sol koro iŋo-iŋo rewero unindo suwono ri tonŋo punge parámi quroko kunditini hoŋgo wituwore re rotoyí uró.

Sol Yerusalem oró

²⁶Asa Sol Yerusalem oro Yesu koro iŋo-iŋo rewero unindoya^z kopowero yero iŋaró. Quko uni ŋundo sasaro tero eneko iŋo-iŋo rewero uni ka tunoqaró ŋuro kama iŋangurí. ²⁷Quko Barnabasko Sol rero asá yerewí unino^a oro ŋande yimiraró, ko Solko kheko Uni Parámi qeniní mande ka miraró, ko Damaskus ŋuno wimbu rero Yesu owímo mande yesowoyaró. ²⁸Ŋunde ŋuro Sol eneya Yerusalem ŋuno yotoro uyare mahe tero wimbu rero Uni Parámimboro owímo mande yesowoyaró. ²⁹Enendo Juda uni Grik mande yeyanŋo ŋuya mandeto kuma teyara. Ko uri khumowero ŋuro kheyó seqaŋgurí. ³⁰Quko topé-topémbo ŋuro iŋoro Sol rero Sisaria yendémo uro asáŋi eneŋo yendéyó, Tarsus,^b ŋuno oró.

³¹Ŋunde ŋuroko mira soso Judia, Galili ko Samaria ŋuno iŋondutu koro huru-huru^c ŋu meté kunditeyangurí. Ŋunde yuriquo, iŋondutuye kondérini Uni Parámi ŋuro sasaro ti Yuqa Surumímbo newondeye rukisoyoní unipare qambu eneya kopoyangurí.

Pitako Ainias rini meté taró

³²Naru kano Pitako mira soso ŋuwore tonŋeyate Lita yendémo ŋuno uro unipare meté horé^d quya ŋuno yoraŋgo. ³³Ŋu yendémo ŋuno uni ka qeneró, owí muko Ainias. Wimbu khe kandí soso khumoní yakutímo nanŋe eteyoní kumima naru kande saŋiyoro kapusa ŋunde rotaró.

³⁴Pitako qenero ŋande miraró, “Ainias, itaka Yesu Kristo^e ŋundo korini

^y 9:22 “Kristo ” ŋuko Anutuko rokóŋoní mahero wiri yerete uni parámi horé tunoqaró ŋu. ^z 9:26 “iŋo-iŋo rewero uni ” ŋunde qundo rondaqe-rondaqe unindoya uyaro iŋo-iŋo yunoyaró. ^a 9:27 “asá yerewí uni ” ŋuko Yesuko roko yererero asá yirini eneŋo khoýo taŋgurí. ^b 9:30 “Tarsus yendé” ŋuko mira meyowo, owí muko Silisia, ŋuno yora, Esia mira parámi ŋuno nanŋe. ^c 9:31 “iŋondutu koro huru-huru ” ŋuko unipare soso Yesu iŋondutuworo nokone-nokone ŋuno huruwoyotenŋo qu. ^d 9:32 “unipare meté horé ” ŋuko oteteye soso muko meté nanŋe kini. Kini, owé ŋu “unipare meté horé” ŋuro murí muko ŋandiro, “Anutu koro unipare” nanŋe. ^e 9:34 “Yesu Kristo ” - komo suki ye-ye

unindo Anutuko uni ka rokóŋoní mahero wiri yerete uni parámi horé tunoqeweya qu karo yangurí. Juda unipareto uni maheweya ŋu, “Kristo,” ma, “Mesaiya ,” ye nekaŋgurí. Asa Yesu mahini eneŋo unipareyó, “Kristo Yesu,” ma, “Yesu Kristo,” nanŋe ye nekaŋgurí.

meté tete. Otoqoya yakutíŋge roŋgaruwo.” Yiní waka ta otoqaró.
³⁵Ko Lita uni soso koya Saron mira koro uni ñuyako soso qenero Uni Parámiwore newonde rohoré taŋgurí.

Pitako Tapita riní pitu ko otoqaró

³⁶Asa Jopa yendémo ñuno iño-iño rewero pare ka owí Tapita ñuno yaró. Owí ñu Grik mandewore ñande nekoyanngo, Dokas, yeyanngo. Naru rokóŋoro enendo o meté unipare te yunoro uni otoro tukuni teyanngurí ñu samaka yereyara. ³⁷Asa ñu naruko ñuno se khumo teyate khumaró. Khumoní ukúño sonoworo rero ya quroko ñuno wasa koreko quno ranngurí. ³⁸Lita yendé ñuko Jopa yendé taŋgímo yora. Ñunde ñuro iño-iño rewero unindo, Pita Lita yendémo ñuno yote, yero iñanngurí. Ko uni irisa asá yiri eneno oro ñande kirayariyó, “Waka ta noreno mahe,” yariyó.

³⁹Asa Pitako otoqoro irisa ñuya toñenngurí. Ko ñuno uyaro wasa koreko quno ñuno oró. Oní wapu kumimbo Pita taŋgímo mahe kañero tenduruworo Dokasko eneya yara quno kowe punu-punu kumi tiñiyaró ñu se witúñanngurí.

⁴⁰Asa Pitako unipare soso yohowiní yendémo uyiyo, potoruku rero hariri tiní kini tiní ukúño ñande miraró, “Tapita, otoqo,” yaró. Ñunde yiní pare ñu toñetero Pita qenero otoqoro kunditaró. ⁴¹Kunditiní kandímo towoní otoqoro kañiní unipare meté horémboya^f wapu ñuya neko yerero pare pitu ko otoqaró ñu witú yereró. ⁴²Ñunde tiní mande piña ñu Jopa yendéwore toñiní unipare soso piña mande iñanngurí, ko uni qambu Uni Parámi iñondutuwoyanngurí. ⁴³Pitako naru piru ta Jopa ñuno makao kowí roŋgaruwoyara uni kaya yari.

Sambo simómbo Kornilius mande ka yaró

10 ¹Asa uni ka Sisaria yendémo ñuno yaró, owí muko Kornilius. Ñuko kuma unindoro sopo-sopo uni qu ka, ko enendo Rom koro kuma unindoro huru-huru parámi ka, owí “Itali koro huru-huru,” yeyanngurí, ñuro quroko uni kumi sopo yereyara.^g ²Ñu uni ñuya suwisawiyómboya Anutu koro murí howero Anutu koro soreyanngo. Enendo Juda uni otoro tukuni teyanngurí ñu wondo yunoro samaka yereyara. Ko naru rokóŋoro Anutuware hariri teyara. ³Naru kano, suwoya 3 kilok ñunde tiníyo, kapo ka qeneró muko sambo simó^h ka qeneró. Sambo simó ñundo eneno mahero ñande yaró, “Kornilius.”

^f 9:41 “unipare meté horé ” ñuko oteteye soso muko meté nange kini. Kini, owé ñu “unipare meté horé” ñuro murí muko ñandiro, “Anutu koro unipare” nange. ^g 10:1 “kuma unindoro huru-huru parámi” ñunde quko uni 600 ñuno yoranngo. Sopo-sopo uni ñunde qundo kuma uni 100 sopo yereyanngo. ^h 10:3 “sambo simó ” ñuko komo suki-suki Anutuko unipare kama yoriní tunoqi sambo simó yondowaró. Ko itaka enejo sunará teyotengo.

⁴Yini Kornilius kondé tojetero sasaro tero nãnde yaró, “Uni parámi, do ka?”
Yiniqo, nãnde yaró, “Anutuko keño haririke nãya oteteke meté nãya o qa-qa meté mu qembe nãuro injote. ⁵Asa itakako uni ka asá yereka Jopa uyaro Saimon, owí kako Pita, nãu seqayi. Qene nekoyika mahini. ⁶Uni nãundo makao kowí roŋgaruwoyara uni owí Saimon nãundo yano yote. Saimon koro ya qu windi sumeyoro yote.”

⁷Sambo simómbo mito roto tojiníqo, sunará simóño irisa koya kuma uni kanata nãya neko yereró. Kuma uni nãya Anutu koro murí howeyara, ko Kornilius koro sunará teyara. ⁸Neko yerero o soso nãuro yimitoro asá yirini Jopa uyarengurí.

Pitako kapo ka qeneró

⁹Asa uyareyate sarañoní kosa keweroko nãuno Jopa yendé kutaqemo uyarengurí. Nãu naruko nãuno Pita hariri tewero ya saraño oró.ⁱ ¹⁰Oro qímboro khumoro o newero quro iñaró. Asa topémbo o roŋgaruwoyuriqo, injo-injoyó rohoréñoní ¹¹sambo qeniní kosoní oka tuwi parámi qembe qeniní kato nuñginí nimí kini nãu toworo ronañiní nokono umburó. ¹²Tuwiko nãuno po murí-murí, sire ko nú yañgurí. ¹³Ko maño kato nãnde miraró, “Pita, otoqoya nú-qare ka yuto ne.”

¹⁴Quko Pitako yaró, “Uni Parámi, noko no ma! No oka ka pusú nãunde qu kama nanowó.”^j

¹⁵Ko maño nãundo pitu ko nãnde yaró, “Anutuko o sara nãnge towaró nãu keto pusú yero ma yewero.” ¹⁶Nãu soso naru kapusa nãunde tunoqini tuwi nãu waka ta samboko koreko oró.

¹⁷Asa Pitako injo-injoyó kape tini newondímo nãnde yaró, “O enesó qeneteno nãuro murí muko, nãu datiro?” Ene watí nãunde nãnge injoyoní uni Korniliusko asa yereró nãundo mahero Saimon koro ya nãuro osese tero, yate mahero ya makono kañañgurí. ¹⁸Kaño nãnde nekoyañgurí, “Saimon, owí kako Pita, nãumbe nãano yotepe ma kini?”

¹⁹Pita kapo qeneró nãuro watí iñondataqeyoní Yuqako nãnde miraró, “Qeno, uni kapusako ke seqa kereyotengo. ²⁰Asa ko otoqo uya eneya toñi. Neneñombo uni nãu yorewe mahetengo. Nãuro ma iñondataqewero.”

²¹Yini Pitako uro nãnde yimiraró, “No uni nãu seqayotengo. Ye do karo mahetengo?”

²²Yini nãnde yañgurí, “Kuma unindoro sopo-sopo uniye Kornilius, nãundo nore asá nirini maheteto. Nãuko uni roneneñowí^k ko Anutu koro soreyote. Juda

ⁱ 10:9 Israel mirako nãuno “ya umó” nãuko suruño kini, papare nãnge. Uni kumimbo nãuno kañoero piña mande meté yeyañgurí. ^j 10:14 Juda unipareto *hutuño mande* howero posepo, nú-qare kiraróye kumi nãnge neyaño, ko kumi muko Anutu toñimo pusú tete, unipareto newero mepémo kini. ^k 10:22 “*uni roneneñowí*” nãuko Anutuko qenero potó moré kini tini enejo uniyó tunoqete.

wini soso ñande yeyotenjo, ‘Ñuko uni meté,’ yeyotenjo. Asa sambo simó¹ surumí kato ñande miraró, ko enendo ke neko kiriníka keto yayómo mahero mande ka yeka iñoweya.”²³ Ñunde yiyo, yorero yano oro kunditanjurí.

Pitako Korniliusko yano ñuno oró

Asa sarañoníqo, Pita otoqoro eneya toñejgurí. Ko iñondutu uni kumi Jopa noñjo qu ñuya toñejgurí.²⁴ Toñeyate sarañoní Sisaria yendémo ñuno oñgurí. Kornilius suwisawiyómboya nembe topémboya neko yirini mahe koporo sopoyangurí.²⁵ Asa Pita ya quroko oníqo, Kornilius eneno mahero khímo rokaráño umburo potoruku te inaró.²⁶ Quko Pitako okokoworo ñande yaró, “Otoqo. No ñuya uni nanje.”

²⁷Ñunde yero irisa ñundo mande yero ya quroko oriyó. Oro unipare qambu kopoyuri yiyaró.²⁸ Asa Pitako ñande yimiraró, “Yeñombo iñotenjo, Juda koro hutuño mande qundo ñande yete, ko norendo uni wini meyowo quya kunditewero mepémo kini.”^m Quko Anutuko ñande no witú nereró, ko nondo uni ka qene rondañero pusú yewero mepémo kini.²⁹ Ñunde ñuro no neko nereñgurí quno kina maheteno. Asa ko ñande osese yereteno, ye do murí karo no neko nereñgurí?”

³⁰Ko Kornilius ñande yaró, “Kosa naru nimí kini komoko, suwoya 3 kilok ñandiro nanje, no yanemo hariri teyanowó. Ñunde teyowe uni ka kowe punu-punuyó muko hiyóqeyaró ñundo mahero toñenemo kañaró.³¹ Ko ñande yaró, ‘Kornilius, Anutuko haririke iñote, ko uni otero tukuni teyotenjo qu samaka yerero o yunoyote ñuro iñote.³² Asa ko uni ka asá yereka Jopa uyaya Saimon owí kako Pita nekoyika mahiní. Uni ñu makao kowí roñgaruwoyara uni owí Saimon koya kunditero yayó windi sumeyoro ñuno yote,” yaró.³³ Ñunde ñuro nondo waka ta mande ka rewe keno uyaró ñu. Ko keto o meté te nunoro mahete. Asa nore soso koporo Anutu toñímo ñano kañato Uni Parámimbo mande kunaró ñu yeka iñowato.”

Pitako Kornilius miti mande yesowo miraró

³⁴Asa Pitako hurí tero ñande yaró, “Hamó horé, itaka ñande iñoteno, ko Anutuko unipare soso ñuro otete kanata nanje howeyote.³⁵ Enendo uni wini soso eneño soreyotenjo, ko o roneneñowí mu teyotenjo, ñu soso quro metéñoyote.³⁶ Anutuko miti mande ñu rero nore Israel nunaró.

¹ 10:22 “sambo simó” ñuko komo suki-suki Anutuko unipare kama yoriní tunoqi sambo simó yondowaró. Ko itaka eneño sunará teyotenjo. ^m 10:28 Naru rokóñoro Juda uniparetoya *uni wini meyowomboya* sangirí tanjurí. Juda unipareto ñande ye iñangurí, ko nore Anutu koro unipare, uni meyowo kini. Uni wini meyowo ñundo ñande ye iñangurí, ko Juda unipareto unipare soso huwó yereyangurí. Ñundiro nanje sangirí tanjurí.

Mande ŋuko ŋandiro: Yesu Kristo,ⁿ uni soso koro Uni Paráminanimbo nore noriní Anutu koya newonde kanata teyoteto. ³⁷Yendo Judia mirako o soso tunoqaró ŋuro iŋoyoteŋgo, quko Galili mirako ŋuno hurí taró. Ŋuno Jonko unipare mande yesoworo sono re yunaró. ³⁸Yate Anutuko Nasaret yendé uni ŋu, Yesu, rokóŋoro Yuqa Surumí inoro wimbu parámi inaró. Anutuko eneya yoní wimbo-wimbo uyaro o meté unipare te yunoyara, ko enendo Monimbuko uni rowore yereró ŋuno qu yoriní meté taŋgurí.

³⁹“Asa norendo o soso Judia mirako, Yerusalem yendémo ŋuno taró ŋu genero ŋuro yesowoyoteto. Ko unindo utoro te kano porowoyi khumaró. ⁴⁰Quko naru kapusayómo ŋuno Anutuko okokowoní otoqoro tunomo tunoqaró. ⁴¹Quko uni soso ŋundo kama qeneŋgurí. Kini, uni Anutuko komo rokó yereró ŋundo naŋge qenetowó. Uni tapu koŋgo otoqoníqo, norendo eneya o kopo natowó. ⁴²Ko norendo unipareko mande ka yesowowato ŋuro nimiraró. Mande ŋuko ŋandiro, ko Anutuko Yesu rokóŋaró, ko enendo unipare yoteŋgo quya unipare komo khumaŋgurí quya ronda yereweya. ⁴³Ye-ye uni^o soso ŋande yeyaŋgo, ko unipare soso Yesu iŋondutuwoyoteŋgo ŋu, Anutuko Yesu owíwore quhuriye se rotoweya.”

Yuqa Surumímbo uni wini meyowo saŋayemo umburó

⁴⁴Asa Pitako mande ŋu watí yeyoníqo, Yuqa Surumí ŋundo umburo unipare soso mande ŋu iŋoyanŋo quno ŋuno umburó. ⁴⁵Iŋondutu uni koweye toŋaŋgurí qu^p Pita koya mahenŋgurí ŋundo newondeye uraró, dokoro Yuqa Surumí ŋu uni wini meyowo^q saŋayemo ŋuya umburó. ⁴⁶Hamó, umbuní mande enesó-enesówore yero Anutu owí hokoyaŋgurí.

Asa Pitako ŋande yaró, ⁴⁷“Unipare ŋako Yuqa reteŋgo ŋunde naŋge norendo komo ratowó ŋundiro. Ŋunde ŋuro danimbo meté sono re yunoteto ŋu kusiyoweya?” ⁴⁸Yero topé-topé ŋu ŋande yimiraró, “Yesu Kristo^r owímo sono re yunoyika.” Yiní sono re yunoyi kini tiní ŋande miranŋurí, “Ke roto noreya soŋga ta yate ta,” yaŋgurí.

ⁿ 10:36 “Yesu Kristo” - komo suki *ye-ye unindo* Anutuko uni ka rokóŋoní mahero wiri yerete uni parámi horé tunoqeweya qu karo yaŋgurí. Juda unipareto uni maheweya ŋu, “Kristo,” ma, “*Mesaiya*,” ye nekaŋgurí. Asa Yesu mahiní eneŋo unipareyó, “Kristo Yesu,” ma, “Yesu Kristo,” naŋge ye nekaŋgurí. ^o 10:43 “*ye-ye uni*” ŋuko Anutuko mandí yunoní unipare yunaŋgurí. ^p 10:45 “iŋondutu uni koweye toŋaŋgurí qu” - ŋuko Juda uni naŋge. Komo suki Anutuko *Abraham*, Juda unindoro pukoye ŋu, ŋande miraró, ko enendo rokó ka tero eneŋo naŋo-simó soso koweye toŋoweya. Ŋunde tero, yate-yate Juda uni soso koweye toŋaŋgurí. ^q 10:45 “*uni wini meyowo*” ŋunde quko Juda unipare kini qu naŋge. ^r 10:48 “Yesu Kristo” - komo suki *ye-ye unindo* Anutuko uni ka rokóŋoní mahero wiri yerete uni parámi horé tunoqeweya qu karo yaŋgurí. Juda unipareto uni maheweya ŋu, “Kristo,” ma, “*Mesaiya*,” ye nekaŋgurí. Asa Yesu mahiní eneŋo unipareyó, “Kristo Yesu,” ma, “Yesu Kristo,” naŋge ye nekaŋgurí.

Pitako o taró ŋuro sowo mande topé-topé yimiraró

11 ¹Asá yerewí unindoya iŋondutu unipare Judia mirawore yoraŋgurí ŋu ŋuya mande piŋa ŋande iŋaŋgurí, ko unipare uni wini meyowo mu^s ŋuya Anutu koro mande qu raŋgurí. ²Asa ko Pitako Yerusalem oró quño ŋuno iŋondutu uni koweye toŋaŋgurí qundo^t qenero ³ŋande yaŋgurí, “Keto yano oro uni koweye kama toŋaŋgurí quya o kopo naŋgurí!”

⁴Asa Pitako hurí rero o soso tunoqaró okeyá ta ŋande yaró, ⁵“No Jopa yendémo yotoro hariri teyano, iŋo-iŋone rohoréŋoní o enesó-enesó ka qenenowó. Oka tuwi parámi qembe qenewe kato nuŋginí nimí kini ŋu toworo rondaŋiní nokono umburó. ⁶No okeyá ta toŋetanowó, ko tuwiko ŋuno po murí-murí, nú-qare, sire ko nú yaŋgurí. ⁷Ko maŋgo kato no nimiraró, ‘Pita, otoqoya yuto ne.’

⁸“Quko nondo ŋande yanowó, ‘Uni Parámi, noko no ma! No oka ka pusú ŋunde qu kama nanowó.’^u

⁹“Ko maŋgo ŋundo pitu ko ŋande yaró, ‘Anutuko o sara naŋge towaró ŋu keto pusú yero ma yewero.’ ¹⁰Ŋu soso naru kapusa ŋunde tunoqiní tuwi ŋu waka ta samboko koreko oró.

¹¹“Ŋu naruko naŋge uni kapusa qundo mahero nore yato quño ŋuno kaŋaŋgurí. Sisaria yendé uni kato uni ŋu asá yiri nono mahęgurí. ¹²Mahiŋo, Yuqako ŋande nimiraró, ‘Ma iŋondataqewero, eneya toŋe,’ yaró. Asa ko noya uni topo kande saŋiyoro kanata ŋuya uro uni ŋuro ya quroko otowó. ¹³Ko enendo nore nimitoro ŋande yaró, ‘Sambo simó ka ya ŋano kaŋero ŋande nimiraró, “Keto uni ka asáŋoka Jopa oya Saimon owí kako Pita ŋu yeka mahiní. ¹⁴Enendo Anutuko keya suwisawikepoya rambaruru koŋgo yoreweya ŋuro mande ka kimiroweya.”’

¹⁵“Ŋunde yiníŋo, no hurí rero mande yeyoweŋo Yuqa Surumímbo komo noreno umburó ŋundiro naŋge eneno umburó. ¹⁶Ko Uni Parámimbo mande komo yaró ŋuro iŋanowó. Ŋande yaró, ‘Jonko unipare sono re yunaró, quko yendo Yuqa Surumí rewaŋgo.’ ¹⁷Ŋunde ŋuroko Anutuko puriŋo nore Uni Parámi Yesu Kristo^v iŋondutuwoyatowó qu re nunaró ŋu uni ŋu yunowero ye iŋaró tiníŋo, no date tero eneŋo kheyó wisumuŋowano?”

^s 11:1 “uni wini meyowo ” ŋunde quko Juda unipare kini qu naŋge. ^t 11:2 “iŋondutu uni koweye toŋaŋgurí qu” - ŋuko Juda uni naŋge. Komo suki Anutuko *Abraham* , Juda unindoro pukoye ŋu, ŋande miraró, ko enendo rokó ka tero eneŋo naŋo-simó soso koweye toŋoweya. Ŋunde tero, yate-yate Juda uni soso koweye toŋaŋgurí. ^u 11:8 Juda unipareto *hutuyo mande* howero posepo, nú-qare kiraróye kumi naŋge neyaŋgo, ko kumi muko Anutu toŋímo pusú tete, unipareto newero mepémo kini. ^v 11:17 “Yesu Kristo ” - komo suki *ye-ye unindo* Anutuko uni ka rokóŋoní mahero wiri yerete uni parámi horé tunoqeweya qu karo yaŋgurí. Juda unipareto uni maheweya ŋu, “Kristo,” ma, “*Mesaiya* ,” ye nekaŋgurí. Asa Yesu mahiní eneŋo unipareyó, “Kristo Yesu,” ma, “Yesu Kristo,” naŋge ye nekaŋgurí.

¹⁸Ŋunde yini mande topé kama yero Anutu owí hokoro ŋande yaŋgurí, “Asa ko Anutuko uni wini meyowo ŋuya yoriní newondeye rohoréŋoro yoto-yotoye moré tewango.”

Antiok unipare kumimbo iŋondutu taŋgurí

¹⁹Komo Stiven uroyi khumoní quhurí parámi tunoqiní iŋondutu unipare quhurí korowaŋgurí. Asa ko kumi wisikaraŋoro sorero Ponisia mirako, Saipras noko mosowímo, Antiok yendémo ŋuno uŋgurí. Ŋuno uro Juda uni naŋge mande yesowo yimiranŋgurí. ²⁰Quko uni kumi keweroyemoko, Saipras uni koya Sairin yendé uni, ene Antiok oŋgurí quno ŋuno Uni Parámi Yesu ŋuro miti mande Grik uni ŋuya yesowo yimiranŋgurí. ²¹Ŋunde yimitoro Uni Parámimboro wimbí eneno yoní unipare qambu newondeye rohoréŋoro Uni Parámi iŋondutuwoyaŋgurí.

²²Asa iŋondutu koro huru-huru^w ŋu Yerusalem ŋuno yoraŋgo ŋundo piŋa mande ŋu iŋoro Barnabas asáŋoyi Antiok uró. ²³Uro Anutuko samaka-samaka tuwó^x unipare yunaró ŋu qene iŋoro niŋgu-niŋgu tero Uni Parámi suki howewero ŋuro yimitoro newondeye rukisoyaró. ²⁴Barnabas ŋuko uni meté, ko Yuqa Surumí eneno maŋgoreyaró, iŋondutu kondé teyara. Ko unipare qambu horé Uni Parámimboro wini quroko maheyango.

²⁵Asa Barnabas Tarsus yendémo oro Sol seqaró. ²⁶Seqa genero re Antiok mahero kumima naru kayata na soso Antiok ŋuno yariyó. Iriŋa ŋundo iŋondutu uniparetoya huruwo ro mande rondaqe unipare qambu yunoyariyó. Ko Antiok ŋuno naŋge unindo koretero Yesu koro iŋo-iŋo rewero unipareyó^y ŋu “Kristen” neko yereŋgurí.

²⁷Ŋu naruko ŋuno ye-ye uni^z kumi Yerusalem rotoro Antiok uŋgurí. ²⁸Ko keweroyemo kato, owí Akapas, kaŋero Yuqa koro wimbímo korare noko soso ŋuno tunoqeweya ŋuro yaró. (Korare ŋu, Kolotiasko^a unipare soso wiri yereró naruyómo ŋuno tunoqaró.) ²⁹Asa iŋo-iŋo rewero uni ŋundo topoye Judia mirako yaŋgurí ŋu samaka yerewero mande kusiyanŋgurí. Uni kanata-kanata eneŋo wondoyó rondaŋero kumi se kopanŋgurí. ³⁰Ŋunde koporo Barnabas koya Sol koya rokó yiri wondo ŋu rero huru-huru koro tapá unino oriyó.

^w 11:22 “iŋondutu koro huru-huru ” ŋuko unipare soso Yesu iŋondutuwo ro nokone-nokone ŋuno huruwoyotengo qu. ^x 11:23 “samaka-samaka tuwó ” ŋuko Anutu eneŋombo nore samaka yereyote. Kimoyó moré kini. ^y 11:26 “iŋo-iŋo rewero unipare ” ŋunde qundo rondaqe-rondaqe unindoya uyaro iŋo-iŋo yunoyaró. ^z 11:27 “ye-ye uni ” ŋuko Anutuko mandí unoní unipare yunaŋgurí. ^a 11:28 “Kolotias” ŋuko Rom koro wiri yerete uni parámi ka. Rom unindo mirane-mirane wini soso sopo yereŋgurí.

Herotko Pita rero kusi-kusi yano rotará

12 ¹Asa ñu naruko ñuno wiri yerete uni Herot^b ñundo o piyimi iñondutu unipare kumi te yunowero yondowaró. ²Ñundiro enendo yiní Jems, Jon koro payó, ñu suke parámimbo toñoyi khumaró. ³Khumoní Juda unindo ñuro ñingu-ñingu tañgurí. Ñunde ñuroko Bret Yis Moré Kini ñuro o ne-neko^c ñuno Herotko Pita ñuya rero kusi-kusi yano rotará. ⁴Ñunde rotoní kuma unindoro kopo-kopo nimí kini qundo narune-narune sopoyañgo. Kopo-kopo kanata-kanata ñuko kuma uni nimí kini nañge. Herotko ñande ye iñaró, imemoñgo Taka yereró quro o ne-ne ñu^d kini tiníqo, Pita re umburo unipare toñeyemo mande khono rotoweya.

⁵Ñunde ñuro Pita kusi-kusi yano yora, quko iñondutu koro huru-huru ñundo^e suki-suki enejo Anutuwoore hariri teyango.

Sambo simó kato Pita samakañaró

⁶Yate Herotko ñande ye iñaró, kuyepo Pita rero mande khono rotowano. Quko kosa kama areyoníqo, suwonoko Pita kuma uni keweroyarimo etaró. Utó kondé irisa qundo kusiyañgurí, ko kuma uni irisa kusi-kusi ya mako soporo kañariyó. ⁷Ko waka ta Uni Parámimboro sambo simó ka^f tunoqero kusi-kusi ya quroko hiyóqaró. Tunoqero Pita tañgímo utoro okokoworo yaró, “Waka ta otoqo,” yiní utó irisa ñu wisiyoro nokono umburiyó.

⁸Kowe sambo simómbo ñande miraró, “Utómbo kowe punu-punuke kosopengemo kusiyoya khe punu-punuke se kheñgemo re.” Yiní ñunde tiní ñande miraró, “Kowe punu-punu piruke^g reya no nohowe.” ⁹Yiní kina

^b 12:1 “Herot,” owí kako “Agripa”, ñundo Juda unipare sopo yereró, quko enendo Rom koro wiri yerete uni parámi kasirayemo yora. Wiri yerete uni parámi ñundo owé parámi ka Herot inaró. Komo enejo usímbo unipare wiri yiriní Mariako Yesu pisiyaró. ^c 12:3 “Bret Yisiyó Moré Kini quro o ne-ne” ñuko naru parámi ka, asa Israel unipareto sonda kanata soso ñuno bret yisiyó moré kini nañgurí. Komo suki Anutuko unipare ñu *Isip* noñgo yoriní areñgurí. Arewero tañgurí quno ñuno bret hamó qawero mepémo kini. Kini, bret yisiyó moré kini nañge, asa plaua, sono nañge qañgurí. Ñunde ñuroko kumima naru rokóñoro o tunoqaró ñuro iñoro o ne-ne ñu teyango. ^d 12:4 “Taka yereró quro o ne-ne” ñuko naru parámi ka. Komo suki Anutuko Israel unipare *Isip* noñgo yoriní areñgurí. Ñu naruko ñuno *sambo simó* sangirí kato *Isip* koro simó urumuni korete qu soso yuri khumañgurí. Quko Israel unipareto Anutu koro mandí howero *sipsip* simó yuturo sitú makoyemo sonowoyi sambo simómbo enejo simóye taka yiriní kama khumañgurí. Ñunde ñuroko kumima naru rokóñoro *sipsip* simó yuturo o ne-ne teyango. ^e 12:5 “iñondutu koro huru-huru” ñuko unipare soso Yesu iñondutuwooro nokone-nokone ñuno huruwoyotenggo qu. ^f 12:7 “sambo simó” ñuko komo suki-suki Anutuko unipare kama yoriní tunoqi sambo simó yondowaró. Ko itaka enejo sunará teyotenggo. ^g 12:8 “kowe punu-punu piru” ñunde qu unipareto kowe punu-punuye meyowo weheñoyañgurí.

howaró, quko sambo simómbo o taró ñuko hamómbe ma kini, ñuro kama ñjaró. Kini, kapo qeneteno nanje ye ñjaró. ¹⁰Asa irisa ñundo ya ñuno oro sopo-sopo uni korete qu takaro, yate irisayó takaro mako aini ñu ya wembó weña quno ñuno uriyó. Ñuno uriqo, mako ñu enejombo koso yunoní yendémo uro khe ka howero oriyó. Ñunde tiriqo, waka ta sambo simó ñu Pita roto toñeró.

¹¹Toñiní Pita ñjo-ñjoyó hiyóqiní ñande yaró, “Asa hamó ñjoteno, Uni Parámimbo sambo simóño asáñoní mahete, ko Herot kandí moñgo noriní Juda unindoro ñjo-ñjoye piyimi ñu takateno.”

¹²Asa ñunde qene ñjoro enendo Jon, owí kako Mak, ñuro nimí Mariako yano uyaró. Ya ñuno unipare qambu koporo hariri teyangurí. ¹³Asa Pitako hoñgo pawa piru koro mako uroní sunará pare ka, owí Rota, ñundo mako kosowero umburó. ¹⁴Quko Pita koro mañgó ñjoro niñgu-niñgu parámi tero mako kama kosaró. Kina kheñgenjoro ya quroko oro yimiraró, “Pita makono kañeyote!”

¹⁵Yini mirangurí, “Ke kape pare!”

Quko kondé yaró, “Kini, hamó horé amena yote!”

Enepa yangurí, “Ñuko enejo kapí na.”

¹⁶Asa Pita mako watí utoyoní uyaro mako kosoro qenero newondeye uraró. ¹⁷Quko kandímbo rokó-rokó tiní mañgoye kusiya Uni Parámimbo date kusi-kusi ya noñgo re maheró ñuro yimiraró. Ñande yaró, “Ye Jems koya topo-toponanimboya ñaro yimiri qembe,” yero yendémo uro mira meywomo toñeró.

¹⁸Ita sarañoníqo, kuma uni otoqoro parámi yukuworo epe osese-osese tañgurí, “Pita dano ute?” ¹⁹Herotko Pita seqayate kama qeneró. Ñunde ñuro enendo, kuma uni ñu yore mande khono yorotoro yuroweka khumi, yero mande kusiñaró.

Herot khumaró

Asa Herotko Judia mira ñu rotoro Sisaria yendémo uro ñuno yaró. ²⁰Komo enendo kiro sañgirí parámi Tair koya Saiton uniparetoya^h taró. Unipare ñundo o qoyembo Herot noñgo nanje siyoyangurí. Ñunde ñuro, kiro mande ñu roñgaruwowato, yero uni ka owí Bilasitas koya koporo Herot qenewero mahengurí. Bilasitas ñuko wiri yerete unindoro kho tero yakutí etewero qu sopoyaró.

²¹Asa naruyómo ñuno Herotko wiri yerete unindoro kowe punu-punu meté horé qu re taró, ko mande kho inowero yakutíⁱ kunditero mande ka unipareko yesowaró. ²²Yesowoní ñjoro ñande kiwe nekañgurí, “Ñuko

^h 12:20 “Tair koya Saiton” ñuko *kape unindoro* yendéye, Juda koro miraye sumeyoro windi tapémo ñuno yorariyó. ⁱ 12:21 “mande kho inowero yakutí” ñunde quno ronda-ronda unindo ronda-ronda mande meté yeweya, ñu noñgo nanje mandí wimbu moré.

unindoro maŋgó kini, anutu kanata karo nanŋe!”²³ Ɔunde yiŋo, Herotko Anutu owí kama hokaró, Ɔunde Ɔuro waka ta Uni Parámimboro sambo simó^j kato uroní punipo newondí ni khumaró.

²⁴Quko Anutu koro mandímbo parámi tero yendé soso toŋeró.

²⁵Kowe Barnabas koya Sol koya khoyari Yerusalem Ɔuno tiri kini tiníŋo, pitu ko uriyó. Uro Jon, owí kako Mak, Ɔu rero toŋeŋguri.

**IƆondutu koro huru-huru Ɔundo Barnabas,
Sol rokó yerero asá yereŋguri**

13 ¹Asa iƆondutu koro huru-huru Ɔu Antiok yendémo Ɔunoko ye-ye uni^k kumimboya rondaŋe-rondaŋe uni kumi Ɔuno yaŋguri. Owéye muko Ɔandiro: Barnabas, Simeon owí kako Niker, Lusius, Sairin yendé qu ka, Manain, wiri yerete uni Herot koya ya kanata Ɔuno parámi tariyó, ko Sol. ²Unipareto Uni Parámimboro potoruku tero kundinji^l teyuriŋo, Yuŋa Surumímbo Ɔande yaró, “Ye Barnabas koya Sol koya rokó yirika nondo neko yerero kho yunanowó Ɔu tewari.” ³Yini kundinji tero hariri ti kini tiníŋo, kandeye saŋayarimo rero asá yereŋguri.

Saipras noko mosowímo Ɔuno mande yesowo yimirariyó

⁴Asa Yuŋa Surumímbo yorini toŋero Selusia yendémo Ɔuno uriyó. Ɔu noŋgo waŋgowore Saipras noko mosowímo uyariyó. ⁵Uyaro Salamis yendémo Ɔuno waŋgo rotooro oro Juda koro huru-huru yawore^m Anutu koro mande qu yeyariyó. Ko Jonko eneya yototo samaka yereró.

⁶Asa Saipras noko mosowí soso Ɔuwore khete uyareyate Papos yendé andusina Ɔuno uyareŋguri. Ɔuno Juda uni owí Bar-Yesu qeneŋguri, enendo rukusí tero ye-ye uni kota taró. ⁷Eneko Rom koro uni parámi, owí Sergius Paulus,ⁿ Ɔuro topé ka. Uni kembé Ɔundo Anutu koro mande qu iƆowero iƆoro Barnabas koya Sol koya neko yereró. ⁸Quko rukusí teyara uni Ɔu, owí Grik mandewore Elimas nekoyanŋo, enendo, uni kembé Ɔundo iƆondutu ma tewero, ye iƆoro uni kembémboro iƆo-iƆoyó wasowero taró.

⁹Quko Sol, owí kako Pol, Yuŋa Surumímbo wimbí parámi eneno maŋgorini enendo Elimas kondé toŋetero Ɔande yaró, ¹⁰“Otete kota quya otete kaná-kaná quya keno maŋgoreyote! Keko Monimbu koro nanjuni, keto otete roneneŋowí^o Ɔuro saŋgirinŋo tete! Kepe Uni Parámimboro khe

^j 12:23 “*sambo simó*” Ɔuko komo suki-suki Anutuko unipare kama yorini tunoŋi sambo simó yondowaró. Ko itaka eneŋo sunará teyoteŋgo. ^k 13:1 “*ye-ye uni*” Ɔuko Anutuko mandí yunoni unipare yunaŋguri. ^l 13:2 “*kundinji*” teyaŋguri Ɔuno Ɔuno unipareto Anutu iƆoro eneŋo ri umbuni naru kanata, irisa Ɔundiro o kama naŋguri. ^m 13:5 “*huru-huru ya*” Ɔuko Juda unipareto ya parámi mu. *Sapat naruko* Ɔuno hu-hariri tero Anutu koro mandí weyoyi iƆoro hariri teyaŋguri. ⁿ 13:7 “Sergius Paulus” Ɔuko Rom koro uni qu ka, enendo Saipras noko mosowí soso Ɔu wiri yereró. ^o 13:10 “*otete roneneŋowí*” Ɔuko Anutuko nore rokó yirini noreŋo murinani eneŋo muri howeyote.

roneneḡowí mu roworemowero kho ḡu rotoweyape ma kini? ¹¹Asa iḡo! Itakako Uni Parámimboro kandímbo kurote, ko toḡeḡe pokaweya. Itaka yate kosa kama qeneweya.”

Yiniḡo, waka ta toḡí huriri tini wimbo-wimbo uro uni kandi toworo khe witúḡowero qu ka seqayaró. ¹²Kowe uni kembé ḡundo o ḡu qenero, Uni Parámi ḡuro mande rondaqe inariyó ḡuro kondé yukuworo iḡondutu taró.

Pisitia mirako Antiok yendémo ḡuno mande yesowo yimirariyó

¹³Asa Pol koya topé-topémboya waḡgowore Papos yendé rotoro Pambilia mirako Perika yendémo ḡuno uyareḡurí. ḡu noḡo Jon yorotoro Yerusalem pitu ko uyarewero toḡeró. ¹⁴Toḡini irisa ḡundo Perika rotoro khendo yate Pisitia mirako Antiok yendémo ḡuno oriyó. ḡuno oro Sapat naruko^p ḡuno Juda koro huru-huru ya quroko oro kunditariyó. ¹⁵Asa uni kato Hutuḡo Mande koro mande kaya Ye-ye Unindoro mande kaya weyoní kini tini huru-huru sopo-sopo uni ḡundo Pol, Barnabas neko yerero ḡande yaró, “Topo irisa, mande ka unipare newondeye rukisoyowero mande ka yimirowero iḡoyaḡo meté yiri.”

¹⁶Asa Polko kaḡero kandímbo rokó-rokó tero ḡande yaró, “Ye Israel uni, ko ye Anutu kasiramo yotēḡo qu, iḡoyi. ¹⁷Israel uniparetoro Anutuyembo usi-sinani rokó yereḡurí. ḡunde rokó yerero Isip mirako ḡuno yorini qambu taḡurí. Yate wimbí tero yorini Isip rotoro mahēḡurí. ¹⁸Mahiḡo, kumima naru 40 ḡunde rotoro mira wimbímo oteteye piyimi ḡuro topé kama tero ¹⁹Kenan ḡunoko uni wini meyowo kande saḡiyoro irisa rambaruru yerero miraye ḡu rero Israel uni yunaró. ²⁰Naru soso ḡuko kumima naru 450 ḡundiro taró.

“ḡu naruko ḡuno uni tapá enesó-enesó yorini sopo yereḡurí, yate ye-ye uni Samuel tunoḡaró. ²¹ḡu naru ḡunoko unipareto wiri yerete uni karo kirayaḡurí, asa ko Anutuko Sol, Kis naḡuní ḡu, Benjamin koro wini qu ka, ḡu re yunaró. Ko kumima naru 40 ḡunde rotoro Solko unipare wiri yereró. ²²Quko Anutuko Sol re howero Dewit rokóḡoní wiri yerete uni tunoḡaró. Rokóḡoro ḡuro ḡande yaró, ‘Dewit, Jesi naḡuní ḡu, no qene iḡoro ḡande iḡoyoteno, ko neneḡo nuḡḡuríne ḡuko ene nuḡḡurí ḡunde naḡe. Enendo iḡo-iḡone soso ḡu howeyoweya.’

²³“Anutuko komo mande kusiyaró ḡu howero Yesu, Rambaruru Koḡo Yorewero Uni ḡu, Dewit koro sowe qu, ḡu rini Israel maheró. ²⁴Yesu kama tunoḡeyoní Jonko Israel uni soso newonde rohoréḡoro sono rewero mande qu yesowo yimiraró. ²⁵Jon khoyó kini tewero tini ḡande yaró, ‘Ye no dani, yero iḡoteḡo? Noko uni ḡu maheweya ḡu kini. Quko uni ka

^p 13:14 “Sapat naru ” ḡuko sonda naru weḡa ḡu. ḡu naruko ḡuno Juda unipareto huru-huru yayemo huruwo Anutu koro mandí weyoyi iḡoro hariri teyaḡurí.

imemongo no huwónemo maheweya nuro inoyi, nondo enejo khe punu-punuyómboro utó orosoyewero owéne moré kini.⁹

²⁶ “Topo okite, ye Abraham koro soweyómboya ye Anutu koro kasiramo yotengo quya, inoyi. Anutuko nore rambaruru konggo yoreweya nuro mande njako riní noreno maheró. ²⁷ Dokoro unipare Yerusalem yotengo qu, ko uni kembé-kembéye njuko Yesu okeyá kama ino inangurí. Sapat naru^r rokóngomo ye-ye unindoro mandeye weyoro kama inoyi tondañeyote. Njunde njuroko Yesu topé piyimi inangurí quño njuno ye-ye unindoro mandeye njuri hamó taró. ²⁸ Njundiro nanje ene quhuriyó moré kini qenengurí, quko Pailat kandímo rato uroní khumoweya, ye injoro re inangurí. ²⁹ Inoyi uroyi khumoníqota ye-ye unindoro mandeye mepémo tunoqaró. Njunde tiní tipiriri^s konggo ri umbuní rero uni tapu kano njuno tapunangurí. ³⁰ Quko Anutuko okokowoní pitu ko uni tapu konggo otoqaró. ³¹ Otoqoro naru parámi njuno unipare komo eneya Galili rotoro Yerusalem ongurí qundo ene qenengurí. Ko itakako unipare njundo unipare enejo yesowoyotengo.

³² “Nore miti mande meté njá yesoworo ye yimiroteto. Anutuko komo mande usi-sinanimboya kusiyaró njuri ³³ itaka soweyemboya, nore nanje, mande njuri mepémo tunoqewero Yesu okokowoní uni tapu konggo otoqaró. Hariri Yambo irisayó quño njuno o njuro njande yete,

“Ke nenejo nanjone;
Itaka no pisi kereteno.’

³⁴ “Enendo uni tapu konggo riní otoqaró. Otoqoro kowí kanjuya kama puqeweya. Sokomeko mande njuro njande yete,

“Nondo komo o meté horé qu se Dewit inowero yanowó mu,
njuri hamó se ye yunowano.’

³⁵ “Njunde njuro mande meyworo njande yete,

“Kejo uni meté horé qu, njuri roti uni tapuko kama puqeweya.’

³⁶ “Qeni, Dewitko nokono yaró quño njuno Anutu koro ino-ino qu howeroqota khumoní rero usi-símboya tapunji puqaró. ³⁷ Quko Anutuko uni okokowoní otoqaró, njuko kama puqaró.

³⁸ “Njunde njuro, uni topo, mande njande yesowatokata, ye inoyi, Anutuko uni njuwore yejo quhuriye se rotoweya. Moses koro hutujo

⁹ 13:25 Kho njuri, uni parámimbororo khe punu-punu orosoyewero quoro kho njuko, kho simó nanjeko njunde teyanggo. ^r 13:27 “Sapat naru ” njuko sonda naru weña njuri. Njuri naruko njuno Juda unipareto *huru-huru yayemo* huruworo Anutu koro mandí weyoyi injoro hariri teyangurí. ^s 13:29 “tipiriri ” njunde quko wiri yerete uni kumimbo enejo uni sanjiríye yorero njuno uroyi khumoyangurí.

mandeko^t quhuriye se rotoro ye yoriní ronenejowí^u tunoqewero mepémo kini. ³⁹Quko unipare soso ijondutuwoyotejgo njundo uni njuwore ronenejowí tunoqetejgo. ⁴⁰Ijunde njuro meté tojete sopoyi, komo mande ye-ye unindo njuro yanjurí njú yeno tunoqeweya koro. Ijande yanjurí,

⁴¹ “Yeko yesarájyotejgo, ye tojeti,
ko ijondata parámi teroqota rambaruru ti!
Nondo yejo naruyemo kho ka tewano,
ko uni kato kho njuro ye yimironíqo,
yeko kama ijondutuwowanjo.”

⁴²Asa njunde yiri kini tiní yendémo umburiqo, unipareto njande yanjurí, “Sapat naru aweno mande njako pitu ko nore nimirori qembe.”
⁴³Yiqo, sopo-sopo unindo yorotoní yendémo umbunjurí. Umburo Juda uni qambu koya uni wini meyowo qu Juda koro muríye hamó howeyanjo njundo Pol koya Barnabas koya yohowanjurí. Irisa njundo mande yunoro Anutuko samaka-samaka tuwó^y yunaró njú sajanjo kanjowero njuro rukiso yiririyó.

⁴⁴Asa imemongo Sapat naruko njuno unipare soso ta yendé parámimo yanjurí qundo mahero Uni Parámimboro mande qu ijowero quro huruwanjurí. ⁴⁵Quko Juda unindo unipare qambu njú yiyoro newonde tutu tanjurí. Ijunde tero Polko mande yaró njuro yesarájanjurí.

⁴⁶Quko Pol koya Barnabas koya wimbu rero mande njande yariyó, “Hamó, koretero nore Anutu koro mande qu rero ye Juda uni yunarowó. Quko mande njú huwójoro njande ye ijotejgo, ko naru maheweya quro yoto-yotoyó njú rewero owénani moré kini, ye ijotejgo. Ijunde njuroko norendo rohoréjoro uni wini meyowo^w yunowaro. ⁴⁷Dokoro, Uni Parámimbo nore njande nimiraró,

“Nondo ke korewe uni wini meyowomboro hiyóye tunoqeweya.
Ijunde tero unipare noko soso njú yimitoka rambaruru konjo yorewe.”

⁴⁸Ijunde yiriqo, uni wini meyowo njundo niñgu-niñgu tero Uni Parámimboro mande quro seré tanjurí. Ko Anutuko unipare rokó yiriní naru maheweya quro yoto-yotoyó njú rewango, soso njundo ijondutu tanjurí.

⁴⁹Asa Uni Parámimboro mande qu mira soso njuno usayero tojeró.
⁵⁰Quko Juda unindo pare kumi owéye moré qu Anutu potoruku te

^t 13:38 “*hutujo mande*” njuko komo suki Anutuko *Sainai* purímo *Moses* inoní Israel unipare yunaró. Mande njuko Juda uniparetoro yoto-yotoye soso sopoyaró. ^u 13:38 “*ronenejowí tunoqete*” njuro murí muko njandiro: asa Anutuko uni ka, pare ka yiyoro potó moré kini tiní enejo unipare qu ka tunoqetejgo. ^v 13:43 “*samaka-samaka tuwó*” njuko Anutu enejombo nore samaka yereyote. Kimoyó moré kini. ^w 13:46 “*uni wini meyowo*” njunde quko Juda unipare kini qu nanje.

inoyaŋgo quya yendé ŋuro uni pará-parámboya yori newonde piyimi tero Pol koya Barnabas koya o piyimi te yunoro yendé moŋgo yohowaŋgurí. ⁵¹Ŋunde ŋuro irisa ŋundo newondeyari saŋgirí rihimowero ŋuro kheyarimo murutó siyori nokono umburó. Ŋunde tero Antiok rotoro Aikoniam yendémo ŋuno uyaririyó. ⁵²Ko Antiok ŋuno Yesu koro iŋo-iŋo rewero unipareyó^x ŋundo niŋgu-niŋgu parámi tiqo, Yuqa Surumímbo newondeyemo maŋgoraró.

Aikoniam yendémo ŋuno mande yesowariyó

14 ¹Asa komo tariyó ŋunde naŋge Aikoniam yendémo ŋuno Juda koro huru-huru yano^y oro mande yariyó. Ŋunde yiriqo, Juda uni, Grik uni qambu parámi horé iŋondutuwoyaŋgurí. ²Quko Juda uni kumi iŋondutu kama taŋgurí ŋundo uni wini meyowo mu^z iŋo-iŋoye ri uni topo ŋuro newonde piyimi taŋgurí. ³Naru piru saŋga Aikoniam ŋuno yotoro wimbu rero Uni Parámimboro yesowori enendo eneŋo samaka-samaka tuwó qu unipare wítú yerewero quro o wimbí moré^a enesó-enesó kandeyarimo taró. ⁴Quko yendé unipare soso ŋu usoworo irisa taŋgurí. Kumimbo Juda unindoya newonde kanata taŋgurí, ko kumimbo asá yerewí uni^b irisa ŋuya newonde kanata taŋgurí. ⁵Yate uni wini meyowo ŋuya Juda unindoya uni kembéyemboya ŋundo Pol koya Barnabas koya o piyimi te yunoro wondopo yuwero mande ka kusiyangurí. ⁶Kusiyoyiqo, iŋoro sorero Listira, Deripe yendé irisa Likonia mira kutaqe quno ŋuno toŋiriyó. ⁷Ŋuno uyaro miti mande^c ŋu yesowoyariyó.

Polko Listira yendémo ŋuno uni khí piyimi ka riní meté taró

⁸Listira yendémo ŋuno uni khí wimbí moré kini ka kina kunditeyaró, ŋuko nimímbo ene khí piyimi ŋunde pisiyaró, ko eneŋombo khete uyarewero mepémo kini. ⁹Asa uni ŋundo Pol koro mandí iŋoní Polko kondé toŋetero ŋande ye iŋaró, ko uni ŋu Anutuko riní meté teweya ŋu iŋondutuwoyote, ye iŋaró. ¹⁰Ŋunde ye iŋoro mande kondé ŋande miraró, “Ke otoqo kaŋe.” Yiní otoqo kaŋero khímbo uyaró.

¹¹Ŋunde tiní unipare qambu qundo Polko o taró ŋu qenero Likonia mandewore ŋande kiwe yaŋgurí, “Anutu kumimbo uni qembe tunoqero noreno umbutiri!” ¹²Ŋunde yero Barnabas ŋuko anutu ka owí muko,

^x 13:52 “iŋo-iŋo rewero unipare” ŋunde qundo rondaqe-rondaqe unindoya uyaro iŋo-iŋo yunoyaró. ^y 14:1 “huru-huru ya” ŋuko Juda uniparetoro ya parámi mu. *Sapat naruko* ŋuno hu-hariri tero Anutu koro mandí weyoyi iŋoro hariri teyaŋgurí. ^z 14:2 “uni wini meyowo” ŋunde quko Juda unipare kini qu naŋge. ^a 14:3 “o wimbí moré” ŋuko o enesó-enesó tunoqiní Anutu koro wimbí ŋunde tunomo yoweya. ^b 14:4 “asá yerewí uni” ŋuko Yesuko rokó yerero asá yiriní eneŋo khayó taŋgurí. ^c 14:7 “miti mande” ŋuko Anutuko *Kristo* asáŋoní kumororo quhurínanimboro kimo tiní Anutu koya newonde kanata tewero ŋuro mande meté mu nange.

“Sus,” ye nekaŋgurí. Ko Pol ŋuko mande yeyote uni, ŋuro anutu ka owí muko, “Heremes,” ye nekaŋgurí.^d ¹³Sus koro ya surumí ka yendé sumeyoro yaró. Asa Sus koro o qa-qa uni ŋuya unipare qambu Pol koya Barnabas koro o qa-qa te yunowero ye iŋaŋgurí. Ŋunde ŋuro o qa-qa uni ŋundo makao urumuni kumi siyoro o nakayá kumi ŋuya siyoro yendé koro makoyómo maheró.

¹⁴Quko asá yerewí uni irisa ŋu o tewero ŋuro iŋori newondeyari piyo tiní kowe punu-punuyari se romboŋero khengeŋoro unipare qambu keweroyemo uyare nekero ŋande yariyó, ¹⁵“Olike, ye date koro ŋande teteŋgo? Noreko uni, ye qembe nange. Norendo miti mande^e ŋa yeno ŋande yeyotero, o kina-kina qu se potoruku re inoyotengo ŋu rotoya rohoréŋoya Anutu yoto-yotoyó moré ŋuro iŋoyi. Anutu ŋuko noko sambo windi towaró. Ŋuya o soso ŋuno yote ŋu yondowaró. ¹⁶Hamó, usisamba naruko ŋuno enendo uni wini soso yorotoní ene oteteye nange howeyango. ¹⁷Quko Anutuko kina kama yorotoyara. Kini, suki-suki o meté te yunoyara. Enendo sono riní sambo rotoro yeno umbuní khono o meté-meté ŋu siyoní woteyote. Ko o qoyembo se yunoní newondeye niŋgu-niŋgu teyote.” ¹⁸Asa ŋunde yariyó, quko unipare qambu ŋundo wimbu o qa-qa te yunowero tiqo, kusi yerewero quhurí tariyó.

¹⁹Quko Juda uni kumi Antiok noŋgo, Aikoniam noŋgo qu mahero unipare qambu quro iŋo-iŋoye ri otoqaró. Otoqoní wondo raŋoro Pol utoro, ene khuma, yero iŋoro ukúŋo re wosoro yendé sumeyoro rotaŋgurí. ²⁰Quko Yesu koro iŋo-iŋo rewero unipareto mahero wuririyo Yuri Polko pitu ko otoqoro yendémo oŋgurí. Ko saraŋoníqo, eneya Barnabas koya Deripe yendémo ŋuno oriyó.

Siria mirako Antiok yendémo ŋuno pitu ko oriyó

²¹Asa Deripe yendémo ŋuno miti mande^f yeyuriqo, unipare qambu qundo iŋo-iŋo rewero unipare tunoqaŋgurí. Yate irisa ŋundo rohoréŋoro pitu ko Listira, Aikoniam, Antiok^g uriyó. ²²Uro yendéne-yendéne ŋuno iŋo-iŋo rewero unipare ŋu wikundi yerero ŋande yariyó, “Ye iŋondutu watí teyuri qembe. Nore Anutuko unipareyó wiri yereyote naruyómo^h oweroro koretero quhurí qambu korowowato,” yariyó. ²³Huru-huru

^d 14:12 *Kape unipare* kumimbo anutu qambu quro potoruku te yunoyangurí, ko anutu ŋuro kembéye ŋuko owí muko, “Sus.” Meyowo ka, owí muko “Heremes,” enendo Sus koro mandí unipare yimitoyaró. ^e 14:15 “*miti mande*” ŋuko Anutuko *Kristo* asáŋoní khumoro quhurínanimboro kimo tiní Anutu koya newonde kanata tewero ŋuro mande meté mu nange. ^f 14:21 “*miti mande*” ŋuko Anutuko *Kristo* asáŋoní khumoro quhurínanimboro kimo tiní Anutu koya newonde kanata tewero ŋuro mande meté mu nange. ^g 14:21 Yendé ŋu, “Antiok,” ye nekaŋgurí, ŋuko Pisitia mirako ŋuno yora. Antiok meyowo kato Siria mirako ŋuno yora. ^h 14:22 “*Anutuko unipareyó wiri yereyote naruyómo*” ŋuno iŋondutu unipareko hamó Anutu kusunoyómo yowango.

kanata-kanata quno ñuno uni kumi Uni Parámi iñondutuwoyanguří qu yorero huru-huru koro tapá uni rokó yiririyó. Rokó yerero kundiní teroⁱ hariri tero Uni Parámimboro kandímo yorotariyó. ²⁴Ñu nongo uyaro Pisitia mirawore uyaro, yate Pambilia mirako ñuno uriyó. ²⁵Ñuno uro Perika yendémo oro mande yesoworo rotoro Atalia yendémo ñuno uriyó.

²⁶Atalia ñu nongo wangowore toñero Antiok^j uyaririyó. Komo Antiok unipareto kho tewero quro rokó yiriqo, Anutu koro samaka-samaka tuwó quwore toñiriyó. Asa kho ñu kini tiní pitu ko mahiriyó. ²⁷Mahero huru-huru unipare ñuno quya koporo Anutuko o soso enewore taró ñuro piña mande ñande yariyó, ko Anutuko uni wini meyowo^k mako koso yunoní iñondutu tanğurí. ²⁸Ñunde yero irisa naru piru sanğa iño-iño rewero unipare ñuya yanğurí.

Huru-huru koro tapá uni Yerusalem ñuno huruwanguří

15 ¹Asa uni kumimbo Judia mira rotoro Antiok yendémo^l ñuno umburo iñondutu uni mande rondaqe yunoro ñande yanğurí, “Ye Mosesko^m murí rondaqe yunaró ñu howero koweye kama toñowango tiníqo, Anutuko rambaruru koñgo ye kama yoreweya.” ²Ñunde yiyo, Pol koya Barnabas koya sanğirí parámi tero eneya mandeto kuma tanğurí. Ñunde ñuro uni topo ñundo Pol, Barnabas ko uni kumi meyowo ñuya Yerusalem oro asá yerewí uniⁿ ñuya huru-huru koro tapá unindoya mande roñgaruwowero quro rokó yerengurí. ³Rokó yerero huru-huru unipareto asá yiri uyaro Ponisia mira, Samaria mira kewerowore onğurí. Oyate uni topo ñuno piña mande ñande yimiranğurí, ko uni wini meyowo kumimbo Anutusina newonde rohoré tanğurí, yimiri niñguniñgu parámi tanğurí. ⁴Oyate Yerusalem mahiqo, huru-huru uniparetoya asá yerewí unindoya huru-huru koro tapá unindoya yorero onğurí. Ko Pol koya Barnabas koya Anutuko o soso enewore taró ñuro yariyó. ⁵Quko iñondutu uni kumi Farisi wini koñgo qundo otoqoro ñande yanğurí, “Ye ñande yi qembe, ko uni wini meyowo qundo eneño koweye toñoya^o Moses koro hutuño mande ñu howewango.”

ⁱ 14:23 “kundiní” teyanğurí quno ñuno unipareto Anutu iñoro eneño ri umbuní naru kanata, irisa ñundiro o kama nanğurí. ^j 14:26 Yendé ñu, “Antiok,” ye nekanğurí, ñuko Siria mirako ñuno yora. ^k 14:27 “uni wini meyowo” ñunde quko Juda unipare kini qu nanqe. ^l 15:1 “Antiok yendé” ñuko Siria mirako ñuno yora. ^m 15:1 Komo suki “Mosesko” uni parámi tero Israel unipare sopo yereró. Anutuko *Sainai* purímo *hutuño mande* inoní mande ñu rondaqe unipare yunaró. ⁿ 15:2 “asá yerewí uni” ñuko Yesuko rokó yerero asá yiriní eneño khoyó tanğurí. ^o 15:5 “kowe toñowero” murí muko ñandiro: Juda pareto simó urumuni ka pisiyoní kosa naru kande sanğiyoro kapusa ñunde rotoní *hutuño mande* howero kowí toñanğurí. Ñunde tero eneko Anutu koro simó rokóñanğurí. Ko uni wini meyowo qu kato mahero Anutu potoruku tewero kondé iñaró tiníqo, ene ñuyako eneño kowí toñanğurí.

⁶Yiqo, asá yerewí unindoya tapá unindoya mande ŋu roŋgaruwowero kopañgurí. ⁷Koporo mande qambu yiqo, Pitako kaŋero ŋande yimiraró, “Uni topo, ye iŋotenggo, Anutuko komo ye keweroyemo no rokó niriní miti mande^p rero uni wini meyowo yunoyowe iŋoro iŋondutu taŋgurí. ⁸Anutuko unipare soso newondeye qene iŋoyote, ko enendo uni ŋuro newondeye qene iŋoro nore nunaró ŋunde qembe Yuqa Surumí re yunaró. ⁹Ŋunde tiníqo, kato noreya eneya ronda yerewero mepémo kini. Anutuko enejo iŋondutuyewore newondeye riní sara taró. ¹⁰Ŋunde ŋuroko ye date koro, Anutu towoŋato, yero iŋoyotenggo? Ye o quhurí piyimi ŋa rero Yesu koro iŋo-iŋo rewero unipareyó^q saŋayemo ma kusiyowero. Komo usi-sinanimboya nore ŋuya quhurí ŋu korowowero mepémo kini. ¹¹Quko uni wini meyowo ŋundo nore iŋondutu tatowó ŋundiro naŋge Uni Parámi Yesu koro samaka-samaka tuwó ŋuwore iŋondutu tiqo, rambaruru koŋgo yoreweya.”

¹²Ŋunde yiní kini tiní mondó yuri Pol koya Barnabas koya Anutuko o wimbí moré^r enesó-enesó kandeyarimo uni wini meyowo keweroyemo taró ŋuro yariyó. ¹³Ŋunde yiriqo, Jemsko ŋande yaró, “Uni topo, mandene ŋa iŋoyi. ¹⁴Koretero Saimon ŋande yete, ko Anutuko mahero uni wini meyowo kumi yoriní enejo unipareyó tunoqaŋgurí. ¹⁵Ko ye-ye unindoro mandeye ŋuko ŋundiro naŋge. Komo suki ŋande nakayáŋŋgurí,

¹⁶“Imemoŋgo pitu ko mahero

Dewitko ya qu komo toqaró ŋuko nondo pitu ko rewano.

Ya ŋuro oyó kumi piyo taró,

ŋuko nondo keta rewe pitu ko kaŋeweya.

¹⁷Ŋunde tero uni watí yotenggo ŋuya

uni wini meyowo soso neneŋo owéne towoyotenggo ŋuya

Uni Parámi seqawaŋgo, peka.

Uni Parámi o soso ŋu riní tunoqete ŋundo ŋundiro yete.

¹⁸ Komo suki o soso ŋuro iŋatowó.

¹⁹“Ŋunde ŋuro no iŋo-iŋone muko ŋandiro: uni wini meyowo qundo Anutusina newonde rohoré teyotenggo, nore koweyumu kama yunowato. ²⁰Kini, nore sokome ka eneno nakayáŋoro ŋande yimirowato, ko oka unindo rero anutu kota-kota te inaŋgurí ŋu ma newero, ko se simbururu ma tewero, ko númbowe unindo puŋeye kusiyoyi khumi ŋu ma newero, ko sitú ŋuya ma newero. ²¹Dokoro komo suki yate-yate

^p 15:7 “miti mande” ŋuko Anutuko *Kristo* asáŋoní khumoro quhurínanimboro kimo tiní Anutu koya newonde kanata tewero ŋuro mande meté mu naŋge. ^q 15:10 “iŋo-iŋo rewero unipare” ŋunde qundo rondaqe-rondaqe unindoya uyaro iŋo-iŋo yunoyaró. ^r 15:12 “o wimbí moré” ŋuko o enesó-enesó tunoqiní Anutu koro wimbí ŋunde tunomo yoweya.

itaka ñuya Sapat naruko^s unindo Moses koro hutunjo mande ñu Juda koro huru-huru yayemo weyo yesowoyotenjo.”

**Tapá unindo inondutu unipare uni wini meyowo
ñuro sokome ka nakayáñgurí**

²² Ñunde ñuro asá yerewí unindoya^t tapá unindoya huru-huru unipare soso ñuya mande kusiyoro keweroye monjo uni irisa rokó yerero Pol koya Barnabas koya Antiok uwero rokó yerengurí. Jutas, owí kako Barisapas, koya Sailas rokó yerengurí. Huru-huru koro tapá uni irisa ñu asá yerero ²³ sokomeko mande ka nakayáñoro kandeyarimo ri toñengurí. Mande ñuko ñandiro,

Asá yerewí unindoya tapá unindoya, yeño topo-topoye, sokome ña nakayáñato ye uni wini meyowo inondutu tero Antiok yendé, Siria mira, Silisia mirako yotenjo qu, yeno uyarete. Kosa meté.

²⁴ Nore koñgo ñande inatowó, ko uni kumi nore koñgo uro mande kondé ka yimiriqo, inondata tero yeño injo-injoye quhurí teyara. Quko norendo mande ñu yewero kama asá yeretowó. ²⁵ Asa ko nore newonde kanata na tero mande kusiyoro uni topo irisa rokó yerero asá yereto noreño toponani horé Barnabas, Pol ñuya yeno utenjo. ²⁶ Irisa ñuko eneño yoto-yotoyari rotoro Uni Paráminani Yesu Kristo^u koro owímo khoyó teyotiri. ²⁷ Ñunde ñuro norendo Jutas koya Sailas koya asá yeretowó. Eneño manjogoyarimbo mande ña re ye yunowari. ²⁸ Dokoro Yuqa Surumímboya noreya ñande ye inatowó, ye meté otete kumi nange howewango, o quhurí meyowo ye sañayemo kama rewato. ²⁹ Otete ñuko ñandiro, ye oka unindo rero anutu kota-kota o te yunangurí ñu ma newero, sitú ñuya ma newero, númbowe unindo puñeye kusiyoyi khumi ñu ma newero, se simbururu ma tewero. Ko ye o ñu takawango tiniqo, meté yowango.

Ime yuri.

³⁰ Asa asá yiri Antiok uro unipare kopo yerero sokome ñu re yunangurí. ³¹ Unipare sokome ñu weyoyi newondeye wikundiyoní ñingu-

^s 15:21 “Sapat naru ” ñuko sonda naru weña ñu. Ñu naruko ñuno Juda unipareto huru-huru yayemo huruworo Anutu koro mandí weyoyi inoro hariri teyangurí. ^t 15:22 “asá yerewí uni ” ñuko Yesuko rokó yerero asá yirini eneño khoyó tangurí. ^u 15:26 “Yesu Kristo ” - komo suki ye-ye unindo Anutuko uni ka rokóñoni mahero wiri yerete uni parámi horé tunoqeweya qu karo yangurí. Juda unipareto uni maheweya ñu, “Kristo,” ma, “Mesaiya ,” ye nekangurí. Asa Yesu mahini eneño unipareyó, “Kristo Yesu,” ma, “Yesu Kristo,” nange ye nekangurí.

ningu taŋgurí. ³²Jutas koya Sailas koyako ye-ye uni. ^vƆjunde ŋuro mande meté qambu uni topo yimitoro wikundi yiririyó. ³³Yate naru piru ŋunde rotoní uni topo ŋundo uni irisa ŋu yorero imemo asá yiri oro unindo asá yiri mahiriyó quno ŋuno pitu ko oriyó. ³⁴(-) ^w ³⁵Quko Pol koya Barnabas koya Antiok ŋuno yariyó. Irisa ŋuya meyowo ŋuya mande rondaqe unipare yunoro miti mande^x yesowoyaŋgurí.

Pol koya Barnabas koya mande saŋgirí tariyó

³⁶Imemoŋgo ta Polko Barnabas ŋande miraró, “Nore irisa oya uni topo yendémo Uni Parámimboro mande qu yesowarowó quno yoteŋgo ŋundo date yoteŋgo, ŋu qene iŋowaro.” ³⁷Barnabasko Jon, owí kako Mak, ŋu re ŋuya owero ye iŋaró. ³⁸Quko Polko ŋande yaró, “Uni ŋako komo Pambilia yendémo ŋuno norotaró ŋuno qu, enendo noreya kho kama taró, ŋunde ŋuro noreya kama uwato.” ³⁹Ɔjunde yero kiro puso tero usowo-sowo tariyó. Barnabasko Mak rero waŋgowore Saipras noko mosowímo ŋuno oriyó. ⁴⁰Polko Sailas riní uni topo ŋuno qundo ŋande yaŋgurí, “Uni Parámimboro samaka-samaka tuwó yariya yoweya,” yi toŋiriyó. ⁴¹Toŋero Siria mirawore ko Silisia mirawore uyaro Anutu koro huru-huru ŋu rukiso yereyariyó.

Timotiko Pol koya kopariyó

16 ¹Asa Polko uyareyate Deripe yendémo ŋuno uroqo Listira yendémo ŋuno ŋuya uró. Ɔjunoko Yesu koro iŋo-iŋo rewero uni ka⁷ ŋuno yora, owí Timoti. Juda pare ka iŋondutu taró, ŋuro naŋuní, quko iwí muko Grik uni ka. ²Topo unipare Listira noŋgo ko Aikoniam yendé moŋgo qundo oteteyó ŋuro ŋande yaŋgurí, “Timoti ŋuko uni meté.” ³Polko Timoti koya toŋewero ye iŋaró. Ɔjunde ŋuro Juda uni ŋuno yaŋgo ŋuro iŋoro Timoti re kowí toŋaró. Dokoro uni soso iŋaŋgurí, Timoti iwí muko Grik uni ka.^z ⁴Asa toŋero uyareyate yendéne-yendéne oro, komo asá yerewí unindoya^a tapá unindoya Yerusalem ŋuno mande kusiyoro sokome ŋu nakayaŋaŋgurí qu, ŋu rero unipare yunaŋgurí. Yunoro ŋande yimiranŋurí, “Ye ŋu naŋge howeyuri.”

^v 15:32 “ye-ye uni ” ŋuko Anutuko mandí yunoní unipare yunaŋgurí. ^w 15:34 Komo suki Lukiko sokome soso ŋa nakayaŋaró, yate-yate uni meyowombo mande ka sowe taró. Mande ŋuko ŋandiro: ³⁴Quko Sailas ŋuno yorowero ye iŋaró. ^x 15:35 “miti mande ” ŋuko Anutuko Kristo asáŋoní khumoro quhurínanimboro kimo tiní Anutu koya newonde kanata tewero ŋuro mande meté mu naŋge. ^y 16:1 “iŋo-iŋo rewero uni ” ŋunde qundo rondaqerondaqe unindoya uyaro iŋo-iŋo yunoyaró. ^z 16:3 “kowe toŋowero” murí muko ŋandiro: Juda pareto simó urumuni ka pisiyoní kosa naru kande saŋiyoro kapusa ŋunde rotoní hutuŋo mande howero kowí toŋaŋgurí. Ɔjunde tero eneko Anutu koro simó rokóŋaŋgurí. Ko uni wini meyowo qu kato mahero Anutu potoruku tewero kondé iŋaró tiniŋo, ene ŋuyako eneŋo kowí toŋaŋgurí. ^a 16:4 “asá yerewí uni ” ŋuko Yesuko rokó yerero asá yiriní eneŋo khayó taŋgurí.

⁵Ɔunde Ɔuro unipare iƆondutuye kondé horé tiní naru rokóƆoro huru-huru Ɔundo sowe tiní qambu tunoqeyara.

Polko Masedonia koro uni ka quko qeneró

⁶Asa Yuqa Surumímbo Pol koya topémboya soré yerero Esia mira parámi quno Ɔuno mande ma yesowowero Ɔunde yero soré yereró. Asa ko Pirikia mira ko Galesia mira kewerowore yateyaƆurí. ⁷Yate-yate Misia mira koro wembóƆgo Ɔuno mahero Bitinia mirako uyarewero ye iƆaƆurí. Quko Yesu koro Yuqa Ɔundo soré yereró. ⁸Asa ko Misia mira Ɔu takaro windi tapémo Tiroas yendémo Ɔuno uƆurí. ⁹Suwono Polko Masedonia mira koƆgo uni qu ka quko qeniní kaƆero Pol nekoro Ɔande miraró, “Ke windi karóƆoya Masedonia Ɔano mahe nore samaka yere,” yaró. ¹⁰Ɔunde qenero nore Ɔande iƆatowó, ko Anutuko miti mande^b Ɔuno yesowo yimirowero neko nereró. Ɔunde Ɔuro Masedonia uyarewero sunará tatowó.

Litiako iƆondutu taró

¹¹Asa Tiroas noƆgo waƆgowore roneneƆo karóƆoro Samotires noko mosowímo Ɔuno uyatowó. Ko saraƆoníqo, Neapolis yendé windi tapémo Ɔuno otowó. ¹²Ɔu noƆgo Filipai yendémo khewore otowó. Komo Rom unindo yendé Ɔu rero Ɔuno kunditeyaƆgo.^c Ɔuko Masedonia mira koro yendé korete qu. Nore naru piru ta yendémo Ɔuno yatowó.

¹³Asa Sapat naruko^d Ɔuno yendé rotoƆo hariri tewero mira tomó ka seqaro sono kano utowó. Uro kunditero pare kumi Ɔuno kopoyaƆurí Ɔu yiyoro eneya mande yatowó. ¹⁴Taiataira mira koƆgo pare ka, owí muko Litia, Ɔundo mande Ɔu iƆaró. Enendo tuwi mandumi huririyó soweyoyara,^e ko Anutu potoruku te inoyara. Asa iƆoní Uni Parámimbo newondí riní Polko mande yaró Ɔu iƆondutuwoyaró.

¹⁵IƆondutuwoƆo eneya suwisawiyómboya sono raƆurí. Ri kini tiní nore nimiraró, “Ye nondo Uni Parámimbo hamó iƆondutu teyoteno, yero iƆotengeƆo tiníqo, asa meté mahero yanemo yuri qembe.” Ɔunde yiniqo, eneya uyatowó.

Unindo Pol, Sailas yorero kusi-kusi yano yorotaƆurí

¹⁶Naru kano nore hariri tewero mira tomómo Ɔuno utoqo kho pare kato kheko wisumu nerero niyaró. Yuqa kato pare newondímo yoní

^b **16:10** “*miti mande*” Ɔuko Anutuko *Kristo* asáƆoní kumoro quhurínanimboƆo kimo tiní Anutu koya newonde kanata tewero Ɔuro mande meté mu nanqe. ^c **16:12** “*Filipai yendé*” Ɔuko Masedonia mirako yora. Komo suki *Rom* unindoro kuma unindo yendé unipare Ɔu taka yerero yendé sopoyaƆurí. ^d **16:13** “*Sapat naru*” Ɔuko sonda naru weƆa Ɔu. Ɔu naruko Ɔuno Juda unipareto *huru-huru yayemo* huruworo Anutu koro mandí weyoyi iƆoro hariri teyaƆurí. Filipai yendémo Ɔuno Juda koro huru-huru ya moré kini peka. ^e **16:14** Tuwi mandumi huririyó Ɔunde quko kimoyó parámi, asa ko Litiako wondo pare ka peka.

enejo mangómo do ka imemo tunoqeweya njuro yeyara, ko unipareto mandí iñowero wondo parámi enejo sopo-sopoyó yunoyangurí. ¹⁷Asa enendo nore nohowero kondé ñande kiweyaró, “Uni ñako Anutu Koreko Horé yote njuro sunará simóño. Enendo rambaruru takawero kheyó ye yimitoyotenjo,” yaró. ¹⁸Kosa naru qambu njuno pare ñu ñunde te yate-yate Pol njuro piyimiñoro rohoréñoro yuqa ñu ñande miraró, “No Yesu Kristo^f njuro owímo kimiroteno, pare ña roto toñe!” Ñunde yiniqota roto toñeró.

¹⁹Asa yuqa ñu roto toñiní pare njuro sopo-sopoyómbó ñande ye iñangurí, ko wondo kañuya kama rewango. Ñunde njuro Pol koya Sailas koya yondoworo yowosoro tapá uni kopoyango quño oñgurí. ²⁰Yorero mande ronda-ronda uni toñeyemo oro ñande yimirangurí, “Juda uni irisa ñando noreño yendé unipare qu okoko yiriri newondeye piyo tete. ²¹Enendo murí ka rondaqe yunoyotiri, quko nore Rom unipareto muriye ñu howewero mepémo kini.”

²²Unipare qambu qundo uni irisa ñuya kiro puso yero yesará yerengurí. Ko mande ronda-ronda unindo kumba tukuni yangurí, kowe punu-punuyari se rotoya kumukopo yuto haususu yiri. ²³Ñunde yiqo, kumukopo qambu yutoro yorero kusi-kusi yano yorotangurí. Yorotoro mande kondé ka kusi-kusi ya koro sopo-sopo ñu mirangurí, ke ña meté sopo yere qembe. ²⁴Mande kondé ñu iñoro sopo-sopo uni ñundo yorero kusi-kusi ya quroko yorotoro kheyari kewá irisa-irisa keweroko quño njuno kusi yereró.

²⁵Suwo keweroko Pol koya Sailas koya Anutuware hariri tero yambo yeyori kusi-kusi uni kumi iñangurí. ²⁶Asa waka ta kunduru parámi ka rañoro kusi-kusi ya tatáño soso toño wisiyoní ya mako soso kosoní utó kondé qu kusi-kusi uni kandeyemo ñu soso tondañaró. ²⁷Ñunde tiní sopo-sopo uni ñu otoqoro kusi-kusi ya mako qeneró muko soso kosoro koñgó taró. Qenero kusi-kusi uni soso soretenjo, peka, ye iñoro suke parámi ka wosoro eneño kowí uto khumowero taró.[§] ²⁸Quko Polko kondé nekaró, “Koweke ma rambaruruwowero! Noreko soso ñana yoteto!”

²⁹Sopo-sopo uni ñu suru koro nekoní re mahe inoyi toworo kheñgeñoro ya quroko oro khe kandí yukuwoní Pol, Sailas tañgeyarimo umbu rañaró. ³⁰Asa yore yondoworo mirako umburo ñande yaró, “Awa-awane, no date tero rambaruru takawano?”

³¹Yini ñande yariyó, “Ke Uni Parámi Yesu koro iñondutu tekata, Anutuko keya suwisawikepoya yoriní rambaruru takawango.” ³²Ñunde

^f **16:18** “Yesu Kristo ” - komo suki *ye-ye unindo* Anutuko uni ka rokóñoní mahero wiri yerete uni parámi horé tunoqeweya qu karo yangurí. Juda unipareto uni maheweya ñu, “Kristo,” ma, “*Mesaiya* ,” ye nekangurí. Asa Yesu mahiní eneño unipareyó, “Kristo Yesu,” ma, “Yesu Kristo,” nange ye nekangurí. [§] **16:27** Sopo-sopo uni ñundo ñande ye iñaró, ko kusi-kusi uni soso sorewango tiníqo, enendo topé piyimi reweya. Ñunde njuroko koretero eneño kowí uto khumowero ye iñaró.

yero eneya suwisawiyómboya Uni Parámimboro mande qu re yunariyó.
³³ Ko suwo keweroko nanje sopo-sopo uni ñundo yorero mamayari sonowaró. Sonowoní eneya suwisawiyómboya yorero sono re yunariyó.
³⁴ Ñunde tiriqo, yorero yayómo oro o qoyarimboro yunaró. Ko yano kopoyañgurí ñundo ningun-ningu parámi tañgurí, dokoro enendo Anutu inondutuwoyaró.

³⁵ Asa sarañoníqo, mande ronda-ronda unindo kumba tukuni asá yiri mahero yañgurí, “Keto uni irisa ñu yorotoka toñjiri.” ³⁶ Yiri kusi-kusi ya sopo-sopo ñundo Pol miraró, “Mande ronda-ronda unindo yari yorotika toñjiri yeteñgo. Ñunde ñuro kusi-kusi ya roto toñjiri newondeyari ime yoní.”

³⁷ Quko Polko kumba tukuni yimiraró, “Nore irisa ñako Rom uni, ko o piyimi ka kama taro. Quko ronda-ronda uni ñundo nore nondoworo unipare toñeyemo haususu nerero kusi-kusi yano ñano norotañgo. Ko itaka mondó ta noroti toñewaro, peka? Kini horé! Eneñombo mahero norero eneya mirako amuno uwato.”^h

³⁸ Asa kumba tukunimbo ronda-ronda uni mande ñu yimirañgurí. Yimitoro, irisa ñuko Rom koro uni qu, yi ñoro sasaro tañgurí. ³⁹ Uyaro o piyimi tañgurí ñuro yuñguna yerero yorero yendémo umburo kira yerañgurí, ko mira ña rotoya mira meyowomo toñjiri. ⁴⁰ Ñunde yiqo, kusi-kusi ya roto Litiako yano oriyó. Oro uni topo ñuno yiyoro newondeye rukisoyoro toñjiryó.

Tesalonaika yendémo mande yesowori kuma tañgurí

17 ¹ Asa Pol koya Sailas koya kheyarimbo yate Ambipolis yendé ko Apolonia yendéwore uyareyate Tesalonaika yendémo oriyó. Yendémo ñuno Juda koro huru-huru ya qu ka ñuno yora. ² Asa Sapat naruⁱ kapusa ñunoko Polko eneño murí howero huru-huru yano oro Anutu koro sokome ñu^j rondaqe yunoro ³ ñande witú yereró, ko mande ñuko ñande yete, Kristo ñuko hamó kowe surumí rero khumoro pitu ko otoqoweya. Ko ñande yaró, “Kristo ñuko^k Yesu na, nondo eneño yesowoyoteno ña.” ⁴ Ñunde yini Juda unipare kumimboya Grik unipare Anutu potoruku te inoyañgo qambu ñuya yendé ñuro pare pará-pará kumimboya inondutu tero Pol koya Sailas koya kopañgurí.

^h 16:37 Polko Rom koro uni, ñuya Juda koro uni qu ka. Komo, eneño iwímbope ma usí peka owé ka rero Rom koro uni tunoqaró. Ñunde ñuroko iwímboro sowe qu ñuya Rom koro uni tañgurí. Rom uni ñunde quko oteteyembo topé piyimi kina kama rañgurí. Asa ko ronda-ronda unindo o piyimi Pol te inañgurí ñuko Rom koro hutuño mandeye ñunde wendaqañgurí. ⁱ 17:2 “Sapat naru ” ñuko sonda naru weja ñu. Ñu naruko ñuno Juda unipareto huru-huru yayemo huruworo Anutu koro mandí weyoyi ñoro hariri teyañgurí. ^j 17:2 “sokome” ñuko Anutu koro mande korete qu, asa Murí Tero yate Malakai kini tete. ^k 17:3 “Kristo ” ñuko Anutuko rokóñoní mahero wiri yerete uni parámi horé tunoqaró ñu.

⁵Quko Juda uni kumimbo ŋuro newonde tutu tero uni piyimi kina yendémo wimbo-wimbo kunditeyaŋgo ŋuya unipare qambu ŋuya yorero kuma tunoqewero newondeye kasiyaŋgurí. Asa enendo Pol, Sailas yowosoro mande khono yorotowero quro Jesonko ya qu wisumuŋoro seqa yereŋgurí. ⁶Irisa ŋu kama yiyoro Jeson koya uni topo kumimboya yowosoro yendé ŋuro tapá uni toŋeyemo yorotoro kondé ŋande yaŋgurí, “Uni ŋu mira soso ŋuno unipare newondeye roworemoyotiri ŋundo yendé ŋano mahetiri ŋa. ⁷Ko Jesonko uni ŋu yore ene yano oró. Uni ŋako Sisa¹ koro hutuŋo mande soso ŋu wendaqero ŋande yeyoteŋgo, wiri yerete uni parámi kaŋuya yote, owí muko Yesu.” ⁸Ŋunde yiŋo, unipare qambu ŋuya tapá unindoya iŋondata parámi taŋgurí. ⁹Ŋunde ŋuro tapá unindo yimiri Jeson koya uni meyowo ŋuya mone yuni towi roto toŋeŋgurí.

Beria yendémo mande yesowori meté iŋaŋgurí

¹⁰Asa suwo tiníŋo, uni topo ŋundo Pol koya Sailas koya asá yiri Beria yendémo ŋuno uyaririyó. Ŋuno Juda koro huru-huru ya^m quroko oriyó. ¹¹Beria unindoro muriye muko meté horé, ko ŋundo Tesalonaika yendé unindoro muriye takaró. Irisa ŋundo mande yariyó ŋu iŋoro metéŋoyaŋgurí. Kowe naru rokóŋoro mandeyari ŋu hamómbe ma kini iŋowero quro murí Anutu koro sokome quⁿ weyo seqayaŋgurí. ¹²Ŋunde ŋuro Juda uni qambu iŋondutu taŋgurí. Grik pare kumi owéye moré ko Grik uni qambu ŋuya iŋondutu taŋgurí.

¹³Asa Juda unindo Tesalonaika ŋuno ŋande iŋaŋgurí, ko Polko Beria ŋuno Anutu koro mande yesowoyaró. Ŋunde ŋuro ŋuno mahero unipare qambu wimbo-wimbo yoraŋgo ŋu newondeye kasiyoyi sangirí taŋgurí. ¹⁴Waka ta uni topo ŋundo Pol asáŋoyi windi tapémo uró, quko Sailas koya Timoti koyako Beria ŋuno yariyó. ¹⁵Asa unindo Pol re kheko umbuŋgurí, reyate Atens yendé parámimo rotaŋgurí. Rotoro pitu ko oro Polko Sailas, Timoti koro mande kondé ka yaró ŋu re oŋgurí. Mande ŋuko ŋandiro, “Yari waka ta nono mahiri qembe,” yaró.

Polko Atens yendé parámimo ŋuno mande yesowaró

¹⁶Asa Pol Atens yendé parámimo ŋuno sopo yereyate yendémo ŋuno anutu kota-kota koro kapí-kapí qambu towoyuri qeneró. Ŋuro newondí piyo taró. ¹⁷Ŋunde tero ene huru-huru yano^o oro Juda unindoya uni wini meyowo Anutu potoruku te inoyaŋgo quya mande taró. Ko naru

¹ 17:7 “Sisa” ŋuko Rom koro wiri yerete uni parámi ŋu. Rom unindo mirane-mirane wini soso sopo yereŋgurí. ^m 17:10 “huru-huru ya” ŋuko Juda uniparetoro ya parámi mu. *Sapat naruko* ŋuno hu-hariri tero Anutu koro mandí weyoyi iŋoro hariri teyaŋgurí. ⁿ 17:11 “sokome” ŋuko Anutu koro mande korete qu, asa Murí Tero yate Malakai kini tete. ^o 17:17 “huru-huru ya” ŋuko Juda uniparetoro ya parámi mu. *Sapat naruko* ŋuno hu-hariri tero Anutu koro mandí weyoyi iŋoro hariri teyaŋgurí.

rokóŋoro kopo-kopo yendémo oro unipare ŋuno kopoyango ŋuya mande taró. ¹⁸Kopo-kopo yendémo ŋuno iŋo-iŋo uni kumimbo mahero eneya mande taŋguri. Uni kumi ŋuko, “Epikurian,” ye nekoyanguri, ko kumi, “Stoik,” ye nekoyanguri.^p Kumi ŋande yanguri, “Uni ŋako wuruwara mande yeyote. Do ka yewero yete?” Quko kumi, “Mira meywomboro anutuye ŋuro yesowoyote, peka,” yanguri. Ŋunde yanguri, dokoro Polko Yesu uni tapu koŋgo pitu ko otoqaró ŋuro miti mande yesowaró. ¹⁹Asa ko Pol rero tapá unindoro huru-huru ŋu, owé muko Areopakus, ŋuno onguri. Oro ŋande yanguri, “Ketope meté mande keta rondaqe yunoyote ŋu nore nimirí iŋowato? ²⁰Hamó, mande amana yi iŋoteto, ko muri ŋuro iŋowero ye iŋoteto.” ²¹(Atens yendémo ŋuno naru rokóŋoro uni soso, asa mira simburí ŋuya mira meywowa quya, kina kaŋero mande amana ŋu iŋoro mande ŋuro epe mito-mito teyango.)

²²Asa Polko Areopakus huru-huru keweroyemo kaŋero ŋande yimiraró, “Ye Atens uni, nondo yeŋo muriye qeneyoteno, yendo naru rokóŋo anutu enesó-enesó potoruku te yunoyoteŋgo. ²³Hamó, nondo yendéyewore uyareyate o ŋuro potoruku te yunoyoteŋgo qu qeneyoteno. Qenero wondo yakutí ka^q qeneteno, ko ŋuno ŋande nakayánguri, ‘Ŋako anutu ka nore kama iŋo inoteto quro wondo yakutí.’ Asa itaka nondo Anutu ye kama iŋo inoyoteŋgo, quko potoruku te inoyoteŋgo ŋuro yesowowe teteno.

²⁴“Anutu ŋuko noko koya o soso ŋuno yorote ŋuya yondowaró, Anutu ŋuko noko sambo koro uni parámi ŋu. Ŋunde ŋuro eneko unindo ya kandeyembo toyanguri quno ŋuno kama kunditeyote. ²⁵Kowe o karo tukuni tiní unindo kandeyembo kama samakanoyoteŋgo. Kini, eneŋombo uni soso yoto-yotoye ŋuya yuqaye ŋuya soso yunoyote. ²⁶Enendo puko kanata naŋge qu noŋgo uni wini soso yondowoní tunoqi mirane-mirane yorotaró. Ŋunde tero eneŋombo naruye yunoro miraye rokóŋaró. ²⁷Ŋunde tero, unindo no seqa nerewero wimbo-wimbo toŋeteroqi niyowango, peka, ye iŋaró. Ko enendo nore soso taŋgenanimo yote. ²⁸Hamó, yeŋo iŋo-iŋo uniye kato ŋande yaró, ‘Ene quroyómo naŋge norendo kunditero otoqo uya mahe tero yoteto,’ yaró, ko kako ŋande yaró, ‘Noreko eneŋo simó,’ yaró.

²⁹“Asa, nore Anutu koro simó yoteto, ŋunde ŋuro oka unindo yero iŋoro towaró qu, asa gol kape ma silwape ma wondo ŋuko Anutu qembe yero ma iŋowero. ³⁰Ŋunde ŋuroko komoko Anutuko yeŋo oteteye kape-

^p 17:18 Iŋo-iŋo uni ŋu, “Epikurian ” unindoya “Stoik ” unindoya iŋo-iŋo enesó-enesó howeyanguri. Uni wini meywombo anutu enesó-enesó potoruku te inoyanguri, Anutu hamó ŋuro kama iŋanguri. Huru-huru irisa ŋundo anutu soso ŋu yorotoro eneŋo iŋo-iŋoye naŋge howeyanguri. ^q 17:23 “wondo yakutí” ŋuko o qa-qa unindo ŋu yakutímo ŋuno o qa-qa taŋguri.

kape ŋuro kama iŋaró, quko itakako ŋande yete, ye uni noko soso ŋuno yoteŋgo qu, ye newonde rohoré ti. ³¹Dokoro enendo otete roneneŋowí howero uni soso ronda yerewero quro naru ka rokóŋaró. Ko ronda-ronda uni ka rokóŋaró. Nore meté uni ŋu iŋondutuwowato, dokoro uni ŋu khumoní Anutuko uni tapu koŋgo riní otoqaró.”

³²Ŋunde yiní uni ka uni khumaró qundo pitu ko otoqaró ŋuro mandí iŋaŋgurí quno ŋuno kumimbo huwó mande yaŋgurí. Ko kumimbo ŋande yaŋgurí, “Norendo pitu ko o ŋaro iŋowato.” ³³Yiqo, Pol yorotoro toŋeró. ³⁴Toŋiní uni kumi iŋondutu tero eneya womaŋgurí. Ŋuko Daionisias, Areopakus huru-huru ŋu noŋgo qu ka, ko pare ka, owí Damarisi, ko kumi meyowo ŋuya.

Polko Korin yendémo ŋuno mande yesowaró

18 ¹Imemoŋgo Pol Atens yendé rotoro Korin yendémo oró. ²Komo Rom koro wiri yerete uni parámi horé Kolotias ŋundo hutuŋo mande ka yero Juda uni soso Rom yendé moŋgo yohowiní toŋeŋgurí. Ŋunde yohowiní yereka irisa, owéyari Akwila, ko Prisila, ŋundo Itali mira^r rotoro Korin mahiriyó. Akwila ŋuko Pontus mira koro uni qu ka. Asa Polko Korin yendémo mahero yereka ŋuya kopangaŋgurí. ³Yereka irisa ŋundo eneya kho kopo tero tuwí yamaru tinjiyoyango. Ŋunde ŋuro ene irisa ŋuya yotoro kho teyango. ⁴Ko Sapat naru^s soso ŋuno Polko Juda koro huru-huru yano oro mande teyara. Ene, Juda unindoya Grik unindoya iŋo-iŋoye reweka otoqoníka Yesu koro iŋondutu ti, yero ŋunde teyara.

⁵Asa Sailas koya Timoti koya Masedonia mira rotoro Korin ŋuno uriqo, Polko koweyumu tero Anutu koro mande qu yero Juda unino mande yesowo ŋande yaró, “Yesu ŋuko Kristo^t ŋu.” ⁶Quko uni ŋundo eneya kiro puso tero yesará yereyango quno ŋuno eneŋo saŋgiríŋo witú yerero kowe punu-punuyó towo kuriyoro ŋande yimiraró, “Yeŋombo naŋge yeŋo rowore yereyoyango. Ŋu quhurí ŋuko neneŋo kini. Ŋa naruko ŋanoko yate uni wini meyowo ŋu^u mande yesowo yimirowe teteno.”

⁷Ŋunde yero huru-huru ya ŋu rotoro, uni kako, owí muko Titius Jastus, ŋundo yano oró. Uni ŋu Anutu potoruku te inoyara. Ko yayó muko Juda koro huru-huru ya sumeyoro. ⁸Ko Juda koro huru-huru ya^v koro sopo-sopo uni, owí Kirisipus, ŋuya eneŋo suwisawiyó soso, Uni Parámimboro iŋondutu taŋgurí. Ko Korin uni qambu Pol koro mande ŋu iŋoro iŋondutu tero sono raŋgurí.

^r 18:2 “Itali mira” ŋuko Rom yendé ŋuro mira qu. ^s 18:4 “Sapat naru” ŋuko sonda naru weŋa ŋu. Ŋu naruko ŋuno Juda unipareto *huru-huru yayemo* huruworu Anutu koro mandí weyoyi iŋoro hariri teyangaŋgurí. ^t 18:5 “Kristo” ŋuko Anutuko rokóŋoní mahero wiri yerete uni parámi horé tunoqaró ŋu. ^u 18:6 “uni wini meyowo” ŋunde quko Juda uniparete kini qu naŋge. ^v 18:8 “huru-huru ya” ŋuko Juda uniparetero ya parámi mu. *Sapat naruko* ŋuno hu-hariri tero Anutu koro mandí weyoyi iŋoro hariri teyangaŋgurí.

⁹Asa suwo kano Uni Parámimbo quko Pol n̄ande miraró, “Ke ma sorewero. Kini, mande yesowo; maŋgoke ma kusiyowero. ¹⁰Nondo keya yowano, uni ka otoqoro ke kama rambaruru kerewaŋgo. Neneŋo unipare qambu ŋu yendémo n̄ano yoteŋgo.” ¹¹Pol Korin ŋuno yoní kumima naru kanata ko kombo kande saŋiyoro kanata n̄unde kini tiní Anutu koro mande rondaqe yunoyaró.

¹²Naru kano Galio n̄undo Akaia mira n̄uro uni kembéye yora.^w Asa Juda unindo mande kusiyoro Pol koya saŋgirí taŋgurí. N̄unde tero rero mande khono rotoro n̄ande yaŋgurí, ¹³“Uni n̄ando unipare iŋo-iŋoye riní otoqoro noreŋo hutuŋo mandenani wendaqero murí enesówore Anutu potoruku te inoyoteŋgo.”

¹⁴Asa Polko mande topé yewero taró quno ŋuno Galioko Juda uni n̄ande yimiraró, “Ye Juda uni, uni n̄ando hutuŋo mande ka karóŋoro otete piyimi parámimbe ma tomó tiníqo, asa nondo mande ye iŋowano. ¹⁵Quko oseseye n̄ako kina mande ka, yendo owé karo koya yeŋo hutuŋo mandeye n̄uro yeteŋgo. Enina, yeŋombo naŋge n̄a roŋgaruwi. Noko osese n̄a iŋowero piyimiŋoteno.” ¹⁶N̄unde yero mande kho noŋgo yohowaró. ¹⁷Yohowiní Juda uni soso n̄undo eneŋo huru-huru ya koro sopo-sopo uni, owí Sositenes koya saŋgirí tero toworo ya kimbino ŋuno uraŋgurí. Quko Galioko o taŋgurí ŋu qenero n̄uro kama iŋaró.

Polko Siria mirako Antiok yendémo n̄uno pitu ko oró

¹⁸Asa Polko naru piru Korin yendémo yora. Yate Siria mirako pitu ko uyarewero ye iŋoro uni topo, ime yuri, yero yorotoro eneya Prisila koya Akwila koya Senkiria yendé moŋgo waŋgowore uyareŋgurí. Quko koretero Anutu yuŋgunaŋoro huí toŋjaró, dokoro komo enendo Anutu koya mande kondé yaró.^x ¹⁹Asa waŋgowore uyareyate Efesus yendémo n̄uno mahero Polko yereka ŋu n̄uno yorotoro Juda koro huru-huru ya^y quroko oro eneya mande teyate ²⁰n̄ande miraŋgurí, “Ke noreya soŋga piru yate ta.” Quko, “Mepémo kini,” yero ²¹yorotoro toŋewero tero yaró, “Asa Anutuko n̄uro iŋote tiníqo, pitu ko yeno n̄ano mahewano.” Yero waŋgowore Efesus rotoro ²²Sisaria yendémo n̄uno mahero waŋgo rotoro Yerusalem oro iŋondutu huru-huru n̄unoko naru meté yero yorotoro Antiok n̄uno uró. ²³Antiok n̄uno yate-yate toŋero Galesia mirawore ko

^w **18:12** “Akaia” n̄uko *Grik* unindoro miraye qu ka, quko *Rom* unindo unipare ŋu sopo yereyaŋgurí. N̄undiro naŋge Galio n̄uko *Rom* koro uni ka, ko Akaia mirako n̄uno Korin yendé parámi n̄uko yendé korete qu. ^x **18:18** Polko do mande ka Anutu koya yero huí kama toŋjaró, nore kama iŋoyoteto. N̄andiro peka, Anutuko ene Korin yendémo n̄uno kawaware tewero quro mande ka yaró (Asá yerewí Uni 18:10 amena weyo qembe). Yiní Polko o n̄u rokóŋoro huí kama toŋjaró. Asa ko yate Pol rambaruru kama rero yuŋgunaŋoro huí toŋjaró. ^y **18:19** “huru-huru ya ” n̄uko Juda uniparetoro ya parámi mu. *Sapat naruko* n̄uno hu-hariri tero Anutu koro mandí weyoyi iŋoro hariri teyaŋgurí.

Pirikia mirawore yendéne-yendéne ηuno uyaro Yesu koro iηo-iηo rewero unipareyó soso ηu^z rukiso yereyaró.

Apolosko Efesus yendémo ηuno Yesu koro mande yesowaró

²⁴Ko Juda uni Aleksandria yendé moηgo qu ka, owí muko Apolos, ηundo Efesus yendémo ηuno maheró. Eneηo mande yewero murí ηuko kekere qu nanηe, ko Anutu koro sokome ηu^a iηomukaró. ²⁵Komo kumimbo Uni Parámimboro khe quro iηo-iηo inaηgurí, ko newondímbo wimbí tero Yesu koro mande okeyá ta unipare rondaqe yunoyara. Quko Jonko sono re yunoyara murí ηu nanηe iηaró. ²⁶Asa hurí rero Juda koro huru-huru yano^b oro kondé yiníqo, Prisila koya Akwila koya iηoro rero Anutu koro khe ηu okeyá ta roneneηoro witúηariyó.

²⁷Naru kano Apolosko Akaia mirawore uyarewero ye iηoní uni topo ηundo iηo-iηoyó wikundiyo ro sokome ka nakayáηoro iηo-iηo rewero unipare ηuno yaηgurí ηu yunaηgurí. Uni ηa ri qembe, ye nakayáηaηgurí. Asa ηuno uyaro enendo unipare samaka-samaka tuwówore^c iηondutu taηgurí qambu ηu samaka yereró. ²⁸Dokoro kondé kaηero Juda unindo iηo-iηoye koroqe qu roneneηoro Anutu koro sokome ηu rondaqero, Yesu ηuko Kristo ηu, yero witú yereró.

Polko Efesus yendémo ηuno mande yesowaró

19 ¹Asa Apolos Korin yendémo ηuno yoníqo, Pol mira purí itaqero uyare yate-yate Efesus yendémo ηuno uró. Uro Yesu koro iηo-iηo rewero uni kumi^d yiyoro ²ηande osese yereró, “Ye iηondutu taηgurí quno ηuno yembeka Yuqa Surumí ηu raηgurímbe ma kini?”

Yiní yaηgurí, “Kini. Noreko Yuqa Surumí ηuro mandí kama iηato.”

³Yi ηande yimiraró, “Iηunde ηuro ye date tero sono raηgurí?”

Yiní ηande yaηgurí, “Noreko Jon koro sono qu ratowó.”

⁴Yi Polko yaró, “Komo Jonko unipare sono re yunoro ηande yaró, ‘Ye quhuríyembo newonde surumí teya quhurí ηu se rotoya sono ri. Ko ye uni no huwónemo maheweya ηuro iηondutu ti,’ yaró. Asa uni ηuko Yesu.” ⁵Iηunde yiníqo, uni ηu iηoro Uni Parámi Yesu ηuro owímo sono ri ⁶Polko kandí rero saηayemo riní Yuqa Surumímbo eneno umburó. Umbuní mande enesó-enesó yero Anutu koro mande qu yeyaηgurí. ⁷Uni soso ηuko 12 ηundiro.

^z 18:23 “iηo-iηo rewero unipare ” ηunde qundo rondaqe-rondaqe unindoya uyaro iηo-iηo yunoyaró. ^a 18:24 “sokome” ηuko Anutu koro mande korete qu, asa Murí Tero yate Malakai kini tete. ^b 18:26 “huru-huru ya ” ηuko Juda uniparetoro ya parámi mu. *Sapat naruko* ηuno hu-hariri tero Anutu koro mandí weyoyi iηoro hariri teyaηgurí. ^c 18:27 “samaka-samaka tuwó ” ηuko Anutu eneηombo nore samaka yereyote. Kimoyó moré kini. ^d 19:1 “iηo-iηo rewero uni ” ηunde qundo rondaqe-rondaqe unindoya uyaro iηo-iηo yunoyaró.

⁸Asa Polko kombo kapusa quroko ñuno Juda koro huru-huru yano^e oro Anutuko unipareyó wiri yereyote naruyó^f ñuro kondé yero iño-iño ye okokowaró. ⁹Quko uni kumi enejombo enejo newondeye kondé kusiyangurí. Ñunde kusiyoro iñondutu kama tero unipare toñeyemo Uni Parámimboró khe ñuro yesaráñoyango. Ñunde ñuro Polko yorotoro iño-iño rewero unipare yorero toñengurí. Ko naru rokóñoro Tiranás koro iño-iño rewero yayómo ñuno mande ñuro epe mito-mito tangurí. ¹⁰Ñunde teyoní, yate-yate kumima naru irisa ñunde kini taró. Asa ko Esia mira unipare soso, Juda ñuya Grik ñuya, Uni Parámimboró mande qu iñangurí.

¹¹Anutuko Pol kandímo o wimbí moré^g enesó-enesó parámi teyara. ¹²Unindo enejo kho tewero koro kowe punu-punuyó ñu ri se khumo uniko sañayemo rangurí quño ñuno se khumoye ñu kini taró, ko yuqa piyimi mu^h yorotoro toñeyango.

¹³Juda uni kumimbo wimbo toñero yuqa piyimi mu yohoweyango. Kumi muko Uni Parámi Yesu owí nekoro yuqa piyimi ñu yohowango. Ene ñande yangurí, “Nondo Polko ñu Yesu ñuro yesowoyote ñuro owímo yeya mande kondé yeteno.” ¹⁴Juda o qa-qa unindoro tapá uni ka, owí muko Siva, ñundo simó kande sañiyoro irisa pisi yereró. Simó ñundo kho ñunde qu tangurí. ¹⁵Asa naru kano ñunde tiqo, yuqa piyimi ñundo ñande yaró, “Nondo Yesu iño inoteno, ko Pol iño inoteno. Quko ye dani?” ¹⁶Ñunde yiní uni ñu, yuqa piyimi ñuro quroko yaró, ñu yutoro taka yereró. Kowe punu-punuye uto romboñero yuto wisikara yiriní ya ñu rotoyi sitú umbuní birimbiri sorangurí.

¹⁷Asa Juda unindoya Grik unindoya Efesus yangurí ñundo o ñu iñoro sasaro tero Uni Parámi Yesu owí hokoyangurí. ¹⁸Unipare qambu iñondutu tero mahero oteteye piyimi ñu soso komo teyango ñu tunomo yesowangurí. ¹⁹Kumimbo o piyimi wimbí moré teyango, ñundo o ñunde tewero quro iño-iño sokomeye ñu se koporo unipare toñeyemo se qayi qaró. Sokome ñuro kimoyó soweyangurí muko ñandiro, wondo musiyó silwa 50,000 ñundiro. ²⁰Ñundiro nañge Uni Parámimboró mande qu usaye parámi taró.

²¹Asa o soso ñu kini tiníqo, Polko ñande ye iñaró, “Nondo Masedonia mira koya Akaiá mirawore uyaro rotoro Yerusalem pitu ko oroqota rohoréñoro Rom ñuno uyarero qenewano.” ²²Quko koretero enejo samaka-samaka uni irisa, Timoti koya Erásitus koya, yorero asá yiriní Masedonia uyaririyó. Ko Pol enejo muko Esia ñuno soñga ta yora.

^e 19:8 “huru-huru ya ” ñuko Juda uniparetoro ya parámi mu. *Sapat naruko* ñuno hu-hariri tero Anutu koro mandí weyoyi iñoro hariri teyangurí. ^f 19:8 “Anutuko unipareyó wiri yereyote naruyómo ” ñuno iñondutu unipareko hamó Anutu kusuyoyómo yowango.

^g 19:11 “o wimbí moré ” ñuko o enesó-enesó tunoqiní Anutu koro wimbí ñunde tunomo yoweya. ^h 19:12 “yuqa piyimi ” ñuko *sambo simó* ñunde qembe, quko Anutu koro sañgirí tero unipare rowore yereyotengó.

Efesus unipareto Polko mande yaró ñu iñoro kuma tañgurí

²³Ñu naruko ñuno uni kumimbo Uni Parámimboro Kheⁱ ñuro sañgirí tero kuma parámi ri otoqaró. ²⁴Uni ka, owí muko Demetrius, enendo anutu pare ka, owí Aritemis, koro ya surumí ñuro kapo-kapo ka silwapo towoní uni qambu qundo kimoyi o towoyara uni ñundo mone parámi reyango. ²⁵Asa enendo o towoyara uni ñu neko yerero uni kho ñunde qu teyango ñuya neko yiriní kopoyi ñande yaró, “Topo okite, ye iñotenngo, kho teyoteto ñano quwore mone parámi rero meté kunditeyoteto. ²⁶Ko ye ñande qenero iñoyotenggo, uni ñu, Polko Efesus yendémo ñano ñuya Esia mira parámimo soso ñuno ñuya unipare qambu yowosoní iño-iñoye rohoréñoyotenggo. Ñande yimitoyote, ‘Anutu kandeto towoyotenggo ñuko anutu hamó kini.’ ²⁷Hamó, mandímbo mone khonani ña rambaruruwoweña. Ñuya, mandímbo Aritemis koro ya surumí ñu riní unipare iño-iñoyemo oka kina qembe teweyá. Komo Esia unipare soso anutu pare ñuro iñondutu teyango. Quko Polko mande ñando owí parámi ñu rambaruruwowero tete.”

²⁸Yini iñoro sañgirí parámi tero kondé ye nekañgurí, “Aritemis, Efesus koro anutu ñuro owí ñuko parámi!” ²⁹Ñunde yiqo, yendé unipare soso kiwe uyaro soso koporo kheñgeñoro Pol koro topé irisa Masedonia koro qu, owéyari Gaius koya Arisitakus koya yorero o qenewero yendé quno^o ñuno oñgurí. ³⁰Polko yendé ñuno unipare keweroyewore owero iñaró, quko Yesu koro iño-iño rewero unipareto^k kusiyañgurí. ³¹Hamó, Esia mira koro uni pará-pará kumimbo Pol koya topo tañgurí ñundo mande ka ri mahiní kondé ñande soréñañgurí, “O qenewero yendé quno ñuno ma owero,” yañgurí.

³²Asa yendé ñuno unipare qambu ñu, iño-iñoye kape taró. Ñunde ñuroko kumimbo mande ka yañgurí, ko kumimbo mande meyowo yañgurí. Ko unipare qambu kape tero ñande iñañgurí, nore do murí karo kopoteto, yero iñañgurí. ³³Juda uni ñundo eneño topoye Aleksanda wosoyi otoqo unipare qambu toñeyemo kañiní kumimbo kiwero roñgaruwoyañgurí. Ko Aleksandako kandí hokoro mande topé huru-huru unipare yimirowero taró. ³⁴Tiniño, qenero ñande iñañgurí, ñuko Juda uni ka. Ñunde ñuro ene mañgoye koporo watí-watí ye nekoñgurí, “Aritemis, Efesus koro anutu ñuro owí ñuko parámi!” Ene watí-watí ñunde nekeyuri naru piru ta ñunde kini taró.^l

ⁱ 19:23 “Khe” ñuko murí keta qu iñondutu unipareto howeyañgurí. ^j 19:29 “o qenewero yendé” ñunde quno uni kumimbo drama teyango, ko huru-huru enesó-enesó teyango. Ñuko ya kini, mira purí suruñono yakutí kunditewero qambu rangurí. Efesus ñunoko o qenewero yendé ñuko parámi horé, asa unipare 25,000 meté kunditero drama qeneñgurí.

^k 19:30 “iño-iño rewero unipare” ñunde qundo rondaqe-rondaqe unindoya uyaro iño-iño yunoyaró. ^l 19:34 Juda unipare kumi muko Efesus ñuno kunditeyañgurí, ko ene ñuya Pol qembe anutu pare ñu potoruku kama te inoyañgurí. Aleksandako do mande topé ka tewero taró ñu, nore hamó kama iñoyoteto. Ñande yimirowero, peka, ko Juda unipare ñuyako Pol koro piyimiñañgurí. Ñundiro Pol koro potó ñuko Juda uniparetoro potó kini.

³⁵Asa Efesus yendémboro sopo-sopo uni ñundo unipare qambu yiyoro mepa mande yero ñande yaró, “Ye Efesus uni, uni soso ñande ñoyotetngo, ko nore Efesus uni, norendo Aritemis koro ya surumí ñu sopoyoteto, ko eneño kapo-kapoyó sambo koñgo umburó ñu^m sopoyoteto. ³⁶Uni kato mande ñu rohoréñowero mepémo kini. Ñunde ñuro ye mondó yuri. Ye, oka tato, yero waka ta ma tewero. ³⁷Dokoro uni irisa ña yore mahetenggo, quko ya surumí moñgo oka kama momo tariyó, ko noreño anutunani pare ñaro kama yesaráñoyariyó. ³⁸Asa ko Demitrius koya kho kopo topémboya mande ka yewero ñoyotetngo tiníqo, asa mande kho tewero naruyó yote, ko uni kembé korete qu yote. Ene mandeye mande khono yewero ña roñgaruwi. ³⁹Ñunde tiqo, mande ka yorote tiníqo, asa ñuko huru-huru naru horé ñuno huruwo ro roneneñowañgo. ⁴⁰Qeni, noreño mbo itaka o tunoqete ñuro mande khono kañewato, peka. Dokoro huru-huru ñako murí moré kini. Ñunde ñuro uni kembémbo ñande yewañgo, norendo kina kuma teyoteto.” ⁴¹Sopo-sopo uni ñundo yini kini tini, unipare asá yirini toñeguri.

Polko Masedonia, Grik mirawore khendo uyará

20 ¹Asa kuma ñu kini tiníqo, Polko Yesu koro iño-iño rewero unipareyóⁿ neko yirini mahenguri. Mahi newondeye rukisoyoro, ime yuri yero, Masedonia mirako owero yoroto toñeró. ²Toñero Masedonia ñuwo ñuno khímbo yate mande parámi yero newondeye rukisoyará. Ko imemoñgo yate Grik mirako^o uró. ³Uro yoní kombo kapusa ñunde kini taró. Yate-yate wañgowore Siria mirako uyarewero taró, ko Juda uni kumimbo mande kusiyoro, uratoka khumoní, yero tañguri. Ñunde ñuro Pol rohoréñoro Masedonia pitu ko oró. ⁴Uni Pol koya toñeguri ñuko ñandiro: Sopater, Pirus nañuni, ñuko Beria yendé moñgo qu; Arisitakus koya Sekundus koya, irisa ñuko Tesalonaika yendé moñgo qu; Gaius, Deripe yendé moñgo qu, ñuya Timoti; Tikikus koya Tiropimus koya, irisa ñuko Esia mira parámi moñgo qu. ⁵Asa uni ñundo koretero oro Tiroas yendémo ñuno nore sopo nereñguri. ⁶Quko norendo Bret Yisiyó Moré Kini ñuro o ne-ne ñu^p kini tiníqota Filipai yendé roto windi tapé moñgo toñetowó. Ko wañgowore karóñoro naru kandeka ñunde kini tini windi tapémo mahero Tiroas ñuno otowó. Noreko naru kande sañiyoro irisa Tiroas ñuno yatowó.

^m **19:35** “kapo-kapoyó sambo koñgo umburó” ñuko wondo ka, Efesus unipareto potorku te inoyango. ⁿ **20:1** “iño-iño rewero unipare ” ñunde qundo rondaqe-rondaqe unindoya uyaro iño-iño yunoyará. ^o **20:2** “Grik mira” ñuro owé ñuko Akaia, ñuno Korin yendé ñuko yendé parámi korete qu. ^p **20:6** “Bret Yisiyó Moré Kini quro o ne-ne ” ñuko naru parámi ka, asa Israel unipareto sonda kanata soso ñuno bret yisiyó moré kini nañguri. Komo suki Anutuko unipare ñu *Isip* noñgo yorini areñguri. Arewero tañguri quño ñuno bret hamó qawero mepémo kini. Kini, bret yisiyó moré kini nañge, asa plaua, sono nañge qañguri. Ñunde ñuroko kumima naru rokóñoro o tunoqaró ñuro inoro o ne-ne ñu teyañgo.

Polko Yutikas riní pitu ko otoqaró

⁷Asa sonda naru korete quno nore uniparetoya bret romboŋero o kopo natowó.⁹ Polko, kuyepo toŋewano, yero mande yeyuri, yate suwo kewero taró. ⁸Ya kopoyatowó quno ŋuno wasa koreko ŋuno suru qambu yora. ⁹Ko simó keta ka, owí muko Yutikas, enendo wituko kunditeyaró. Asa Pol mande watí yeyoní Yutikas kupo tero etewero taró. Yate ete khumaró, ko wituwore kore koŋgo hamó rokaráŋo nokono uró. Uníqo, unindo, kindo khumote, ye iŋaŋgurí. ¹⁰Ko Pol uro simó keta ŋuro saŋano etero pisiyoro yimiraró, “Ye ma yukuwowero. Ŋako toŋí yote.” ¹¹Ŋunde yero rotoro pitu ko oro bret romboŋero re naró. Ko mande piru saŋga sowe tero yeyoní, oro saraŋaró. Saraŋoní Pol roto toŋeró. ¹²Ko simó keta ŋu toŋí yoní re towo toŋero newondeyemo niŋgu-niŋgu parámi taŋgurí.

Polko Efesus huru-huru koro tapá uni rukiso yereró

¹³Asa nore koretero uro waŋgowore uyarero Asos yendémo oro Pol sopatowó. Dokoro koretero Pol eneŋombo ŋande yaró, “Nondo khendo Asos owero iŋoteno.” ¹⁴Asa yate Polko Asos ŋuno mahiníqo, rero waŋgowore Mitilini yendémo^r ŋuno uyaretowó. ¹⁵Uyaro etato saraŋoní uyareyate Kios noko mosowí andusina ŋuno windi tapémo roto etatowó. Saraŋoníqo, Samos noko mosowímo uyaro etato saraŋoní, yate windi tapémo Miletus yendémo uyaretowó. ¹⁶Pol komo iŋo-iŋoyómo Efesus yendé takawano, yero iŋo kusiyaró. Ene naru parámi Esia mira parámimo ŋuno yowero piyimiŋoro waka ta toŋewero iŋaró. Ŋu mepémo tiníqo, Pentikos o ne-ne^s naruko ŋuno Yerusalem yowano, peka, ye iŋaró.

¹⁷Asa Miletus ŋuno Polko mande riní Efesus yendémo oní huru-huru koro tapá uni neko yiriní mahenŋgurí. ¹⁸Uni ŋu eneno mahiqo, ŋande yimiraró, “Ye no naru rokóŋoro Esia mirako no yeya date yoranowó ŋuro iŋomukotenŋo. ¹⁹Nondo owéne rewe umbuní tendoro Uni Parámimboro kho qu teyanowó. Quko naru qambuko Juda unindo nori umbuwero mande kusiyoyi quhurí parámi korowanowó. ²⁰Ko nondo ye samaka yerewero quro mande ka yero kama soreyanowó. Kini, yendé kewero ŋuya ya enemo-enemo ŋuya mande rondaqe yunoyanowó. ²¹Naru rokóŋoro nondo Juda unino, Grik unino mande yesoworo ŋande yimiranowó, norendo Anutusina mahero newonde rohoré teya Uni Paráminani Yesu koro iŋondutu tato.

²²“Asa iŋoyi, itakako Yuqapo kusi niriní no Yerusalem owé teteno. Ŋuno do ka nono tunoqeweya qu, no kama iŋoteno. ²³Ŋandiro naŋge

⁹ 20:7 “bret romboŋero o kopo natowó” ŋuko Uni Parámimboro o ne-ne qu peka.

^r 20:14 “Mitilini yendé” ŋuko Lesipos noko mosowímo ŋuno yora. ^s 20:16 “Pentikos o ne-ne” naru ŋuko Juda uniparetoro naruye parámi ka. *Taka yereró quro o ne-ne* ŋu kini tiníqo, yate kosa naru 50 ŋunde rotoro *Pentikos* tunoqaró.

ijoteno, ko yendé soso toḡeyano quno ḡunoko Yuqa Surumímbo ḡande nimitoyara, ko kusi-kusiko nondowoyi quhurí parámi korowowano. ²⁴Quko nondo yoto-yotone kondé toworo ḡu parámi yero kama ijoteno. Kini, khe howewe kini teweya, yero ijoteno, ko Yesu Uni Parámimbo kho nunaró ḡu tewe kini teweya, yero ijoteno. Kho ḡuko mande yero Anutu koro samaka-samaka tuwó ḡuro miti mandeyó^t yewero kho qu.

²⁵“Asa ijoyí, komo no ye keweroyewore Anutuko unipareyó wiri yereyote naruyó^u” ḡuro yesowo yimitoyanowó. Quko no itakako ijoteno, imemoḡo yendo umu-kembane pitu ko kama qenewaḡo. ²⁶ḡunde ḡuro itaka ḡande yimiroteno, ye ka khumowaḡo quro potó ḡuko neneḡo kini. ²⁷Dokoro nondo Anutu koro ijondutuyó soso ḡu yesoworo yimiranowó. ²⁸Ye koweye meté sopoyuri. Ko Yuqa Surumímbo Anutu koro huru-huru soso^y yore yeḡo kandeyemo rotaró ḡu ḡuya meté sopo yereyuri. Dokoro eneḡo naḡunímbo sitúḡombo kimo yereró.^w ²⁹No ijoteno, yoroto toḡewano qunoko, isa sangírí qundo ye keweroyemo mahero unipare rambaruru yerewaḡo. ³⁰Ko uni topoye kumi yeḡo keweroye moḡo otoqoro mande kota yero unipare kaná yerero yowosowaḡo. ³¹ḡunde ḡuro ye kondé sopo yereyuri qembe. ḡande ijoyuri qembe, kumima naru kapusa qunoko kosa suwo nondo tendo-tendoro oresaka mande ye yimitoyanowó.

³²“Kowe itakako ye yorero Uni Parámi kandímó yorotoro eneḡo samaka-samaka tuwó^x” ḡuro mande kusujoyómo yorototeno. Samaka-samaka tuwó ḡundo meté wimbu re yunoweya, ko o meté qu Anutuko unipare soso rokó yereró ḡu siyowaḡo qu siyoro yunoweya. ³³Nondo uni karo silwayó, golyó, tuwiyó quro qene nuḡu ka kama tanowó. ³⁴Yeḡombo ijoteḡo, neneḡombo kho towanowó ḡuro tero otero tukuni teroqo neneḡombo o siyoyanowó, ko nondo uni noya yoteto ḡu ḡuya samaka yereyanowó. ³⁵O soso tanowó ḡundoko ḡande witú yereró, asa yendo kho kondé tero uni wimbuye moré kini ḡu samaka yerewaḡo. Yesu Uni Parámi eneḡombo yaró ḡuro iḡato. ḡande yaró, ‘Ko uni ka oka topé moḡo siyoweya quko puriḡo ka reweya, peka. Quko uni ka oka topé inoweya ḡuko puriḡo parámi ka hamó reweya.’”

³⁶Polko mande ḡu yiní kini tiní poteruku tero tapá uni ḡuya hariri taḡurí. ³⁷ḡu kini tiní soso tendoro Pol towo pisiyoro mutó inaḡurí.

^t 20:24 “*miti mande*” ḡuko Anutuko *Kristo* asáḡoní khumoro quhurínanimbo kimo tiní Anutu koya newonde kanata tewero ḡuro mande meté mu nange. ^u 20:25 “*Anutuko unipareyó wiri yereyote naruyómo*” ḡuno ijondutu unipareko hamó Anutu kusujoyómo yowaḡo. ^v 20:28 “*Anutu koro huru-huru*” ḡuko unipare soso Yesu ijondutuwo nokone-nokone ḡuno huruwoyoteḡo qu. ^w 20:28 “*kimo yereró*” ḡuro murí muko ḡandiro: unipareto o piyimi kusujoyómo kusiyowí yoteḡo. ḡundiro naḡe Anutuko kimo tero yoriní kina yowaḡo. ^x 20:32 “*samaka-samaka tuwó*” ḡuko Anutu eneḡombo nore samaka yereyote. Kimoyó moré kini.

³⁸Komo Polko yaró, “Yeko no umu-kembane kama qenewango,” nunde nuro newonde surumí parámi tanğurí. Ko rero wango sağano rotanğurí.

Polko Yerusalem owero wangoğore uyaró

21 ¹Asa norendo uni nju yorotoro wangoğore toğero ronenejo uyarero Kos noko mosowímo nuno uyaretowó. Ko sarağoníqo Rotes noko mosowímo nuno uyaro rotoro windi tapémo Patara yendémo nuno uyaretowó. ²Yendémo nuno wango ka Ponisia mirako uyareweya qu seqaro qenero njuwore toğetowó. ³Uyareyate Saipras noko mosowí nju kandenani tesina yoní qenero takaro, yate-yate Siria mira takaro Tair yendémo nuno uyaretowó. Wango simburí nundo situwi se rotowero tiní nuno onğurí. ⁴Yendémo nuno Yesu koro ijo-ijo rewero unipareyó^y kumi yiyato nundo Yuqapo Pol nande miranğurí, “Ke Yerusalem ma owero.” Nunde nuroko naru kande sağiyoro irisa nunde nuno yoratowó. ⁵Asa ko naru nju kini tiníqo, nore yendé nju rotowero tatoqo, Anutu koro uni njuya pare-simóyemboya, nore norero yendé rotoro windi sumeyoro potoruku rero hariri tatowó. ⁶Hariri tato kini tiní, imemoğgo toği, yero nimiranğurí, ko, ime yuri, yero wango sağano otowó, ko pitu ko ene norotoro yayemo toğenğurí.

Akapasko ye-ye mande ka yaró

⁷Asa ko nore wangoğore Tair yendé rotoro, yate Tolemes yendémo nuno uyaretowó. Nuno uni topotoya kosa meté yatowó, ko nore kosa kanata na njuya yatowó. ⁸Ko sarağoníqo, Tolemes nju rotoro nore Sisaria yendémo nuno uyaro miti mande yesowowero uni nju, Filipko yano oro eneya yatowó. Njuke uni kande sağiyoro irisako asá yerewí uni^z samaka yereyango nuro qu ka. ⁹Enejo nambo-simó keta nimí kini qundo ye-ye mande^a yeyango.

¹⁰Asa Sisaria nuno naru kumi nuno yato, ye-ye uni ka, owí Akapas, ene Judia mira rotoro Sisaria umburó. ¹¹Umburo noreno mahero Polko utó newondímo kusiyoyara nju rero eneğombo enejo khe kandí kusiyaró. Kusiyoro nande yaró, “Yuqa Surumímbo nande yete, ‘Juda uni Yerusalem yoteğgo nundo utó nğaro simburí rero nande kusiyowango, ko rero uni wini meyowo kumi^b kandeyemo rotowango.’”

¹²Yini iğoro noreya yendé unipare njuya Pol kondé, “Yerusalem ma owero,” yatowó. ¹³Quko Polko mande topé yaró, “Ye do karo

^y 21:4 “*ijo-ijo rewero unipare*” nunde qundo rondaqe-rondaqe unindoya uyaro ijo-ijo yunoyaró. ^z 21:8 “*asá yerewí uni*” njuke Yesuko rokó yerero asá yirini enejo khayó tanğurí. ^a 21:9 “*ye-ye mande*” njuke unindo Yuqa noğgo mande ka rero unipare soso yimiraró. Mande nunde quko uniparetoro oteteye rondağarómbe ma newondeye rukisoyaró. ^b 21:11 “*uni wini meyowo*” nunde quko Juda unipare kini qu nange.

tendoro no newondene rambaruruwoyotengó? No Yerusalem ñuno kusi nerewañgope ma nuroyi khumowano, peka. Enina, Uni Parámi Yesu koro owí hokowero khe ñu howewano.”¹⁴ Ñunde yiniño, nore iño-iñojó rohoreñowero mepémo kini tero mande ñu rotato. Ñande yatowó, “Uni Parámimboro nunğurí tunoqini.”

Polko Yerusalem ñuno oró

¹⁵ Naru ñu kini tiniño, situwinani ronğaruworo Yerusalem ñuno otowó. ¹⁶ Oro Sisaria yendémboro iño-iño rewero unipare^c kumi noreya oro Nasonko yano norotañğurí. Nason ñuko Saipras noko mosowí monğo qu, Yesu koro iño-iño uni korete qu ka.

¹⁷ Asa Yerusalem otowó quuno uni topo ñuno qundo noreño niñgu-niñgu tañğurí. ¹⁸ Sarañoníño, Pol noreya Jems qenewero otowó. Oto huru-huru koro tapá uni soso Jems koya yañğurí. ¹⁹ Ñuno oro Polko kosa meté yero yimiraró, ko eneñombo meté roneneñoro o soso Anutuko khoyómo uni wini meyowo qu^d keweroyemo taró ñuro yaró.

²⁰ Ñunde yiniño, iñoro Anutu owí hokañğurí. Ko ñande mirañğurí, “Topo, qeno. Juda uni qambu horé qundo iñondutu tañğurí, ko uni soso ñundo hutuño mande^e howewero ñuro kondé iñooyotengó. ²¹ Quko uni kumimbo keño ñande yimiroyi iñañğurí, “Ko Polko Juda uni kumi uni wini meyowo keweroyemo yotengó qu rowore yerero Mosesko hutuño mande qu howewero soré yereyote. Ene ñande yeyote, ‘Ye simóyemboro koweye ma toñowero.^f Ko otete komo qu ma howewero.’ ²² Nore date tewato? Juda iñondutu uni ñundo keto mahe ñuro hamó iñowaño.

²³ “Asa otete ka kimiratoka ñunde te qembe. Uni nimí kini ñano yotengó qundo komo oka tewero quro Anutu koya mande kusiyañğurí. ²⁴ Ke uni ñu yorero ye soso Anutu toñímo sara tunoqewero otete ñu ti qembe. Ñunde teya keto eneño o qa-qa te inowero qu kimoyikata huye toñowaño. Ke ñunde tiqota unipare soso iñowaño, uni kumimbo kota mande keya yañğurí na. Ñande iñowaño, keko hutuño mande howeyote, yero iñowaño.^g ²⁵ Asa uni wini meyowomboro iñondutu unipare quro

^c 21:16 “iño-iño rewero unipare ” ñunde qundo rondaqe-rondaqe unindoya uyaro iño-iño yunoyaró. ^d 21:19 “uni wini meyowo ” ñunde quko Juda unipare kini qu nañge.

^e 21:20 “hutuño mande ” ñuko komo suki Anutuko *Sainai* purímo *Moses* inoní Israel unipare yunaró. Mande ñuko Juda uniparetoro yoto-yotoye soso sopoyaró. ^f 21:21 “kowe toñowero” murí muko ñandiro: Juda pareto simó urumuni ka pisiyoní kosa naru kande sañiyoro kapusa ñunde rotoní *hutuño mande* howero kowí toñañğurí. Ñunde tero eneko Anutu koro simó rokóñañğurí. Ko uni wini meyowo qu kato mahero Anutu potoruku tewero kondé iñaró tiniño, ene ñuyako eneño kowí toñañğurí. ^g 21:24 Juda uni kumimbo naru kumimo Anutu koro kondé iñoro eneya mande kusiyoro kombo kanata quroko otete ka howeyaño. Otete ñuko ñandiro: wain ka kama newaño, o Anutu toñímo pusú qu ka kama towowaño, huye kama toñowaño. Asa naru ñu kini tiniño, o qa-qa te inoro huye toñoro wondo yakutímo qañğurí. (Qambuye 6 weyo qembe.)

norendo komo mande kusiyoro sokome ka ratowó. Njande yimiratowó, ko unindo nú-qare ka uroyi khumoní rero anutu kota-kota o te yunangurí nju ma newero, ko sitú ma newero, ko unindo númbowe puñeye kusiyi khumoní nju nyaya ma newero, ko se simbururu ma tewero.”

²⁶Asa ko sarañoníqo, Polko uni nju yorero eneya Anutu toñímo sara tunoqewero otete nju tangurí. Njunde teroqo Ya Surumímo^h oro piña mande ka o qa-qa uniⁱ yimitoro njande yaró, do naru kano murí tewero naruyó nju kini teweya, ko do naru kano uni soso njundo o qa-qa Anutu te inowanjo njuro yimiraró.

Unindo Pol Ya Surumímo towanjurí

²⁷Asa murí tewero naru kande sanjyoro irisa kini tewero taró quno njuno Juda uni Esia nonjo qu kumimbo Pol Ya Surumímo qeneñgurí. Qenero unipare qambu nju iño-iñoye kape tiní Pol toworo ²⁸njande neke kiwanjurí, “Ye Israel uni, nore samaka niri! Uni njando mira soso njuno mande rondaqe unipare yunoyote, ko mandí muko noreño wininani, hutunjo mandenani, ko Ya Surumínani njaro yesaráñoyote. Nju nanje kini. Kini, enendo Grik uni nyaya yorero Ya Surumímo njano arero Ya meté horé nja riní Anutu toñímo pusú^j teyote.” ²⁹Njunde yanjurí, dokoro komo Grik uni ka Efesus nonjo qu, owí Tiropimus, Pol koya yendémo yiyanjurí, ko njande ye iñanjurí, ko Polko uni nju re Ya Surumímo ariri, yero iñanjurí.

³⁰Asa njunde yero kiwi Yerusalem uni soso iñoro yukuworo kheñgeñoro mahe kopanjurí. Koporo Pol toworo rero Ya Surumímo rotoro yendémo unjurí. Ko waka ta Ya Surumí njuro mako qu tunanjurí. ³¹Pol toworo uroyiqo, Rom koro kuma unindoro uni kembé njundo^k Yerusalem soso iño-iñoye kape taró njuro piña mande iñaró. ³²Njunde njuro waka ta uni kembémbó kuma unindoro sopo-sopo kumimboya^l uniyemboya yorero kheñgeño uyanjurí. Uyari unipareto yiyoro Pol utoyanjo nju rotanjurí.

³³Uni kembé njundo kutaqemo mahero Pol toworo kuma uniyó yimira, kato utó kondémbo irisa kusiyi, ye yimiraró. Yero unipare njande osese yereró, “Ija dani ka? Do ka taró?” ³⁴Yiní unipare qambu keweroyemo uni kumimbo mande ka yero nekanjurí, ko uni kumimbo mande meyowo

^h 21:26 “Ya Surumí” njuko Anutu koro ya qu, njunoko Juda unipareto Anutu koya huruwowero quro hu-hariri teyanjurí. ⁱ 21:26 “o qa-qa uni” njundo Ya Surumímo Anutu koro kho tero unipareto quhuríye rotowero quro wondo yakutímo njuno o qa-qa te inanjurí. ^j 21:28 Anutu koro sokomeko njande yaró, ko o kate-kate Anutu toñímo pusú yora, ko uni ka murí kate-kate taró qundo pusú tunoqaró. Asa ko Juda unindo njande yanjurí, ko uni wini meyowo njuko pusú nanje, Ya Surumímo owero mepémo kini. ^k 21:31 “kuma unindoro uni kembé” njunde qundo kuma uni 1,000 wiri yereyara. Rom koro wiri yerete uni parámi njundo Judia mira nyaya wiri yereró. Asa ko eneño kuma uniyómbó Yerusalem njuno kunditero unipare sopo yereyanjurí. ^l 21:32 “kuma unindoro sopo-sopo uni” njuko Rom uni ka, enendo kuma uni 100 sopo yereró.

yaŋgurí. Niri-niri qambu tiqo, kuma uni ŋundo o hamó qene iŋowero mepémo kini taró. Ŋunde ŋuro kuma uni yimironí Pol re toworo kuma unindo ya quroko owero taŋgurí. ³⁵Pol oro ya piri saŋano owero tini unipare qambu ŋundo, uratoka khumoní, yero kuma kondé ti owero rukusuwoní kuma unindo re korowo oŋgurí. ³⁶Kowe unipare parámi ŋu yohowero oro ene mande kondé ŋande yaŋgurí, “Urika khumoní!”

Polko mande ka uni qambu yimiraró

³⁷Asa Pol kuma unindo yayemo owero teroqota kuma unindoro uni kembé ŋu ŋande kirayaró, “Meté mande ka keya yewe teteno?”

Yiní yaró, “Date koro? Keto Grik mandewore yete. ³⁸Noko, ke peka Isip uni ŋu, yero iŋoyoteno, soŋga komo kuma riní otoqoní uni saŋgírí 4,000 uni sukepo yutoyotengo qu yorero mira wimbímo uyareŋgurí.”

³⁹Ko Polko yaró, “Noko Juda uni ka, Tarsus yendé Silisia mirako qu ka. Yendéne muko owí parámi moré. Ai, no unipare mande yunowero iŋoteno.”

⁴⁰Uni kembé ŋundo meté yiniqo, Pol mako piŋo saŋano ŋuno kaŋero kandímbo naŋge rokó-rokó taró. Ŋunde ŋuro soso maŋgoye kusiyoyi Polko Hibru mandewore mande yaró. Ŋande yaró,

22 ¹“Uni topo ko awa okite, ye iŋoyi. No mande topé yeya yewe teteno.” ²Ŋunde Hibru mandewore yiniqo, iŋoro mondó ta yotoro niri-niri ka kama taŋgurí.

Polko ŋande yaró, ³“Noko Juda uni ka. Námembo Silisia mirako Tarsus yendémo ŋuno pisi nereró, quko no Judia mirako ŋano parámi tanowó. Gamalielko^m iŋo-iŋo no nunaró, ko usi-sinanimboro hutuŋo mandeye ŋuro iŋo-iŋo nunaró. Ŋunde ŋuro ye itaka teyotengo ŋunde naŋge nondo Anutu koro kondé iŋoyanowó. ⁴Ŋunde ŋuro no unipare Khe ŋuⁿ howeyaŋgurí qu yutoyano, ko uni ŋuya pare ŋuya yorero kusi-kusi yano yorotoyano. ⁵O qa-qa unindoro tapá unindoya uniparetoro uni kembé-kembémboya, sowo mande ŋu meté ye yimirowaŋgo. Dokoro enendo Damaskus topo-topoyembo sokome ka nunoyi unipare ŋunde qu yondoworo oteteye piyimi ŋuro topé rewero quoro yore Yerusalem mahewero khendo Damaskus yendémo ŋuno unowó.

Polko ene date iŋondutu taró ŋuro yimiraró

⁶“Asa no khendo yate kosa keweroko Damaskus yendémo ŋuno owero naŋge tanowó. Ko waka ta hiyó parámi ka sambo saŋa noŋgo umburo no hiyó nunaró. ⁷Hiyó nunoní rokaráŋoro nokono umbuweqo, maŋgo kato nimiraró, ‘Sol, Sol, ke do karo no rambaruru nereyote?’

^m **22:3** “Gamaliel” ŋuko *Farisi uni* qu ka, ko *hutuŋo mande* rondaqe yunoro owé parámi taró. ⁿ **22:4** “Khe” ŋuko murí keta qu iŋondutu unipareto howeyaŋgurí.

8 “Yini mande topé ñande yanowó, ‘Uni parámi, ke dani?’

“Yewe nimiraró, ‘Noko Yesu, Nasaret nonjo qu, keto no rambaruru nereyote,’ yaró. 9 Uni noya yatowó ñuko hiyó ñu qenengurí, quko manjó ñjanowó ñu ene kama ñjanngurí.

10 “Asa ñande yanowó, ‘Uni Parámi, no itaka do ka tewe teteno?’

“Yeweqo, Uni Parámimbo nimiraró, ‘Ke otoqoya Damaskus oyo. Ko ñu yendémo ñunoko uni kato do kho ka kunoteno qu kimiroweya,’ yaró. 11 Hiyó ñuko parámi horé, asa ko kini tiniqota nondo o qenewero mepémo kini. Uni noya yatowó ñundo kandenemo nondoworo norero Damaskus otowó.

12 “Ko uni ka ñuno yaró, owí muko Ananias. Uni ñuko hutunjo mande^o hamó howeyara. Juda uni soso Damaskus yotengjo ñundo ñande yeyotengjo, ñuko uni meté. 13 Asa ene mahero no tanjenemo kañero ñande nimiraró, ‘Topo Sol, ke pitu ko tojete.’ Yiniqo, ñu naruko ñuno nanje tojene muko pitu ko meté tini tojete ene qenenowó.

14 “Asa ñande yaró, ‘Usi-sinanimboro Anutuyembo ke rokó kerero ñande ye ñjaró, ko keto enejo ñjo-ñjo qu ñjoi tondañeweya, ko keto Uni Roneneñowí ñu qenero manjómbó mande yete ñu ñjoweya. 15 Ñunde ye ñjaró, dokoro keto manjó rero toñengepo qeneró ñuya kusumbokepo ñjaró ñuro unipare soso yesowoweya. 16 Asa ke do ka sopoyote? Otoqoya owí nekoya sono rika enendo quhuríñge soworo se rotoweya.’

17 “Imemonjo no Yerusalem mahero Ya Surumímo^p ñuno hariri teroqo, ñjo-ñjone enesó-enesó tini 18 Uni Parámi qenenowó. Qenewe ñande nimitoyaró, ‘Waka ta Yerusalem roto toje. Dokoro ke mandene re ñano yeweya, quko uni kumimbo ñjowero piyimíñwanjo.’

19 “Ko nondo yanowó, ‘Uni Parámi, uni ñano qundo ñande ñjotengjo, komo nondo huru-huru ya^q soso quwore uro ñjondutu unipare kusi yereyano, ko haususu yereyano. 20 Ko komo enendo keño yesowowero uni Stiven ñu uri khumoníqo, neneñombo kutaqemo kañero ñingu-ñingu tero urowero uni ñuro kowe punu-punuye sopoyanowó.’

21 “Yeweqo, nimiraró, ‘Ke oyo. No asá kerewe sewemo tojero uni wini meyowo keweroyemo yoweya.’”

Pol ñuko Rom uni ka

22 Asa Juda unindo Pol koro mande qu soso ñjoro kondé nekañgurí, “Urika khumoní! Uni ñunde qundo nokono ñano kama yoweya!”

^o 22:12 “*hutunjo mande*” ñuko komo suki Anutuko *Sainai* purímo *Moses* inoní Israel unipare yunaró. Mande ñuko Juda unipareto yoto-yotoye soso sopoyaró. ^p 22:17 “*Ya Surumí*” ñuko Anutu koro ya qu, ñunoko Juda unipareto Anutu koya huruwowero quro hu-hariri teyañgurí. ^q 22:19 “*huru-huru ya*” ñuko Juda unipareto ya parámi mu. *Sapat naruko* ñuno hu-hariri tero Anutu koro mandí weyoyi ñjoro hariri teyañgurí.

²³Ɔunde yero hurí tero wimbo-wimbo nekero kowe punu-punuye piru qu^r se wendaŋe raŋoro kuku somoyaŋgurí. ²⁴Asa ko kuma unindoro uni kembé ŋundo^s kuma uni yimitoro ŋande yaró, “Pol yano re oya haususuwoya ŋande oseseyuri, do murí karo unipareto niri-niri parámi ŋunde teyoteŋgo,” yaró. ²⁵Asa kusiyoro haususuwowero taŋgurí quno Polko kuma unindoro sopo-sopo ka^t ŋande oseseyaró, “Yembe meté Rom uni mande khono kama kaŋaró qu ka haususuwowaŋgo?”

²⁶Yiniqo, sopo-sopo uni ŋu kuma unindoro uni kembé ŋuno uyaro oseseyaró, “Ke do tewero? Uni ŋuko Rom uni ka.”

²⁷Ko uni kembé ŋundo Pol ŋande miraró, “Ke no nimito. Kepe Rom uni kape ma kini?”

Yini, “Iyo,” yaró.

²⁸Yini ŋande yaró, “Nondo kimo parámi raŋoro Rom uni tanowó.”

Ko Polko yaró, “Quko námbó pisi niriŋqo, nondo Rom uni tanowó.”

²⁹Ɔunde ŋuro kuma unindo oseseyowero qundo waka ta toŋeŋgurí. Kowe kuma unindoro uni kembé ŋundo sasaro taró. Dokoro enendo Pol, Rom uni ka, kusiyaró.^u

Polko Juda koro uni pará-pará toŋeyemo mande yaró

³⁰Kuma unindoro uni kembé ŋundo do murí horé karo Juda unindo Pol mande kho inoyaŋgo ŋuro iŋowero taró. Ɔunde ŋuro saraŋoní re rotoro o qa-qa unindoro tapá unindoya uni pará-parámboya neko yirini mahe huruwaŋgurí. Ko Pol rero rotoní

Sanedrin huru-huru^v ŋuro toŋeyemo kaŋaró.

23 ¹Polko kaŋero Sanedrin kondé toŋetero yaró, “Uni topo, no iŋo-iŋonemo ŋande iŋoteno, ko naru rokóŋoro Anutu koro o qu howeyoteno arero itaka ŋa.” ²Yiniqo, o qa-qa unindoro tapá uni Ananias ŋundo uni Pol koro taŋgímo kaŋaŋgurí ŋu yimironí maŋgó tamaŋgurí. ³Ɔunde ti Polko miraró, “Ke hoŋgo ka sono sara-sarapo sonowaŋgurí qu! Anutuko ke kuroweya! Qeno, ke mande khono norotoro hutuŋo

^r 22:23 Ɔu naruko ŋuno Judia mirako ŋuno unipareto kowe punu-punuye irisa punuwoyaŋgurí. Kako quroyómo punuwoyaŋgurí. Tuwi piru saŋanímo ŋuko matú kutiti ŋu wisumuŋaró. ^s 22:24 “kuma unindoro uni kembé” ŋunde qundo kuma uni 1,000 wiri yereyara. *Rom* koro wiri yerete uni parámi ŋundo Judia mira ŋuya wiri yereró. Asa ko enejo kuma uniyómbó Yerusalem ŋuno kunditero unipare sopo yereyaŋgurí. ^t 22:25 “kuma unindoro sopo-sopo uni” ŋuko *Rom* uni ka, enendo kuma uni 100 sopo yereró. ^u 22:29 Polko *Rom* koro uni, ŋuya Juda koro uni qu ka. Komo, enejo iwímbope ma usí peka owé ka rero Rom koro uni tunoqaró. Ɔunde ŋuroko enejo sowe qu ŋuya Rom koro uni taŋgurí. Uni ŋunde quko oteteyembo topé piyimi kina kama raŋgurí. Asa ko kuma unindoro uni kembé ŋu eneŋombo topé piyimi reweya, peka. ^v 23:0 “*Sanedrin*” ŋuko uni kembé-kembémboro huru-huru ka. Enendo Anutu koro *hutuŋo mande* sopo-ro Juda unipare sopo yereyaŋgo.

mandewore^w ronda nerete, quko kenjombo nanje mande ŋu karóŋoro no nuri yero yimirote!”

⁴Yini uni kutaqemo kaŋaŋguri ŋundo yaŋguri, “Ke peka Anutu koro o qa-qa unindoro tapá uni ŋu ŋunde huwóŋote, peka?”

⁵Ko Polko yaró, “Uni topo, ŋuko o qa-qa unindoro tapá uni qu ŋu kama iŋoro yeteno. Dokoro sokomeko ŋuno ŋande nakayáŋaró, ‘Ke uniparetoro wiri yerete uni ŋuya mande piyimi ma yimitoyowero.’^x”

⁶Asa Polko ŋande iŋaró, ko sopo-sopo uni ŋuno huruwaŋguri kumi muko Sadyusi^y ko kumi Farisi.^z Ŋunde ŋuro Sanedrin ŋunoko nekero ŋande yaró, “Uni topo, noko Farisi koro wini qu ka, ko awane ŋuya Farisi koro wini qu ka. Nondo unipare kumaŋguri qundo pitu ko otoqowaŋgo, yero iŋondutu teteno. Ŋu murí ŋuro no norero mande khono norotoyoteŋgo.” ⁷Ŋunde yiníqo, Farisi unindoya Sadyusi unindoya kiro puso tiqo, huru-huru ŋuko usowaró. ⁸Dokoro Sadyusi unindo ŋande yeyanjo, unipare kumaŋguri qundo pitu ko kama otoqowaŋgo, ko sambo simó^a kama yoteŋgo, ko yuqa piyimi ŋuya kama yoteŋgo. Quko Farisi unindo o kapusa ŋuro iŋondutu teyanjo.

⁹Asa ko niri-niri parámi tero Farisi koro hutuŋo mande ŋuro iŋo-iŋo uni^b kumimboko kondé ŋande yaŋguri, “Nore uni ŋaro quhurí ka kama qeneteto. Yuqa kato eneya mande tarómbe, ma sambo simó kato eneya mande taró, peka.” ¹⁰Yiqo, kiro saŋgiri ŋu parámi horé taró, ko kuma unindoro uni kembé ŋundo,^c Pol kawore-kawore towo wosoyi wuriwe tete, peka, ye iŋaró. Ŋunde ŋuro kuma uni yimironí uni keweroyemo uro rero kuma unindo ya quroko oŋguri.

¹¹Asa saraŋoní suwono Uni Parámimbo Pol taŋgímo kaŋero miraró, “Newondeke kondé yoní. Keto neneŋo mandene ŋa Yerusalem ŋuno ya, ŋunde nanje oro Rom ŋuno ŋuya yesowoweya.”

Juda uni kumimbo, Pol urato khumoweya, yero mande kusiyanguri

¹²Saraŋoníqo, Juda uni kumimbo koporo mande kusiyoro ŋande yaŋguri, “Hamó yeteto, ko noreko oka kama neyate oro Pol urato

^w 23:3 “*hutuŋo mande*” ŋuko komo suki Anutuko *Sainai* purímo *Moses* inoní Israel unipare yunaró. Mande ŋuko Juda uniparetoro yoto-yotoye soso sopoyaró. ^x 23:5 Toŋeŋguri 22:28 ^y 23:6 “*Sadyusi uni*” ŋuko unindoro huru-huru ka Israel mirako ŋuno yaŋguri. Eneko wondo uni kumi owéye parámi tero unipare soso sopo yereyaŋguri. ^z 23:6 “*Farisi uni*” ŋuko unindoro huru-huru ka Israel mirako ŋuno yaŋguri. Enendo Anutu koro *hutuŋo mande* ŋuro okeyá ta howero uniparetoro toŋeyemo owéye parámi taŋguri. ^a 23:8 “*sambo simó*” ŋuko komo suki-suki Anutuko unipare kama yoriní tunoqi sambo simó yondowaró. Ko itaka eneŋo sunará teyoteŋgo. ^b 23:9 “*hutuŋo mande ŋuro iŋo-iŋo uni*” ŋundo Anutu koro mande ŋu unipare rondaqe yunoyaŋguri. ^c 23:10 “kuma unindoro uni kembé” ŋunde qundo kuma uni 1,000 wiri yereyara. *Rom* koro wiri yerete uni parámi ŋundo Judia mira ŋuya wiri yereró. Asa ko eneŋo kuma uniyómbo Yerusalem ŋuno kunditero unipare sopo yereyaŋguri.

khumoníqota.”¹³ Uni mande hamó yero mande kusiyangurí ñuko 40 ñundi. ¹⁴Asa ñunde yero o qa-qa unindoro tapá unindoya uni kembé-kembémboya ñuno oro ñande yimirangurí, “Nore mande kusiyoro mande hamó mongo yero ñande yatowó, ko nore oka kama neyate oro Pol urato khumoníqota. ¹⁵Ñunde ñuro yeya Sanedrin ñuya kota mande rika kuma unindoro uni kembémo oní Pol rero yeno umbuweya. Ye kota mande yewango ñuko ñandiro, ko yendo Pol koro murí ñu okeyá ta ñowero ye ñotenggo. Asa ko yeno mahe yoroní urato khumoweya.”

¹⁶Quko Pol okímbo mondó sóqero uri khumoweya mande kusiyangurí ñu ñoro toñero kuma unindo ya quroko oro Pol ñuro miraró.

¹⁷Ñunde ñuro Polko kuma unindoro sopo-sopo uniye nekoró miraró, “Simó keta ña reya kuma unindoro uni kembémo oyika mande ka miroweya.” ¹⁸Ñunde yiníqo, re toworo uni kembémo oro ñande yaró, “Kusi-kusi uni Pol ñundo no neko nerero nimiróní uni keta ña rero mande ka re kunowero keno maheteno.”

¹⁹Yiní uni kembé ñundo simó keta ñu kandímo toworo rero tapémo uro ñande oseseyaró, “Keto do mande ka noya yewero?”

²⁰Yiní yaró, “Juda uni kumimbo mande ka ñande kusiyangurí, ko kuyepo osese kiri keto Pol rero Sanedrin ñuno re uweya. Kota mande ñande yewango, enendo Pol koro murí ñu okeyá ta ñowero ye ñotenggo. ²¹Quko ke mandeye ñu ma howewero. Uni kumi muko 40 ñundi, ñundo mande hamó ñande yero, o koro kundíni teyate^d Pol urato khumoníqota, yangurí. Ko itakako o roñgaruworo keto meté yekata yero ke sopo kereyotenggo.”

²²Ñunde yiníqo, uni kembé ñundo simó keta ñu mande kondé ñande miraró, “Keto mande no nimirote ña yero uni ka ma yimirowero” yiní toñeró.

Rom koro unindo Pol rero Sisaria yendémo unğurí

²³Asa, kuma unindoro uni kembé ñundo kuma unindoro sopo-sopo uni irisa neko yerero yimiraró, “Yari kuma uni 200 ñundi, ko uni hosi sañano kunditeyotenggo 70 ñundi, ko uni sañgaye se towoyotenggo 200 ñundi ñu yoriri suwono 9 kilok ñunoko Sisaria yendémo ñuno uwango. ²⁴Ko Pol ri hosi sañano kunditero wiri yerete uni Feliksiko^e ñuno khewore uní.” ²⁵Ñunde yero sokome ka ñande nakayañaró.

²⁶No Kolotias Lisias, nondo Wiri Yerete Uni Feliks, keya kosa meté yeteno.

^d 23:21 “kundíni” teyangurí quno ñuno unipareto Anutu ñoro eneño ri umbuní naru kanata, irisa ñundi o kama nañgurí. ^e 23:24 “Feliks” ñuko Rom koro uni ka, enendo Rom koro wiri yerete uni parámi kusunoyómo yotoro Judia mira ñu wiri yereró. Naru rokóro Sisaria yendé parámimo kunditeyara.

27 Uni ŋako, Juda unindo toworo, uratoka khumoní, yero taŋgurí. Uko komo uni kato, ŋuko Rom uni ka, yi iŋanowó, ŋunde ŋuro noya kuma unindoya oro kandeye moŋgo re toŋetowó. 28 Ko nondo do murí karo mande khono rotaŋgurí ŋuro iŋowero quoro rero huru-huruyemo utowó. 29 Uro ŋande iŋanowó, ko o taró ŋuko hutuŋo mandeye naŋge karóŋaró, norendo urato khumowero qu kini, ko kusi-kusi yano rotowero qu kini. 30 Asa uni kumimbo, uni ŋu urato khumoní, yero mande kusiyoyi mande ŋu nono tunoqaró. Ŋunde ŋuro nondo asáŋowe keno uró ŋu. Kowe no unindo uni ŋa mande khono rotowero ye iŋoteŋgo ŋu yimirowe ene ŋuya keno uro iŋo-iŋoye toŋeŋgemo yewaŋgo.

31 Sokome ŋunde nakayáŋoro riní kuma unindo mandí howero Pol rero Antipatiris yendémo ŋuno suwono uŋgurí. 32 Saraŋoní kuma uni khímo uyareyaŋgo ŋu rohoréŋoro yano pitu ko oŋgurí. Ko kuma uni hosi saŋano kunditaŋgurí ŋundo naŋge Pol rero Sisaria uyaŋgurí. 33 Uyate Sisaria oro sokome ŋu rero wiri yerete uni ŋu inaŋgurí, ko Pol ŋuya re mahi toŋímo kaŋaró. 34 Wiri yerete uni ŋundo sokome ŋu weyoro Pol oseseyaró, “Ke do mira ka noŋgo qu?”

Yiní yaró, “Noko Silisia noŋgo qu.”

35 Yiní yaró, “Uni mande khono korotowero ye iŋoteŋgo ŋundo mahikata mande kho ŋu tewano.” Yero ŋande yimiraró, “Reya uya wiri yerete uni Herotko yano^f ŋuno sopoyoyi.”

Polko Rom koro wiri yerete uni Feliks toŋímo kaŋaró

24 1 Asa kosa naru kandeka ŋunde rotoro o qa-qa unindoro tapá uni^g Ananias ŋuya uni kembé kumimboya maŋgó uni owí Teritulul ŋuya ŋuno uŋgurí. Uro wiri yerete uni mitoro do murí karo Pol rero mande khono rotaŋgurí ŋuro miraŋgurí. 2 Miroyi Pol nekoní mahiní Teritululsko ŋu murí ŋuro ŋande yaró, “Uni parámi Feliks, naru piruko ŋuno keto nore wiri niri meté kunditeyoteto.^h Iŋondutuke meté ŋundo nore samaka nerero keto o piyimi qundo noreŋo wini qu rambaruru nereyaró ŋu roŋgaruwaró. 3 Ŋunde ŋuroko Feliks, keko uni meté horé, ko nore naru rokóŋoro ŋuro yuŋguna kereyoteto. 4 Uko yate nondo naru piru kusi kerewano koro. Meté keŋo newonde metémboro naŋge mande tukuni ka iŋo.

5 “Nore ŋande iŋoteto, ko uni ŋano qundo otete piyimi horé teyote. Enendo kiro kuma riní Juda uni soso keweroyemo ko mira yendé soso

^f 23:35 Komo “Herotko” Juda unipare sopo yerero ya parámi ŋu towaró. ^g 24:1 “o qa-qa unindoro tapá uni” ŋundo *Ya Surumímo* hu-hariri sopo ronda-ronda huru-huru owí muko, “*Sanedrín*,” ye nekoyangurí ŋu sopoyaró. ^h 24:2 “Feliks” ŋuko *Rom* koro uni ka, enendo Rom koro wiri yerete uni parámi kusuyoyómo yotoro Judia mira ŋu wiri yereró.

ɲuno tunoqeyote. Eneko Nasaret yendé uni karo usowo-sowo quro uni korete-koretaye. ⁶⁻⁷Ko Ya Surumí ɲuⁱ ɲuya riní pusú tewero taró, quko toworo kusiyatowó. ⁸ɲunde ɲuro keɲombo uni ɲu oseseyoya eneɲo maɲgó moɲgo o soso norendo ɲuro rero mande khono rotatowó ɲu iɲoweya.”

⁹ɲunde yiní Juda unindo ɲuya samakaɲoro ɲande yesowaɲgurí, “Mande ɲu soso hamó.”

Polko eneɲo sowo mandeyó yero Feliks miraró

¹⁰Asa wiri yerete uni ɲu kandímbo rokóɲoníqo, Polko mande topé ɲande yaró, “No iɲoteno, kumima naru qambu ke unipare ɲaro ronda-ronda uniye yora. ɲunde ɲuro ningun-ningu tero mandeye topé yewe teteno. ¹¹Keto uni oseseyeweya tiníqo, ke ɲande iɲoweya, ko nondo komo kosa naru 12 amena Anutuko potoruku te inowero Yerusalem ɲuno onowó. ¹²Uni mande kho nunoyotenggo ɲundo no niyi eneya mande saɲgirí Ya Surumímo ɲuno kama yanowó, ko huru-huru yaye^j kumimo ɲunope ma yendémo unipare qambu kama okoko yerenowó. Kini. ¹³Ko mande ɲa yero no norero mande khono norotaɲgo ɲako, enendo mande kho ɲuro murí hamó ɲu ri tunoqewero mepémo kini. ¹⁴Quko nondo mande ka keno yewe teteno. Khe ɲaro eneɲombo ɲande ye nekotenggo, ‘Usowo-sowo,’ ɲuko no hamó howeyoteno. Nondo Khe^k ɲu howero usi-sinanimboro Anutuye ɲuro potoruku te inoyoteno. Nondo Hutuɲo Mande soso koya Ye-ye Unindo mande nakayáɲaɲgurí ɲuya soso iɲondutuwoyoteno. ¹⁵Uni mande kho nunoyotenggo ɲaya noya o kanata quro kondé iɲoyoteto, ko Anutuko uni soso khumaɲgurí mu, asa uni roneneɲowímboya uni piyimimboya soso yoriní pitu ko otoqowaɲgo. ¹⁶ɲunde ɲuro no naru rokóɲoro Anutu toɲímo ko unipare toɲeyemo ɲuya no kondé tero otete sopowero quro iɲo-iɲone ɲu rewe roneneɲoní o piyimi ka kama teyoteno.

¹⁷“No kumima naru kumimo mira meywomo yate pitu ko ɲano mahenowó. Nondo mone siyoro sitú topo-topone ooro tukuni teyaɲgo ɲu samaka yerenowó, ko o qa-qa^l Anutu te inowero qu se mahenowó. ¹⁸ɲunde tanowó, ko Anutu toɲímo sara tunoqewero otete ka tero Ya Surumímo ɲuro quroko oweqo, no niyaɲgurí. Unipare soɲga ta naɲge noya yatowó. Ko norendo niri parámi ka kama tatowó. ¹⁹Quko Juda uni kumimbo Esia mira parámi moɲgo qu Ya Surumímo ɲuno yaɲgurí.

ⁱ 24:6 ^j 24:12 “huru-huru ya ” ɲuko Juda uniparetoro ya parámi mu. *Sapat naruko* ɲuno hu-hariri tero Anutu koro mandí weyoyi iɲoro hariri teyaɲgurí. ^k 24:14 “Khe” ɲuko murí keta qu iɲondutu unipareto howeyaɲgurí. ^l 24:17 “o qa-qa ” ɲunde qu unipareto Anutu iɲoro potoruku te inoro nú-qare ka o qa-qa uni inoyi uroní khumoní wondo yakutímo ɲuno qaró.

Uni ñundo meté mahero toñengemo kañero mande kho nunowaño, peka. ²⁰Ñunde kini tiníqo, asa uni ñano qundo no Sanedrin toñeyemo kañanowó quno do quhurí ka nono qeneñgurí ñu meté yewaño.

²¹Mande kanata karo mande kho nunoyoteño nañge, peka. Ñu naruko ñuno nondo keweroyemo kañero kondé ñande kiwanowó, ‘No unipare khumañgurí qundo pitu ko otoqowaño ñuro iñondutuwoyoteno. Ñunde ñuroko no norero mande khono norotoyoteño ña.’”

²²Feliksiko Khe ñuro komo iñaró, ñunde ñuro ñande yaró, “Imemoño kuma unindoro uni kembé,^m Lisias ñu, mahe umbuníqota nondo mande ña roñgaruwowano,” yero Juda uni asá yiriní toñengurí. ²³Ko enendo kuma unindoro sopo-sopo uniyeⁿ ñu mironí Pol sopoyuri, quko kondé ma kusiyowero, enejo topé-topémbo o qímboro se mahewaño, yaró.

²⁴Imemoño ta Feliks koya parí Durusila koya mahiriyó. Durusila ñuko Juda pare ka. Ko Feliksiko Pol nekoní mahero unipareto Yesu ñuko Kristo^o ñu iñondutu teyoteño ñuro yiní iñaró. ²⁵Polko otete roneneñowí^p ñuro yaró, ko uni kato enejo meté sopoyote ñuro yaró, ko imemoño Anutuko unipare ronda yereweya ñuro yaró. Ñunde yiníqo, Feliks sasaro tero yaró, “Koro ñu! Toñe. Imemoño naru ka yoníqo, neko kerewe maheweya.” ²⁶Ñunde yaró, quko oka karo ñuya ñande ye iñaró, ko Polko peka kina rotowero ñuro mone ka inoweya, peka. Ñunde ñuro naru qambu nekoní mahiní ñuya mande yeyari.

²⁷Yate-yate kumima naru irisa ñunde rotoro Posias Festus ñundo Feliks mepé raró. Ko Feliksiko, Juda uni enejo metéñowaño, ye iñoro Pol rotoní kusi-kusi yano yaró.

Polko wiri yerete uni Festus toñímo kañaró

25 ¹Asa Festus^q ñu Judia mirako mahiníqota kosa naru kapusa kini tiní Sisaria yendé rotoro Yerusalem oró. ²Oní o qa-qa unindoro tapá uni kumimboya Juda koro uni pará-parámboya eneno uyaro Pol mande kho inoyañgurí. Ene kondé eneya ñandiro yañgurí, ³“Keto noreño metéñoya uni ñu ri Yerusalem areweya.” Ñunde yañgurí, dokoro kheko sóqero, Pol uratoka khumoní, yero tañgurí. ⁴Asa Festusko mande topé yaró, “Pol Sisaria ñuno kusi-kusi yano yote, ko naru tukuni ta neneñombo Sisaria uwano. ⁵Ñunde ñuro tapá uniye muko noya uwato.

^m 24:22 “kuma unindoro uni kembé” ñunde qundo kuma uni 1,000 wiri yereyara. *Rom* koro wiri yerete uni parámi ñundo Judia mira ñuya wiri yereró. Asa ko enejo kuma uniyómba Yerusalem ñuno kunditero unipare sopo yereyañgurí. ⁿ 24:23 “kuma unindoro sopo-sopo uni” ñuko *Rom* uni ka, enendo kuma uni 100 sopo yereró. ^o 24:24 “Kristo” ñuko Anutuko rokóñoní mahero wiri yerete uni parámi horé tunoqaró ñu. ^p 24:25 “otete roneneñowí” ñuko Anutuko nore rokó yiriní noreño murínani enejo murí howeyote. ^q 25:1 “Festus” ñuko *Rom* koro uni ka, enendo Rom koro wiri yerete uni parámi kusuyoyómo yotoro Judia mira ñu wiri yereró.

Ko uni ŋuro quhuríño ka yote tiníño, asa enendo rero mande khono rotowaŋgo.”

⁶Festus eneya yotoro naru kande saŋiyoro kapusape ma kande irisa ŋunde rotoro Sisaria uró. Uní saraŋoníño, mande kho inowero yakutímo^r kunditero yimiraró, Pol re mahi qembe, yaró. ⁷Ri mahiní Juda uni Yerusalem rotoro umbuŋurí qundo wuririyoro mande quhurí yero saŋgawaŋgurí. Quko mandeyembo murí hamó wisiyowero mepémo kini.

⁸Asa Polko mandeye topé ŋande yaró, “Nondo o piyimi ka kama tanowó. Nondo Juda unindoro hutuŋo mande qu kama karóŋanowó, ko Ya Surumínani^s kama roworemanowó, ko Sisa^t mandí kama wendaqanowó.”

⁹Yiní Festus ŋundo Juda uni meté yerewero Pol ŋande oseseyaró, “Ke date iŋote, meté oyika nondo o quhurí ŋaro Yerusalem ŋuno iŋowanope ma kini?”

¹⁰Polko ŋande yaró, “No itaka Sisa koro ya ŋano naŋge kaŋewe mande kho ŋu iŋoweya ŋuro yeteno. Ya meyowo ŋuno kaŋewero mepémo kini. Ke ŋande iŋote, noko Juda uniko ŋuno o piyimi ka kama tanowó. ¹¹Quko no oka khumowero quro tanowó tiníño, meté nuri khumowano. Quko kota mande yero no norero mande khono norototenŋo tiníño, asa uni kato norero kandeyemo rotowero wimbí moré kini. Nondo Sisa nekowe roŋgaru nereweya.”^u

¹²Ŋunde yiní Festus koya eneŋo iŋo-iŋo uniyómboya epe mito-mito tero ŋande yaró, “Ke Sisa nekote. Ŋunde ŋuro eneno oweya.”

Festusko Pol koro sowo mandeyó ŋu yero Agripa miraró

¹³Imemoŋgo ta wiri yerete uni ka, owí muko Agripa,^v koya kuwí Berinais koya Sisaria mahero Festus koya naru meté yariyó. ¹⁴Irisa ŋu Sisaria yendémo ŋuno naru piru yariyó, ŋunde ŋuro Festus koya wiri yerete uni ŋuya Pol koro sowo mande ŋuro epe mito-mito tariyó. Festusko ŋande yaró, “Komo Feliksiko uni ka rotoní kusi-kusi yano yora. Itaka yote. ¹⁵Komo no Yerusalem ŋuno owé o qa-qa unindoro tapá unindoya Juda koro uni kembé-kembéyembo mande kho inoro ŋande kira nereŋgurí, ko meté Pol urato khumoweya.

^r 25:6 “mande kho inowero yakutí” ŋunde quno ronda-ronda unindo ronda-ronda mande meté yeweya, ŋu noŋgo naŋge mandí wimbu moré. ^s 25:8 “Ya Surumí ” ŋuko Anutu koro ya qu, ŋunoko Juda unipareto Anutu koya huruwowero quro hu-hariri teyaŋgurí. ^t 25:8 “Sisa ” ŋuko *Rom* koro wiri yerete uni parámi ŋu. Rom unindo mirane-mirane wini soso sopo yereŋgurí. ^u 25:11 Ŋu naruko ŋuno *Rom* uni soso, Pol ŋunde qembe, ŋande meté yewaŋgo, ko Rom koro wiri yerete uni parámi Sisa ŋundo mande khoye iŋoweya. Asa mande ŋunde yewaŋgo tiníño, ronda-ronda uni meyowombo mande kho iŋowero mepémo kini. ^v 25:13 “Agripa” ŋuko *Herot* koro sowe qu ka. Enendo *Rom* koro wiri yerete uni parámi kusunoyómo yotoro mira ka Juda uniparetoro miraye sumeyo qu sopo yereró.

¹⁶“Mandeye topé yanowó, ‘Noreko Rom, noreño murínani nđandiro, uni ka kina kama urato khumoweya. Kini, koretero uni nđundo danimbo mande kho inoyotenjo quro toņeyemo kaņero mandeye topé yeweya.’
¹⁷Asa ko uni pará-pará nđundo nono mahiqo, mondó kama yoranowó. Kini, saraņoníqo mande kho inowero yakutímo^w kunditero uni nđu re mahi qembe yanowó. ¹⁸Ri mahini enejo saņgiríño nđundo kaņero mande kho inoyañgurí, quko o piyimi taró nđuko o enesó naņge. Komo o nđunde quro kama iņoyanowó. ¹⁹Kini, enejo yambo haririyembo murí yero uni ka khumaró qu, owí muko Yesu, nđuro kiro kuma yeyañgurí. Polko uni khumaró nđuro, toņí yote, yaró. ²⁰No mande murí nđu seqanowó, quko no nđu wisiyowero mepémo kini. Asa ko nondo oseseyanowó, ‘Kepe meté Yerusalem oyika nondo o quhurí nđuro nđuno iņowanó?’ yanowó. ²¹Quko Polko yaró, ene kusi-kusi yano yowero iņote, ko imemoņgo wiri yerete uni parámi horé eneņombo mande nđu roņgaruwoweya. Nđunde nđuro nondo kusi-kusi yano yoní yanowó, imemoņgo nondo asáņowe Sisa nđuno oweya.”

²²Nđunde yiní Agripako Festus miraró, “No neneño naņge uni nđu iņowero iņoteno.”

Yiní yaró, “Kuyepo keto meté iņoweya.”

²³Asa saraņoníqo, Agripa koya Berinais koya o nakayá qambu tero kuma unindoro uni kembémboya yendé uni pará-parámboya huru-huru yano mahęgurí. Mahi Festusko yiní unindo Pol re mahęgurí. ²⁴Mahi nđande yaró, “Wiri yerete Uni Agripa, ko ye uni soso noreya yoteto qu, ye uni nđa qeni. Juda unipare soso, Yerusalem yotenjo quya nđano quyako uni nđaro osese nerero kondé nekoyañgurí, ‘Uni piyimi nđunde qundo yowero mepémo kini.’ ²⁵Quko nondo qeneteno quko ene oka kama taró nđuro tero kama khumoweya. Quko eneņombo wiri yerete uni parámi horé nđu nekoní roņgaruwoweya. Nđunde nđuro tero nondo mande kusiyoro asáņowe toņeweya. ²⁶Quko nondo enejo mande date nakayáņowe uni paráminemo owero quro kama iņoteno. Nđunde nđuro, nondo uni nđa yeno re maheteno, ko Wiri yerete Uni Agripa, keno nđuya re maheteno. Nore soso enejo murí seqatoqota nondo mande hamó ka meté nakayáņowanó. ²⁷Dokoro mande ka kama yero kina kusiyoro asáņowanó tiníqo, ore piyimi howeyowanó.”

Polko mande yesoworo Agripa miraró

26 ¹Asa Agripako Pol miraró, “Ke keņo mande qu ye.”
 Nđunde nđuro Pol kandí hokoro mande nđande yaró, ²“Wiri yerete Uni Agripa, iņo. Itaka no toņeņgemo kaņero Juda unindoro

^w 25:17 “mande kho inowero yakutí” nđunde quno ronda-ronda unindo ronda-ronda mande meté yeweya, nđu noņgo naņge mandí wimbu moré.

mandeye soso topé yewano. ³Hamó, keko Juda uniparetoro muríye injomukote, ko o kumi njuro kiro kuma yeyotenggo njuro injomukote. ⁴Nunde njuro njande osese kereyoteno, mandene na injoya waka ta ma piyimiñowero.

⁴“Juda uni soso njundo khe u-une, asa no miranemo simó yorano qu nonjgo yate Yerusalem njuno yoranowó quro injomukotenggo. ⁵Naru piru no injo nunoyangurí, ko enendo nungurí tiníqo, nene muríne meté yewanggo. ⁶Njande injoyotenggo, ko noko Farisi unindo^x otete qu howeyano. Wini njundo norejo hutuño mande^y okeyá ta hamó horé howeyotenggo. ⁶Ko itaka komo Anutuko usi-sinanimboya mande ka kusiyaró quro no mande khono kañeyoteno. ⁷Norendo wini qu 12 njundo kosano suwono Anutuko mande kusiyowí riní o meté mu tunoqeweya njuro injoro soporo enejo khoyó teyoteto. Asa, Wiri yerete Uni, injo. O meté mu tunoqeweya njuro nanje Juda unindo mande kho nunoyotenggo. ⁸Do karo ye kato Anutuko uni khumaró mu riní otoqaró njuro injondataqeyotenggo?

⁹“Komo no neneñombo o qambu tero, Yesu Nasaret nonjgo nj u owí rewe umbuweya, kondé ye iñanowó. ¹⁰Ko no Yerusalem njuno njunde tanowó. No o qa-qa unindoro tapá uni^z nonjgo wimbu rero unipare meté horé nj yorero kusi-kusiko yorotanowó. Ko mande khono kañiqo, uni pará-parámbo, yurato khumowanggo, yangurí quno no njuya njunde yanowó. ¹¹Ko naru parámi nondo huru-huru ya^a enemo-enemo seqa yerero yondoworo enendo Anutu yesaráñowero kondé yimitoyanowó.^b Hamó, nondo eneya newonde sañgirí nanje tero yendé sewemo njuno njuya yohowero o piyimi te yunoyanowó.

¹²“Naru kano o njunde tewero quro khendo unowó. Komo o qa-qa unindoro tapá uni nonjgo wimbu rewe Damaskus yendémo njuno asá niri unowó. ¹³Asa Wiri yerete Uni Meté, injo. Kosa keweroko khewore uroqo no sambo sañano hiyó kako kosa koro hiyó takaró qu qenenowó. Hiyó njuko noya uni noya mahetowó njuya noreno parámi hiyóqaró. ¹⁴Nore soso rokaráñoro nokono umbutowó, ko no mañgo ka Hibru mandeko iñanowó. ¹⁵Njande yaró, ‘Sol, Sol, ke do karo no rambaruru nereyote? Keto tisi ka pitoro kejo njuya rambaruru teyote.’

¹⁵Ko nondo yanowó, ‘Uni Parámi, ke dani?’

^x 26:5 “Farisi uni ” njuko unindoro huru-huru ka Israel mirako njuno yangurí. Enendo Anutu koro hutuño mande njuro okeyá ta howero uniparetoro toñeyemo owéye parámi tanjurí.

^y 26:5 “hutuño mande ” njuko komo suki Anutuko Sainai purímo Moses inoní Israel unipare yunaró. Mande njuko Juda uniparetoro yoto-yotoye soso sopoyaró.

^z 26:10 “o qa-qa unindoro tapá uni ” njundo Ya Surumímo hu-hariri soporo ronda-ronda huru-huru owí muko, “Sanedrin, ” ye nekoyangurí nj u sopoyaró. ^a 26:11 “huru-huru ya ” njuko Juda uniparetoro ya parámi mu. *Sapat naruko* njuno hu-hariri tero Anutu koro mandí weyoyi injoro hariri teyangurí. ^b 26:11 Unipare njundo Anutu yesaráñowango tiníqo, Polko meté mande khono yorotoweya.

Ko Uni Parámimbo yaró, ‘Noko Yesu, keto no rambaruru nereyote. ¹⁶Quko ke otoqoya kañe. Nondo ke neneño kho qu kunowero keno tunoqeteno. Ko neneño o qu itaka qenete ko imemongo witú kerewano ñuro yesowoweya, ñuro rokó kereteno. ¹⁷Nondo keño wini qu kandeye mongo ko uni wini meyowo^c kandeye mongo ñuya ta kerewano. Nondo asá kerewe toñero ¹⁸eneño toñeye ri hiyóqiní huriri rotoro hiyómo owaño, ko Monimbu koro wimbí rotoro Anutuko owaño. Ñunde ñuro tero nondo quhuriye se rotoweqo, enendo unipareto ñjondutu nerero meté horé yotengo ñuya yuri.’

¹⁹“Asa, Wiri yerete Uni Agripa, iño. No sambo koro kapo qenenowó ñu kama wendaqanowó. ²⁰Kini, no koretero Damaskus yendémo ñuno, ko imemongo Yerusalem ñuno, ko Judia mira koro yendé soso ñuno, ko uni wini meyowo quno ñuno ñuya mande yesowanowó. Ñande yimiranowó, ‘Ye newonde rohoré teya Anutuko oyi, ko newondeye rohoréñangurí qu oteteyewore witú yiri qembe.’ ²¹Ñu murí ñuro tero Juda unindo, uratoka khumoní, yero Ya Surumímo^d nondowañgurí. ²²Ñunde ñuro Anutuko samaka nereyoní, yate arero itaka ña. Asa ko no ñano kañeteno, ko no uni owéye moré kini quya uni pará-pará quya soso mande yesowoyoteno. Ko mande yeyoteno ñuko komo ye-ye unindoya Moses^e koya yañgurí nañge. ²³Ñande yañgurí, ‘Ñu Kristo^f ñuko kowe surumí korowoweya, ko eneko uni soso uni tapu koñgo otoqowaño ñuro korete-korete qu yoweya. Ñundiro nañge enendo eneño winiyómboya uni wini meyowo ñuya hiyó ñuro yesowoweya,’ ñunde yañgurí.”

²⁴Polko mande yeyoní Festusko kondé ñande yaró, “Pol, keko kape! Keño iño-iño parámi ñundo koriní kape-kape teyote!”

²⁵Yiní yaró, “Festus, ke uni meté, noko kape kama teteno. Kini. No hamó yeteno, ko iño-iño ñako kape qu kini. ²⁶Wiri yerete uni ñuko o soso ñuro ñjomukote. Ñunde ñuro nondo eneya taño yeyoteno. No ñande ñjoteno, ko o soso ñu sóqero kama tunoqaró. Ñunde ñuro ene gene ñjomukaró. ²⁷Wiri yerete Uni Agripa, kepe ye-ye unindo mande qu ñjondutuwoyote? No ñjoteno, keko ñjondutu teyote!”

²⁸Ko Agripako Pol oseseyaró, “Date koro? Naru tukuni ta ketope no nori Kristen uni^g tewano, yero ñjotepe?”

²⁹Yiní yaró, “Naru tukuni ñundiro meté, ko naru piru ñu ñuya meté. Quko nondo Anutuwoore ñande hariri teteno, ko keya uni soso itaka

^c 26:17 “uni wini meyowo ” ñunde quko Juda uniparete kini qu nañge. ^d 26:21 “Ya Surumí ” ñuko Anutu koro ya qu, ñunoko Juda unipareto Anutu koya huruwowero quro hu-hariri teyañgurí. ^e 26:22 Komo suki “Mosesko ” uni parámi tero Israel uniparete sopo yereró. Anutuko *Sainai* purímo *hutupo* mande inoní mande ñu rondaqe uniparete yunaró. ^f 26:23 “Kristo ” ñuko Anutuko rokónoní mahero wiri yerete uni parámi horé tunoqaró ñu. ^g 26:28 “Kristen uni” ñunde qundo *Kristo* ñjondutuwooro huru-huruko ñuno huruwañgurí. (Asá yerewí Uni 11:26 weyo qembe.)

mandene ijoyotenjo nyaya no qembe tewango. Njunde ti qembe, quko utó kondé qundo kusi neretenjo qu, ny ma rewero.”

³⁰Asa wiri yerete uni nyaya Rom koro uni kembé nyaya Berinai ko uni soso yanguri mu otoqo kanjaguri. ³¹Kajero mirako uro epe mitomito tero njande yanguri, “Uni ny oka kama taró, njuro tero meté kama khumoweyape ko kusi-kusi yano kama yoweya.”

³²Ko Agripako Festus miraró, “Uni njundo Sisa kama nekoníqo, meté keto roti tonjewa.”

Polko wangowore Rom uyarewero uyará

27 ¹Asa wiri yerete uni njundo njande yaró, ko nore Itali mirako^h uyarewato, yaró. Njunde njuro enendo Pol koya kusi-kusi uni kumimboya yore kuma unindoro sopo-sopo uni karo kandímo yorotanjaguri. Sopo-sopo njuro owí muko Julias, ko njuko Okastusⁱ koro kuma unindoro kopo-kopo qu ka. ²Noreko wango ka Atiramitium yendé monjo quno otowó. Wango njuko Esia mira parámimo yendéne-yendéne windi tapéwore uyarewero taró. Asa, nore oro roto tonjetowó. Arisitakus, uni Masedonia mira nonjo qu ka, Tesalonaika yendé nonjo ny noreya uyaretowó.

³Sarajóní Saiton yendémo njuno oro wango kusiyatowó. Juliasko newonde metémboro tero Pol rotoní yendémo oní topé-topémbu wutuwanjaguri. ⁴Asa Saiton rotatoqo, matúmbo wango kikinjojaró. Njunde njuro Saipras noko mosowí huwówore uyaretowó. ⁵Nju nonjo windi karónoro Silisia mira koya Pambilia mira njuno windi tapéwore uyareyate Lisia mirako Maira yendémo njuno oro kusiyatowó. ⁶Njuno kuma unindoro sopo-sopo uni ny wango ka Aleksandria nonjo maheró qu Itali mirako uyareweya ny seqayate qenero njuno otowó. ⁷Nju nonjo uyareto matúmbo wango kikinjoní koweyumu teyuri, yate-yate naru kumi kini tiní Nitusi yendé tanjímimo mahetowó. Matúmbo kikinjoní anduwore uyarewero mepémo kini. Njunde njuro Kiriti noko mosowí huwówore Salamone yendé tanjímimo uyaretowó. ⁸Noko mosowí huwówore koweyumu teyuri, yate-yate yendé kano mahetowó, ny njande ye nekoyango, “Yendé Sóqewí Meté Qu,” yeyango. Njuko Lasia yendé tanjímimo.

⁹Asa windi sajanano uyaretowó quno njundiro naru qambu njunde kini taró, ko naru Juda unindo kundinji koro naruye parámi^j ny komo kini

^h 27:1 Rom yendé parámi ny “Itali mirako” njuno yora. ⁱ 27:1 “Okastus” njuko Rom koro wiri yerete uni parámi horémboro owí ka. Njuro murí muko njandiro, wiri yerete uni parámi horé. Kuma unindoro kopo-kopo kanatape ma irisa nanje wiri yerete unindoro owí ny meté korowanjaguri. ^j 27:9 “kundinji koro naruko” njuno o qa-qa unindoro tapá unindo Ya Surumímboro Wembó Surumí Horémo oro o qa-qa tiní Anutuko Juda unipare soso koro quhuriye se rotaró. Njuko Septemba ma Oktoba njuno tunoqeyara.

taró. Ko windi toqe mahero ŋu piyimi horé taró, ŋunde ŋuro Polko ŋande yimiraró, ¹⁰“Ye uni, no ŋande iŋoteno, ko nore watí uyarewato tiníqo, o piyimi horé tunoqeweya. Situwi, waŋgo, noreŋo yoto-yotonani ŋuya soso piyo teweya.” ¹¹Ŋunde yaró, quko waŋgo simburímbo mande enesó yiníqo, kuma unindoro sopo-sopo uni ŋundo waŋgo simburímbo mande iŋaró. ¹²Yendé sóqewí ŋuko, matú parámi naruko ŋuno waŋgo yendémo ŋuno meté yowero mepémo kini. Ŋunde ŋuro nore qambu qundo Finiks yendémo oro matú parámi naruko ŋuno yendémo ŋuno yowero iŋaŋgurí. Finiks ŋuko Kiriti noko mosowímbo yendé sóqewí qu ka. Ŋuko matú naruko ŋuno meté sóqewero.

Matú parámi kato waŋgo kikiŋaró

¹³Asa yate matú ka wimbí parámi kini tunoqiníqo, yendé sóqewí ŋuno uyarewato, yero iŋoro waŋgo orosoyero Kiriti noko mosowímo ŋuno windi tapéwore uyaretowó. ¹⁴Naru tukuni ta yate matú parámi horé ka “Yurakulon” yeyaŋgo qu, ŋu Kiriti noŋgo umburó. ¹⁵Matúmbó waŋgo kikiŋoníqo, simburímbo eneŋo iŋo-iŋoyó howe uyarewero mepémo kini tero rotoní matúmbó waŋgo riní wimbo-wimbo uyaró. ¹⁶Ŋunde uyareyate Kauta noko mosowí huwówore uyaro nore koweyumu tero waŋgo tomó ta ŋu wosato ¹⁷waŋgo parámi quroko areró.^k Ariní utó kumi siyoro waŋgo parámi ŋu wiwiyatoka kondériní, yero taŋgurí. Yate matúmbó kikiŋoní waŋgo Sirtis ŋuno windi tapémo tokoŋowero yero iŋoro tuwi parámi ka utómbo kusiyoro sono quroko rotaŋgurí.^l Rotoyiqo, matúmbó kina kikiŋoní wimbo-wimbo uyaró. ¹⁸Matú koya windi koya nore kondé pito niriní uya mahe teyatowó, ko saraŋoníqo, situwi se raŋi windi quroko uró. ¹⁹Ko naru kapusayómo ŋuno kandeyembo waŋgo koro kho tewero qu se raŋi umukaró.^m ²⁰Naru piru kosa tutu kama qeneyato matú parámi ŋundo naŋge maheyoní, nore rambaruru tewe teteto, peka, ye iŋatowó.

²¹Asa naru parámi uni ŋundo o kama neyuriqo, Polko keweroyemo kaŋero yaró, “Ye uni, komo Kiriti ma rotowero yimiranowó, quko kama iŋaŋgurí. Mandene iŋaŋgurí tiníqo, kama piyo tewaya. ²²Quko itaka ŋande yimiroteno, kondé kaŋi, ma sorewero. Noreko ka kama piyo tewato. Waŋgoko naŋge piyo teweya. ²³Noko Anutu koro uni qu, no eneŋo khoýó teyoteno. Suwo ŋano Anutu koro sambo simómboⁿ no taŋgenemo kaŋero

^k 27:17 “waŋgo tomó ta” ŋuko, naru rokóŋoro simburímbo utómbo kusiyoro waŋgo parámi huwómo windi saŋano wosoyaŋgurí. Quko matú parámi ŋunde quko huwoyoníqo, tomó ta ŋu wosoro parámi quroko kusiyayaŋgurí. ^l 27:17 “tuwi parámi” ŋunde sonono rotoyikata tuwipo waŋgo kondé wosoní waka ta uyarewero mepémo kini. ^m 27:19 Ŋunde raŋaŋgurí, waŋgoyómbo quhurí ŋuko yowosoní sono quroko rambaruru rewaŋgo koro. ⁿ 27:23 “sambo simó ” ŋuko komo sukí-sukí Anutuko unipare kama yoriní tunoqi sambo simó yondowaró. Ko itaka eneŋo sunará teyotenga.

24 ɲande nimira, ‘Pol, ma sorewero. Keto Sisa koro mande khono ɲuno kaɲeweya. Ko iɲo, uni soso keya waɲgo quroko yotenɲo ɲuko, Anutuko keɲo iɲoní uni ɲuya kama piyo tewawgo.’ 25 ɲunde ɲuro ye kondé kaɲi. No Anutu iɲondutuwowe o tewero no nimira ɲunde naɲge teweya. 26 Quko nore kɛɲgeɲoro noko mosowí kano tokoɲowato.”

Waɲgo ɲu piyo taró

27 Asa naru 14 ɲunde rotoro matúmbo waɲgo kikiɲoní Atiria koro windiwore uyatowó. Uyareto naru 14 quro suwo keweroko ɲuno waɲgo koro kho uniyó, windi tapémo maheteto, yero iɲaɲɲurí. 28 Ene wondo ka utómbo kusiyoro sono quroko raɲoro sono meréɲo rokóɲaɲɲurí, ko meréɲo muko mita 40 ɲundiro taró. Ko waɲgo ɲu soɲga ta uyariniqo, wondo pitu ko raɲaɲɲurí muko mita 30 ɲundiro taró. 29 ɲunde tini sasaro tero wondo parámimo tokoɲowato, yero iɲoro áka^o nimí kini waɲgo kundósina raɲoro kosa waka raɲowero ɲuro hariri taɲɲurí. 30 Kho uni ɲundo mondó ta waɲgo rotowero ye iɲaɲɲurí. Asa ko enendo nore kaná nerero ɲande yaɲɲurí, “Nore áka waɲgo kembésina waɲgo tomówowe raɲowe teteto,” yero waɲgo tomó ɲu utómbo kusiyoro raɲi windi saɲano uró. 31 Quko Polko sopo-sopo unindoya kuma unindoya yimiraró, “Uni ɲu waɲgo parámimo ɲano kama yuriquo, asa yendo rambaruru takawero mepémo kini.” 32 ɲunde ɲuro kuma unindo waɲgo tomó ta ɲu re utóɲo toɲoyi kina uró.

33 Kosa raɲowero tiniqo, Polko meté uni soso o newaɲgo ye yimiraró. ɲande yaró, “Naru 14 ɲunde kini tini yendo sasaro tero o newero quro rukusuwo ro kama neyaɲgo. 34 Quko itaka kondé yimiroteno, o ni. ɲuko samaka yereweya. Yeko rambaruru ka kama rewaɲgo.” 35 ɲunde yeroqo, toɲeyemo bret rero Anutu yuɲɲunaɲoro romboɲero naró. 36 Niníqo, uni soso qeni newondeye rukisoyoní ene ɲuya o kumi siyoro naɲɲurí. 37 Nore waɲgo quroko yatowó ɲuko uni 276 ɲundiro yatowó. 38 Kowe o mepémo ne rotoro wit rotaɲɲurí ɲu se sonono raɲɲurí, ɲunde tatoka waɲgo ɲu taɲo tini, yero iɲaɲɲurí.

39 Kosa raɲoníqo, noko qeneɲɲurí, quko mira ɲu kama iɲaɲɲurí. Ene yendé sóqewí ka quroko oro sotama ka meté quno owero qeneɲɲurí. Ko waɲgo ɲuwore oweya, yero iɲaɲɲurí. 40 ɲunde ɲuro áka koro utó qu soso toɲomukoro windi quroko ɲuno rotaɲɲurí. Rotoro tesawga ɲuko waɲgo dawore kɛɲgeɲowero sopoyote ɲuro utó ɲu orosoyaɲɲurí. Orosoyero tuwi parámi matúmbo huwoyote ɲu hokoyi waɲgo kɛɲgeɲoro windi tapémo uyarewero taró. 41 Quko kutaqemo naɲge uyaro sotama saɲano oro kembésina sorowoní windi toqe mahero kundósina uroní piyo taró.

^o 27:29 “áka” ɲuko o aini ka, quhuríyómbo waɲgo noko windi quroko yote quno ɲuno kekaɲaɲɲurí.

⁴²Ko kuma unindo kusi-kusi uni yurowero taŋgurí, windi saŋawore uyarero kina sorewaŋgo koro. ⁴³Quko kuma unindoro sopo-sopo uniyembo Pol kama khumoweya, yero iŋoro soré yirini kama yuraŋgurí. Ko sopo-sopo ŋundo uni windi saŋawore meté uyarewaŋgo qu yimiraró, “Ye soreya uyaya nokono yurika.” ⁴⁴Ko kumi muko te puŋo se toworo ŋuwore uyarika ko kumi waŋgo piyo ta ŋuro sombé siyoya ŋuwore uyarero tapémo uyareŋgurí. Ŋundiro tero uni soso meté windi tapémo mahęgurí.

Polko Malta noko mosowímo yora

28 ¹Asa nore meté tapémo mahero ŋande iŋatowó, ko noko mosowí ŋuko, Malta, ŋunde nekoyaŋgo. ²Unipare ŋuno qundo o meté parámi nore te nunaŋgurí. Sono umbuní nore kutiti tatoqo, kewá qaro ŋuno kopo nereŋgurí. ³Ŋunde tiqo, Polko te kambiní koporo se maheró. Kewáko riníqo, sire piyimi ka te kambiní quroko kowí tiwi riní sorero Pol kandímo kiro porowaró. ⁴Unipareto qenero yaŋgurí, “Hamó peka, uni ŋando uni uroní khumaró qu ka. Ŋundiro windiko kama uroní khuma, quko murí roneneŋowí quro anutu ŋundo rotoweka toŋí yoní yero kama iŋoyote.”^p ⁵Quko Polko sire ŋu re raŋoní kewá saŋano umburó, ko Pol rambaruru ka kama raró. ⁶Unipareto sopo toŋetero, eneko koŋewero tetepe ma khumoro rokaráŋoro umbuwe tete, yero iŋaŋgurí. Quko naru yate-yate oka piyimi ka eneno kama tunoqiníqo, iŋo-iŋoye rohoréŋoro ŋande yaŋgurí, “Ŋuko anutu ka.”

⁷Asa noko mosowí koro uni kembé ŋu, owí muko Pupilius, eneŋo mira kutaqemo yora. Enendo norero yayómo oro meté ta sopo nereyoní yato kosa kapusa ŋunde rotaró. ⁸Pupilius koro iwí kowí tiwi riní qonziriri tero eteyaró. Etiní Polko oro hariri tero kandí rero saŋanímo riní meté taró. ⁹Ŋunde tiníqo, se khumo uni ŋu mirawore qu Polko mahiqo, yoriní meté taŋgurí. ¹⁰Ŋunde ŋuro unipareto owénani hokaŋgurí. Ko imemoŋgo nore waŋgowore toŋewero tatoqo, o soso nore ŋuro tukuni teyato ŋu se nunaŋgurí.

Polko Rom yendémo ŋuno oró

¹¹Nore kombo kapusa quroko noko mosowímo ŋuno yatowó. Asa imemoŋgo waŋgo kawore toŋetowó. Waŋgo ŋuko Aleksandria yendémboro qu, ko matú parámi naruko ŋuno yate noko mosowímo ŋuno yora. Waŋgo koro kembésinaŋgo kapo-kapo ka yora, ŋuko anutu penzakara owéyari Kasitoru koya Poluks. ¹²Asa toŋeyate Sirakus yendémo ŋuno oro

^p 28:4 Unipare ŋundo anutuye enesó-enesó potoruku te yunoyaŋgurí. Anutu kanata kato uni o piyimi taŋgurí ŋuro kimoyó re yunoyara. Asa ko ŋande ye iŋaŋgurí, ko anutu ŋundo sire ŋu riní Polko o piyimi taró ŋuro kiro.

naru kapusa quno ηuno yatowó. ¹³ηu nonηo kheηgeηoro, yate Rekiu yendémo uyaretowó. Saraηoníqo, matú meté mahini ko saraηoní ka Puteoli yendémo otowó. ¹⁴ηu yendémo ηuno iηondutu uni toponani kumi yiyato enendo yiqo, eneya yato naru kande saηiyoro irisa ηunde taró. Naru ηu kini tiníqo, khendo Rom otowó. ¹⁵Topo kumi Rom yaηgurí qundo nore mahetowó ηuro iηoro kopo nerewero mahēgurí. Kumimboko Ya Etwero Kapusa quno ηuno sopo nerēgurí, ko kumimboko Apius koro maketino ηuno sopo nerēgurí. Polko uni ηu yiyoroqo Anutu yuηgunararó, ko newondí kondéraró. ¹⁶Asa yate Rom yendémo otowó qundo Rom koro sopo-sopo unindo meté yi Pol enemata yano yaró, ko kuma uni kato sopoyaró.

Polko Rom yendémo ηuno miti mande yesowaró

¹⁷Asa naru kapusa ηunde rotoro Polko Juda unindoro tapá uni neko yirini kopoyi ηande yimiraró, “Uni topo, nondo oka tero noreηo wini qu ka owéye rewe kama umburó, ko usi-sinanimboru oteteye ηu ka kama wendaqanowó. Quko Yerusalem ηuno unindo norero Rom uni kandeyemo norotaηgurí. ¹⁸Rom uni ηundo mandene iηoro, ηuro urato khumowero mepémo kini, yero norotowero ye iηaηgurí. ¹⁹Quko Juda unindo piyimiηoyiqo, nondo Sisako mandene roηgaruwoweya, yero nekanowó. Quko nondo sitú toponembo otete piyimi taηgurí quro mande ka kama yanowó. ²⁰ηu murí ηuro tero nondo ye yiyowero iηoro mande yunowero neko yereno. Nore Israel o meté horé sopoyoteto ηuro no utó kondé ηando kusi nereyote.”

²¹ηunde yini miraηgurí, “Judia uni kumi kato keηo sokome ka kama nakayáηoro nimitoyaηgo, ko topo uni kato Yerusalem nonηo keηo o piyimi taró quro piηa mande ka kama re maheró. ²²Quko keηo iηo-iηoke ηu maηgokepo yeka iηowato. Dokoro ηande iηoteto, ko yendé soso qunoko unipareto ηu wini usowo-sowo ηuro mande piyimi yeyoteηgo.”

²³ηunde yero naru ka eneya pitu ko huruwowero qu rokóηaηgurí. Tukú, ηu naruko ηuno uni qambu yayómo mahēgurí. Ita saraηoní, yate suwo tiníqo, Polko mande rondaqe yunoro Anutuko unipareyó wiri yereyote naruyó^q ηuro yaró. Kowe ηande witú yereró, ko Moses koro Hutuηo Mande ηuya Ye-ye Unindoro mandeye^r ηuya Yesu koro yaró. ²⁴Uni kumimboko mandí iηondutuwoyaηgurí, ko kumimboko kini. ²⁵Polko mande weηa ka yiniqo, uni ηundo iηo-iηo enesó-enesó toworu toηewero taηgurí. Mande weηa ηuko ηandiro, “Yuqa Surumímbo mande hamó ka ye-ye uni^s Aisaia maηgómo usi-sinanimu ηande yaró,

^q 28:23 “Anutuko unipareyó wiri yereyote naruyómo ” ηuno iηondutu unipareko hamó Anutu kusuyoyómo yowaηgo. ^r 28:23 “Hutuηo Mande koya Ye-ye Unindoro mandeye” ηuko Anutu koro mande korete qu. ^s 28:25 “ye-ye uni ” ηuko Anutuko mandí yunoní unipare yunaηgurí.

- 26 “Keto unipare ŋuko oya ŋande yimito,
 ‘Yendo naru rokóŋoro mande iŋoyotengɔ,
 ŋuko mande ŋuro murí kama iŋoyi tondaŋeyote.
 27 Dokoro unipare ŋundo newondeye komo kondéraró,
 ko kusumboyembo meté mande kama iŋoyaŋgurí,
 ko toŋeye pokamaŋgurí.
 Toŋeyembo oka qenewaŋgo koro,
 ko kusumboyembo oka iŋowaŋgo koro,
 ko newondyembo mande murí iŋowaŋgo koro.
 Ko ŋunde tero newonde rohoré tero nono mahi
 yorewe meté tewaŋgo.’

28 “Ŋunde ŋuroko ye ŋuro iŋoyi, Anutuko uni rambaruru koŋgo
 yoreweya, ŋuro piŋa mande ŋuko uni wini meywomo asáŋoní toŋeró.
 Ko enendo kusumbo rewaŋgo.” 29 (-)†

30 Asa Polko ya kimaró quno ŋuno yotoro uni soso eneno mahi o meté
 te yunoyoní kumima naru irisa ŋunde rotaró. 31 Ŋu naruko ŋuno uni kato
 kama kusiyoní Anutuko unipareyó wiri yereyote naruyó ŋuro yesowaró,
 ko Uni Parámi Yesu Kristo^u ŋuro mande rondaqe yunoyaró.

† 28:29 Iŋo-iŋo uni kumimbo, wini 29 ŋuya yote, ŋunde ye iŋoyotengɔ. Wini 29 ŋuko
 ŋandiro: “Ŋunde yiniŋo, Juda uni ŋundo toŋero keweroyemo mandeto kuma teyaŋgurí.”

^u 28:31 “Yesu Kristo ” - komo suki ye-ye *unindo* Anutuko uni ka rokóŋoní mahero wiri
 yerete uni parámi horé tunoqeweya qu karo yaŋgurí. Juda unipareto uni maheweya ŋu,
 “Kristo,” ma, “*Mesaiya*,” ye nekaŋgurí. Asa Yesu mahiní eneŋo unipareyó, “Kristo Yesu,”
 ma, “Yesu Kristo,” nanqe ye nekaŋgurí.